

Jesucristo Pia Pexeinya Diwesi Jume Tatsi Lucas Petinae Diwesi

Meje po diwesi yabara xua Lucas tamropata pitaba poxonae tina

¹ Jaco Teófilo. Ponxaem nentũ cui xanepanaein, cata tinatsi. Pinmonae bayatha xuya cou tina diwesi Jesús yabara, xua ichamonaē cou paeba, xua pinae Jesús poxonaē xanepanaya popona pata xantha. ² Pomonaē cou xua baxua pepaebixae barapomonaē pinae copiya yatsicaewa tane daxita pocotsiwa Jesús exana pata xantha. Mataũtano pinae barapomonaē Nacom Pejume Diwesi tatsi cuidubeiba. ³ Xan netsita wũnae daxota nanta xeinan xua yabara tayainyabiwa pomonaē petinaexae yawa pecueicueijeixae daxita barapo diwesin xua pinae juinya Jesús exana. Bapoxonaē cuita cata tinapoinchi Teófilo jinya neyaputaenexa tsane daxita pocotsiwa Jesús exana juinya xua copiya tsoponae xuano xua bapoxonaē tsoponaeno. ⁴ Baraxua cata tinatsi jinya neyaputaenexa tsane barapo pexainyei jume po coyene ichamonaē bayatha cacuiduba.

Meje yabara poxonaē matatsunpin wũnae yabara tsiwũnae paeba xua Juan naexanaena pon jiwi Pebautisabin tsane

⁵ Caena bayatha poxonaē Herodes popona Judea nacuatha, xua pon Judea nacuapiwi peyanacua ewatsinchi, bapoxonaerũ barichi popona barapo nacuatha sacerdotepin pon pewũn Zacarías. Bapon jiwana po sacerdotepiwi pia matabũxũ jiwi pewũn Abías. Piseuri tatsi pewũn Isabel. Piseuribe pia pamo susato jiwana pin tatsibe, bapon pewũn Aarón pon yatsicaya tabũ ducua sacerdotepin. ⁶ Piseuribe Nacom tsita jũntũ coyene

xanepanatsibe xua bara xanepanaya peexanaewabe. Pocotsiwa Nacom pon jiwi Pecanamataxeinaein, nacana jume diwesi itoroba baxua itapeta beta exaneibabe. Daxota jopa yabara paebeibichibe jiwi po coyene xua baponbe natsiaenae cuentabe xua abe peexaneibiwabe. ⁷ Ichitha pexui jopa xeinaeyobe, tsipei Isabel mawecowa, matautano tsipei bayatha acuewa iru tsipei pebin bayatha amo tsecae.

⁸ Caentacabi poxonae Zacarías u pia matabuxu jiwi pia cuitha exana Nacom nexa, bapon Zacarías xuya pi-amonae itapetatsi. ⁹ Barapomonae sacerdotemonae, pia cui coyene xeina xua caein piamonae jiwana itapetatsi poxonae daxita barapomonae nacuita Nacom pon jiwi Pecanamataxeinaein pin pia botha tatsi. Bapon Zacarías itapetatsi xua pejoniyenexa po tutu peainya cui tutu Nacom pin pia botha po tututha ichaxota exaneiba xua Nacom nexa. Barapo tututha Zacarías tauta petuxusi exanaenexa Nacom nexa xua Nacom peitorobixae. ¹⁰ Poxonae Zacarías cataunxuae tuxusi exanawiya petuxueiwa xua tauta Nacom nexa, barapoxonae daxita pomonae aisowa beumeinya barapomonae Nacom tsipae-bompa. ¹¹ Bapoxonae Zacarías tsita naitutatsi matatsunpin pon Nacom pon jiwi Pecanamataxeinaein itoroba. Po muxunene pecoxa weya matatsunpin iboto caquita uncua po ibototha xua ichaxota tauteiba petuxueiwa Nacom nexa. ¹² Poxonae Zacarías taeba matatsunpin jopa yaputaeyo xua peexanaewa, bichocono pejunuwixae. ¹³ Ichitha matatsunpin Zacarías baraichi, jeichichi:

—Zacarías, jopa junuwinde. Nacom bara cajume tane poxonae tsipaebeibame bapon. Methaunxuae jinseuri Isabel tanaexanaeinchi pexuyo. Jinseuri cata pabetsina pebin wuto. Xam wun dutsiname bapontha, po wun Juan, jei. ¹⁴ Juntu coyene weiweinaename. Barichi pinmonae juntu coyene weiweinaena xua bapon penaexanaexae

tsane. ¹⁵ Bapon Juan Nacom pon jiwi Pecanamataxeinaein tsita ainya cui tsainchi. Bapon peatsaxae mera jopa apae tsane. Vino mera jopa apae tsaneno. Poxonae cataunxuae bütiyotha eca bichocono jüntü coyene yucaeinchi Nacom pia Pejumope tünaxü tatsi pia peayapusüwa tatsi. ¹⁶ Bapon cana exanaena xua ainya Israel nacuapiwi jume cowüntsina Nacom pon Pecanamataxeinaein jiwi xua barapomonae barapo Nacom pia Nacom tatsi tsainchi. ¹⁷ Juan tsiwanaya poponaena xua pon xua Nacom itorobina bapon tsiwanaya poponaeinchi. Juan xeinaena Nacom pia Pejumope tünaxü tatsi pia peayapusüwa tatsi icha cain Elías ichi pon Nacom peitorobi jume pepaebin. Bapon Elías bayatha tupa. Juan exanaena xua pexui paxeiwi antobe tsaibi tsainchi. Mataütano Juan cana exanaena xua jume cowüntsina Nacom pomonae copiya Nacom pejumefebiwichi. Tsipei exanaena baxua, barapomonae tsiwanaya jume cui yabara najüntü coyene wünaetsina, xua barapomonae pejume cowüntsinea Nacom pon Pecanamataxeinaein jiwi, jei matatsunpin.

¹⁸ Zacarías yainyaba matatsunpin, jeye:

—¿Eta nejumichim yatsicaewara xua inta naexanaena pexuyo? Apara xan amo tsecaein. Iru tapetsiriwa apara inta acue tsecaeba, jei.

¹⁹ Matatsunpin Zacarías jume notatsi, jeye:

—Apara xan Gabriel. Barapara Nacom ba imoxoyo caquita uncueiban. Nacom neitoroba bepara catsipae-bichei barapo pexeinya jume diwesi. Daxota yatsicaya naexanaenaba nexanto. ²⁰ Incane jume taema. Yaitama jame maisa aunxuae jopa yabara nejume cowüntsime, daxota methaunxuae jopa cuinaya paebim tsane. Yajume aunyeibiya yantacabi jopaename poxonae beya abu nexanto naexanaena xuaunxuae catsipaebatsi, jei.

²¹ Poxonae Zacarías tsipaebuyatsi, Zacarías pesato beya ewatumeinchi pomonae Nacom tsipaeba pesatotha.

Barapomonae nabarai: “¿Eta pocotsiwa metha Zacarías came jopa jondenaeyo Nacom pin pia bo werena?” najei. ²² Poxonae Zacarías matapainya jondena jopa itacupaetsi xua petsipaebiwa barapomonaetha. Bapoxonae barapomonae nanta xeina xua metha bara Zacarías tsita naitutatsi xua wūnae barapo tututha poxoru Zacarías pecobetha cowai barapomonaetha. Ichitha awiya came jopa cueicueijeiyó.

²³ Poxonae Zacarías daxita nacobe weta xua exana Nacom nexa, Nacom pin pia botha, bapoxonae pia botha pona. ²⁴ Pirapaeyo Zacarías piseuri tatsi Isabel bupana taecatsi pexuyo. Barapowa jopa naitutsiyo cinco po xometiyobe. Saya pia botha eca. ²⁵ Barapowa nabarai, jeye: “Baxua Nacom inta exana pon Tanecanamataxeinaein. Bapon baxua inta exana xua jiwi jopa aura tana neexanaewa tsane”, najei bapowa.

Meje yabara poxonae matatsunpin wūnae tsiwanaya paeba xua Jesús naexanaena

²⁶ Poxonae Isabel seis po xometiyobe yapucaewa poxonae pexuyo bupana taecatsi, bapoxonae Nacom itoroba matatsunpin, pon pewun Gabriel. Gabriel Nazaret tomara beitorobiyatsi po tomara eca Galilea nacuatha. ²⁷ Gabriel patopa pesiwa ponaenexa yabūyo, powa bapana jopa pebin pichiyo. Bapowa muxu pepichi pecotsiwa, pon pewun José. Bapon José David pia pemomoxi susato jiwana tatsi. Caena bayatha David Israel nacuamonae itorobiya pia pepa peewatsinchi. Barapowa powa José pecotsiwaxae tatsi pewun María. ²⁸ Matatsunpin Gabriel, patopa ichaxota María eca. Gabriel barai, María baraichi, jeye:

—María jaco. Nacom itapeta cayabara tsita juntu coyene xanepanatsi beyacaincha icha yabūxi. Matautano

barapara Nacom pon jiwi Pecanamataxeinaein cabarũ popona, jei matatsunpin.

²⁹ Ichitha poxonaē jume taeba bapowa, yabara jume cuitaya nabenaeca. Pia coutha nayainyaba jeye: “¿Eta xua bapon nejacoba jane?” najei. ³⁰ Matatsunpin María baraichi, jeichichi:

—María, jop̄a junuwinde, Nacom cayabara tsita j̄untũ coyene xanepanatsi. ³¹ Matha taema xam methaunxuae pexuyo yarp̄r̄wa jinaename xuano bara pabetsiname nexanto. Bapoyo w̄n dutsiname po w̄n Jesús. ³² Bapon ainya cui peexanaeinchi tsainchi. Bapon w̄n dutinchi, icha w̄n jei tsainchi: ‘Nacom Pexanto tatsi pon peitabocotha eca’, jei tsainchi. Nacom pon Pecanamataxeinaein jiwi, bapon pexanto cana exanaena xua bapon jiwi itorobiya pia pepa Peewatsinchi tsane icha matha David cana ichichi, pon Jesús pia pamo susato jiton tatsi. ³³ Bapon yacui tsitecaena xua jiwi peewatsinchi penaexanaewa tsane Israel piamonaē susato saineiwi pexantha tatsi. Pia peitorobi coyenewa tatsi jop̄a weraweracae tsane, jei Gabriel, pon matatsunpin.

³⁴ Nexata María jume nota matatsunpin, jeye:

—¿Eta xua yarp̄r̄wa jinocuaein pexuyo? Apara cataunxuae jop̄a nacueyabinyo, jei María.

³⁵ Matatsunpin jume nota, jeye:

—Nacom pia Pejumōpe t̄naxũ tatsi cata patopeicaena. Matautano Nacom pon bichocono pepa pej̄untũ coyene xanepanaein bapon, pia peayapus̄wa tatsi cantatsun matawacaicha nontsicaena icha be tsaquinaebowa ichi tsane. Daxota po pexuyo naexanaena, barapo pexuyo Nacom tsita j̄untũ coyene xanepanaeinchi. Barapo pexuyo yabara jei tsainchi: ‘Nacom Pexanto tatsi’, jei tsainchi. ³⁶ Ir̄r̄ũ barichi jinyamonaewayo Isabel, bequein bara acue tsecae, ichitha anoxuae pexanto yarp̄r̄wa jina.

Anoxuae barapowa seis po xometiyobe yapucaewa xua yapurwa jina bequein copiya mawecowa. ³⁷ Dapocotsiwa aibi pocotsiwa Nacom tsita ayapubetsi, tsipei bapon daxita bara yaputane.

³⁸ Nexata María namchi, jeye:

—Xan bara barapowayın xua taexanaewayon pocotsiwa Nacom pon jiwi Pecanamataxeinaein neitoroba. Bũ moya bara Nacom inta exanaena xuaunxuae netsipae-bame, jei María, matatsunpintha.

Bapoxonae matatsunpin napitaba.

Meje yabara poxonae María siwa pona, xua Isabel siwa poinchi

³⁹ Pirapaeyo María nainya pontaba tomara beya, po tomara eca ichaxota ira marafowowa xua Judea nacuatha. ⁴⁰ Baxota barapowa María joniya Zacarías pia botha tatsi. Bapoxonae Isabel jacobatsi. ⁴¹ Poxonae Isabel jume tane xua María jacobae, bapoxonae pia pexuyo tsiperu natsixibecatsi Isabel. Bapoxonae Nacom pia Pejumope tunaxu tatsi pia peayapusuwa tatsi Isabel juntu coyene yucatsi. ⁴² Bapoxonae Isabel jume daunweya wawai xua María baraichi, jeye:

—¡Nacom cayabara tsita juntu coyene xanepanatsi beyacaincha icha yabuxi! ¡Barichi nexanto Nacom yabara tsita juntu coyene xanepanatsi! ⁴³ ¡Xam powa Tanecanamataxeinaein pena tatsim, bichocono auran xua tana nesiwa ponaewam tsipei jopa taainya cuiwayon! ⁴⁴ Poxoru poxonae cajume tainchi xua nejacobame bapoxonae pexuyo netsiperu weiweinaya natsixibeca. ⁴⁵ Juntu coyene weiweiname nejume cowuntsixae tsipei bara nayabara jume cui wetsina pocotsiwa Nacom pon jiwi Pecanamataxeinaein yabara catsiwunae muxu duta pon Pecanamataxeinaein jiwi xua poxonae matatsunpin catsipaeba, jei Isabel.

⁴⁶ Nexata María namchi, jeye:

“Tajuntũ coyene Nacom wũnae jaintatsi
pon jiwi Pecanamataxeinaein.

⁴⁷ Matautano tajuntũ coyene Nacom yabara
weiweinatsi pon Tanecapanepaein.

⁴⁸ Nacom neweyatane xua xan saya tapawin.

Bara barapowayũn, powayũn xua

taexanaewa pocotsiwa Nacom neitoroba.

Anoxuae xuano bexa tsaneno daxita jiwi pomonae

naitapataya naexanaponaena wũnae nejainchina

tsipei Nacom nejuntũ coyene weiweina

exana bichocono beyacaincha icha yabũxi.

⁴⁹ Bapon Nacom pon peayapusũ itorobi coyene

pexeinaein inta bichocono wũnae exana.

Bapon Nacom pepa pejuntũ coyene xanepanaein.

⁵⁰ Bapon Nacom yaweneibina jiwi pia peantobewaxae

pomonaetha pomonae copiya pecunuweibixaetsi.

⁵¹ Nacom tsita itũba xua peayapusũ

itorobi coyenewa xeina.

Baxua exana poxonae juntũ coyene amanayaba

pomonaetha pomonae atsaquiya penayabara

peabiwi xua ichamonae peabiwichi.

⁵² Nacom cui pita cana exana pomonaetha pomonae

pecanamataxeinaewi xua equeicha barapomonae jopa

naexanae tsane xua pecanamataxeinaewa jiwi.

Ichitha nama pomonaetha pomonae pecui paw

naexana barapomonaetha Nacom cana exana xua

barapomonae penaexanaewa pomonae

pecanamataxeinae jiwi.

⁵³ Pomonae xua piyain barapomonaetha Nacom cana

exana xua barapomonae petonsanaewa xua

penabanaewa po pexaewa pexeinya pexaewan.

Matautano copei pexeinaewi barapomonaetha Nacom

cana exana xua barapomonae pecobesainaewa.

⁵⁴ Nacom yaweneiba pijimonaē Israel nacuapiwi pomonaē pia pamo susatopin tatsi, bapon Israel pon tanacuita Nacom.

Nacom jopa yabara j̄ntemainaeyo xua peyaweneibiwa barapo pijimonaē peantobexae.

⁵⁵ Nacom daxita exana pocotsiwa Abraham wamo susatopin yabara tsiw̄naē muxu dutatsi xuano xua yabara tsiw̄naē muxu dutatsi pia pemomoxi susato jiwi tatsi”, jei María.

⁵⁶ María cataunxuae acobi po xometiyobe eca Isabel pia botha tatsi. Bapoxonaē equeicha caibe nawiya pia bo beya.

Meje yabara poxonaē Juan naexana pon jiwi Pebautisabin

⁵⁷ Nexata Isabel xua b̄pana taecatsi pexuyo, per̄u cui nauchitane. Bapoxonaē pexuyo tanowaeincuatsi xua pexanto. ⁵⁸ Pomonaē Isabel pia botha petaenaewichi, ir̄uru piamonaē tatsi pomonaē pecuariya petaenaewichi daxita barapomonaē Isabel siwa poinchi xua pejacobinexa tsainchi. Barapomonaē yaputane xua Nacom pon Pecana-mataxeinaeinxae jiwi Isabel beta taexanatsi poxonaē Isabel dacotsiwa taitorobatsi pexuyo. ⁵⁹ Poxonaē ocho po matabibe yapucaewa barapoxonaē pexuyo wi thabatsi xua pebin w̄toxae xua ichaxota nareixacaeca. Barapomonaē nanta xeina xua pexuyo w̄n dutsinchi po w̄n pexuyo paxa tatsi xeina, xua po w̄n “Zacarías”, jei. ⁶⁰ Ichitha pexuyo pena tatsi namchi barapomonaetha, jeye:

—Jume, jame bewa jei: ‘Juan’, jei, jei pexuyo pena tatsi.

⁶¹ Bapoxonaē barapomonaē Isabel baraichi, jeye:

—¿Exua? Jinyamonaē dapocotsi w̄n aibiba, po w̄n: ‘Juan’, jei, jei barapomonaē.

⁶² Nexata barapomonaē moya pecobetha cowai Zacari-astha. Matautano pecobetha cowaya yainyaba, Zacarías

yainyabatsi jeichichi: “¿Eta po wun jinya nexanto wun dutsichi?” jei barapomonaе. ⁶³ Zacarías wuca napewa petinaenexa tsane. Bapoxonaе barapo napae-watha jei xua tina: ‘Apara pewun Juan’, jei. Bapoxonaе barapomonaе najuntu coyene benaeca xua iru bapon namchi: ‘Bara pewun Juan’, jei. ⁶⁴ Poxonaе baxua exana, caena bapoxonaе jemeicha Zacarías equeicha caewa paeba. Equeicha ebato saduҗei xua cueicueijeі. Zacarías tamropata pitaba xua wunaе jainta Nacom. ⁶⁵ Bapoxonaе daxita pomonaе imoxoyo jinompa ichaxota Zacarías piseuribe poponabe, daxita barapomonaе junuwa. Matautano pomonaе xua pejinompaewi daxita ichaxota po ira xua marafowwa xua barapo Judea nacuatha, daxita barapomonaе paebinouta pocotsiwa xua bayatha petaexae. ⁶⁶ Daxita pomonaе jume tane, barapomonaе najuntu coyene yabara nanta xeina nawita. Matautano caemonaе nantiya nayainyaba najei: “¿Eta bichane metha pexuyo poxonaе wichabina?” najei barapomonaе. Apara poxoru Nacom pon Pecanamataxeinaein jiwi bichocono pexuyo petsita juntu coyene xanepanaexaetsi daxota barapomonaе baxua paeba.

Meje yabara xua Zacarías pia wei

⁶⁷ Pexuyo paxa tatsi Zacarías, juntu coyene yucatsi Nacom pia Pejumope tunaxu tatsi pia peayapusuwa tatsi. Matautano bapon cueicueijeі po jumetha po jume Nacom cata. Zacarías namchi, jeye:

⁶⁸ “Nacom pon Pecanamataxeinaein jiwi, pon Israel pia Nacom tatsi, barabu wunaе jainchinchi barapo Nacom. Tsipei bapon bayatha patopeica waxantha. Bapon bara piamonaetsi. Matautano bapon bayatha naca capanepa.

⁶⁹ Pon Nacom nacata itorobica bapon pon jiwi

pecapanenebiyaein pia peayapusuwatha.
 Bapon David pia pemomoxi susato jiwana tatsi.
 Bapon David pon Nacom pia petanacuitinchi xua
 peexanaewa pocotsiwa Nacom itoroba.

⁷⁰ Caena bayatha Nacom yabara naca tsiwuna
 muxu duta, poxona itoroba pia peitorobi jume
 petapaebiwichi xua wanaca tsipaebinexa.

⁷¹ Bara naca tsipaeba xua pinae bapon pon Nacom
 wanacata itorobicaexae, pinae naca
 capanepaena pomona wanaca aitaetaebi
 jiwi pia xainya weya tatsi.
 Matautano pinae naca capanepaena pomona
 wanaca ita aenae-aenei jiwi pia
 xainya weya tatsi.

⁷² Matautano Nacom naca tsipaeba xua pinae
 wamo susatopiwi yabara canantaxeinaeinchi
 xua peyawenaenexatsi.
 Matautano pinae jopa junteinae tsane
 xua wamo susatopiwi peyawenaponaewatsi
 xua bayatha Nacom yabara petsiwuna
 muxu dutsixae baxua.

⁷³ Baraxua Nacom naca tsiwuna muxu duta
 xua xainyeya bara paeba poxona Abraham
 tsipaebatsi, pon wamo susatopin.

⁷⁴ Nacom Abraham tsipaebatsi xua pinae naca
 capanenebiya tsane wanaca aitaetaebi
 jiwi weya.
 Baxua pinae nacata exanaena xua pinae
 waexanaewa tsane pocotsiwa naca itoroba,
 xuano jopa wacunuwinexa tsane
 ichamonae pinae.

⁷⁵ Matautano nacata exanaena xua pinae beta
 jinompaeinchi bapon peitabaratha, xuano xua
 juntu coyene xeicaeya jinompaeinchi daxita
 matabintha xua jopa abe waexanaponaewa.

⁷⁶ Irũ xam taxantom Juan jiwi cayabara wũn
dutsina pon Nacom peitorobi jume pepaebin,
pon itabocotha eca, cayabara jei tsane.
Baxua cayabara jei poxoru xam tsiwanaya
patopaename pon jiwi pia pepa
Pecanamataxeinaein.

Daxita jiwi jũntũ coyene wũnaetsiname
pepatopaenexa tsane pon jiwi pia pepa
Pecanamataxeinaein, pon Mesías.

⁷⁷ Nacom caitoroba Juan xua jiwi neyaputane
neexanaenexa tsane xua Nacom jũntemainena
jiwi abe pia peexanae cuiru coyenein tatsi.
Bapoxonae Nacom barapomonae capanenebiya
exanaeinchi bapon beya xua jopa Nacom petsita
natsicuentsexatsi xua abe peexanaexae.

⁷⁸ Wanacom jopa juniya wanaca antobexae xuano
xua wanaca yawenaexae nacata itorobicaena
pexanto itaboco wetsica.

Nacata wũnae exanaena icha xometo ichi xua
nacata wũnae poxonae pentha pena matabixae.

⁷⁹ Poxonae patopeicaena pon Nacom itorobicaena,
bapoxonae bapon jiwi jũntũ cui
weiweinaya exanaeinchi.

Baxua exanaeinchi, pomonaetha pomonae pejume
cowũntsiwi bequein copiya barapomonae
muxu pewerapae bichocono abe peexanaexae.
Yawa Nacom naca jumope antasũ exanaena,
xua jũntema wajinompænexa tsainchi”,
jei Zacarías xua pexanto barai pon Juan.

⁸⁰ Barapo pexuyo Juan wichabeca. Matautano ajũn-
tũyapũsũya popona xua Nacom yabara yaputaepona.
Juan ira xuepana susato tsurucuae nacuatha tsana po-
pona, beya poxonae po mataqueitha poxonae Juan tsita
patopa Israel nacuapiwi pebautisabinexa barapomonae.

2

Meje yabara poxonae Jesús nowaeuncua pebin wuto barapo cae pin nacuathe

(Mt 1.18-25)

¹ Iruru bapoxonae popona romanomonae itorobiya pia pepa peewatsinchi, pon pewun Augusto. Bapon itoroba piamonae peexanaenexa censo matawun xua pewun tinaewan xua daxita carepaya tomaran jiwi wun tinaeinchi. ² Barapo censo matawun xua pewun tinaewan jiwi, baxua matapainya nacobe cui juta poxonae Cirenio Siria nacuapiwi pia peyanacua ewatsinchi naexana. ³ Daxita jiwi tsanaya barompaya pia pepa tomaran bewa benawibiyaena, ichaxota pia pamo jiwi tatsi tanowaeumeinchi. ⁴ Daxota José Nazaret tomara wewarapiya, xua Galilea nacua weya. Belén tomara bewarapiya po tomara eca Judea nacuatha. Baraxota caena bayatha David pon judiomonae itorobiya pia pepa peewatsinchi nacatsiwa, pon José pia pamo jiwi susato jiwana tatsi, pon yatsicaya tabu ducua. ⁵ José pecotsiwa baru pona pewun tinaenexa tsainchibe. Barapowa pewun María. Barapowa pexuyo bupana taecatsi. ⁶ Poxonae cataunxuae baraxota Belén tomaratha ecabe, bapoxonae María xua bupana taecatsi pexuyo, bara weaperutanetsiba. ⁷ Bara bapowa tanaexanatsi pexanto pon copiya tanacatsiwatsi. Barapo pexuyo paparuwantha tsiwixitha mata quiyontababota jeriyotha, po naeyotha ichaxota vaca naepanaewa xayathopa. Tsipei tutu quecona po bomuxutha ichaxota jiwi maiteiba pomonae pateiba pomonae siwa poneiba.

Meje yabara poxonae matatsunpiwi patsica ichaxota pomonaetha pomonae oveja duweimonae peyapu eenaewi

⁸ Imoxoyo Belén tomaratha, pebiwi oveja duweimonae yapu eeneiba wexotha poxonae merawi. ⁹ Nexata jemeicha barapo pebiwi tsita naitatatsi matatsunpin po matatsunpin itorobicatsi xua pon jiwi Pecanamataxeinaein itorobica. Matautano Nacom pon jiwi Pecanamataxeinaein pia peitupanae coicha tatsino barapomonae matawacaicha uncueicatsi. Barapo pebiwi bichocono junuwa. ¹⁰ Nexata matatsunpin barapomonae baraichi jeye: “Jopa pajunuwinde. Apara paca tsipaebatsi pexinya jume diwesi xua po diwesi daxita jiwi juntu coyene weiweina exanaeinchi. ¹¹ Poxoru anoxuae ichowayo tanaexanatsi pexuyo. Barapo pexuyo naexana David pia tomaratha tatsi xua Belén tomara. Barapo pexuyo, pon jiwi pecapanenebiyaein. Bapon apara pewan Mesías pon Pecanamataxeinaein jiwi, pon Nacom weitorobicatsi. ¹² Bara barapo pexuyo paca ita cayopitatsi xua pataebotsiname vaca pia boyotha. Pataebotsiname barapo pexuyo xua paparuwatha mata quiontababotatsi jeriyotha ichaxota po naeyotha vaca naepanaewan xayathopa”, jei matatsunpin.

¹³ Bapoxonae jemeicha equeicha icha matatsunpiwi pin bicheito naitubarucupa ichaxota icha matatsunpin uncua. Barapo matatsunpiwi itaboco wepatsica. Barapomonae Nacom wanae jaintatsi. Barapo matatsunpiwi namchi, jeye:

¹⁴ “¡Maisa bichocono Nacom wanae jaintatsi pon itabocotha peecaein, peitorobixae pexanto! ¡Barabu jiwi junte ma jinompa barapo irathe pomonae xua Nacom juntu coyene weiweina exanatsi!” jei matatsunpiwi.

¹⁵ Poxonae matatsunpiwi athabe ichicha caibeicha itaboco beicha, bapoxonae pomonae oveja duweimonae peyapu eenaewi barapomonae nabarai, jeye:

—Bũ poinchi Belén tomara beya wataenexa tsane pocotsiwa bayatha Nacom exana, xuano xuaunxuae matatsunpin naca tsipaeba pon jiwi Pecanamataxeinaein nexa, jei barapomonae pomonae oveja duweimonae peyapu eenaewi.

¹⁶ Barapoxonae oveja duweimonae peyapu eenaewi nainya ponarũcupa. Barapoxonae María irũ José caxibarũcupatsi. Irũ pexuyo poyo boqueca jeriyotha vaca matabotha caxibarũcupatsi. ¹⁷ Poxonae barapomonae taerũcupa pexuyo, barapomonae tsipaeba nawita ichamonaetha pocotsiwa bayatha barapomonae petsipaebix-aetsi matatsunpin xua pexuyo yabara. ¹⁸ Daxita pomonae jume taerũcupa baxua yabara najũntũ coyene cabenaeca xua pomonae oveja duweimonae peyapu eenaewi pepaebixae baxua. ¹⁹ María barapo diwesi moya yawũn xeina pejũntũ coyenewatha xua jume cui cayabara nanta exaba. ²⁰ Bapoxonae oveja duweimonae peyapu eenaewi caibe nawibiya. Barapomonae Nacom wũnae jaintatsi petaxxae xuano pejume taexaeno xua bayatha matatsunpiwi pepaebixae. Barapomonae namchi, jeye:

—Maisa Nacom pon pepa yatsicaewa pejũntũ coyene xanepanaein, jei.

Meje yabara poxonae María irũ José caponabe Jesús Nacom pin pia botha tatsi

²¹ Poxonae ocho po matababibe yapucaewa, pexuyo wi thabatsi, xua pebin wũtoxae xua ichaxota nareixacaeca. Baxua judiomonae pia cui coyenetha tatsi. Barapoyo wũn dutatsi pewũn Jesús, po wũn bayatha matatsunpin wũn unuta xua María muxu tsipaebatsi poxonae María cataunxuae abũ jopa bũpana taecaetsi pexuyo.

²² Nexata matababi jopa, xua po mataqueitha María irũ José bewa pepon naxanebibe xua sacerdotemon-aepin taexanaena be pocotsi coyeneya bayatha Moisés

pia peitorobi coyenewa tatsi paeba xua daxota jopa penataxobinexa. Bapoxonae María irũ José pexuyo caponabe Jerusalén tomara beya pecatsinexa tsanebe pexuyo Nacomtha pon jiwi Pecanamataxeinaein xua pet-sita itapeinya xeinaenexabe xua barapo pexuyo Nacom petanacuichiwa tsainchi poxonae pinyo tsane. ²³⁻²⁴ Baxua exana tsipei Nacom pia peitorobi diwesitha tatsi tina, jeyei: “Daxita jiwi pia pexui tatsi, pebin wütixi, poxi copiya nacatsiwena, bapoxi Nacom itapeta pia taexanaetsi pocotsiwa Nacom ichichipa”, jei Nacom pia peitorobi jume diwesitha tatsi. Yawa ponabe pecapon-aenexabe pepupunaein xua pecatsiwa Nacomtha xua sacerdotemonaepin pebexubinexa xua petautsinexa xua petuxusi exanaenexa tsane Nacomtha María nexa yawa José nexa. Nacom peitorobi coyenewa tatsi jeyei: “Bara irũ ainya tsaqueintobe care. Ichacuitha icha tsaqueintobe aibi, bara irũ ainya topibotobe care”, jei.

²⁵ Irũrũ barapoxonae pebin popona Jerusalén tomaratha, bapon pewũn Simeón. Bapon pejũntũ coyene xanepanaein. Bapon wũnae jainteiba Nacom. Bapon wũnae ewateiba xua Nacom itorobina pon Israel nacuapiwi pia Pecanamataxeinaein tatsi nexa. Bapon Israel nacuapiwi pu capanepaeinchi romanomonae weya. Barapo romanomonae icha nacua werena pona xua Israel nacuapiwi cueranta enatsi. Tsipei barapo romanomonae Israel nacuapiwi canamataxeinatsi. Nacom pia Pejumope tũnaxũ tatsi Simeón barũ popoinchi. ²⁶ Nacom pia Pejumope tũnaxũ tatsi Simeón yaputane exanatsi xua pinae copiya taena Mesías pon xua Nacom, pon jiwi Pecanamataxeinaein itorobina. Bapoxonae xua pinae pirapaeyo tũpaena. ²⁷ Nacom pia Pejumope tũnaxũ tatsi Simeón joniya exanatsi Nacom pin pia botha tatsi. Bara José irũ pexuyo pena tatsino patopabe Nacom pin pia

botha tatsi. Pexuyo capatopabe petacana exanaenexa tsainchibe icha be pocotsi coyeneya Moisés pia peitorobi coyenewatha tatsi itoroba. ²⁸ Simeón isapita pexuyo. Nacom wūnae jaintatsino. Simeón namchi, jeye:

²⁹ “Nacom pon Tanecanamataxeinaem, bara anoxuae caitacupa xua tanecopatsiwam xua bara jūntemiya tatupaewa tsane. Tsipei anoxuae bara nayabara jume wetame pocotsiwa bayatha yabara netsiwūnae muxu dutame. Poxoru xan bapon tsocuaein xua exanan xua neitorobame.

³⁰ Xan yatsicaewa bara tanba, pon Pecapanenebiyaein jiwi.

³¹ Bapon tan pon xua itorobicapaebame, xua daxita jiwi taena xua bapon taeinchi.

³² Bapon yaputane exanaena xua Nacom yaputaeinchi pomonae jopa judiomonae naexanaeyo. Tsipei bapon be bapocotsin, xua poxonae jiwi beta tane exainchi merawi xua xota yonoyonei. Yawano bapon exanaena xua Israel nacuapiwi, pomonae jinyamonae xua wūnae jaintinchi xua ichamonae wūnae jainchina”, jei Simeón.

³³ María irū José yabara najūntū coyene cabenaecabe pocotsiwa Simeón pexuyo yabara paebatsi. ³⁴ Nexata Simeón barai, Nacom baraichi xua María yabara yawano xua José yabara, jeye: “Jūntū coyene weiweina exande baraponbe”, jei. Nexata Simeón, María baraichi xua pexuyo pena fatsi:

—Barapo pexuyo Nacom itapeta xua bapon peexanaenexa tsane po coyene xua Israel nacuapiwi ichamonae Nacom beya peponaenexa xua ichacuitha icha ichamonae Nacom beya jopa peponaenexa tsane. Yawa

Nacom itoroba barapo pexuyo, peitubinexa Nacom pia peayapuswa ichitha ichamonae jume cui aitaetabi tsaibi tsane. ³⁵ Daxota barapo pexuyo yaputaena pocotsiwa jiwi pejantũ coyeneintha nanta xeineibina. Ichitha xam, María, daxita baxuan caajuntũcoyenerewe exanaena be poxonae ichun canthuthũ tsapinopaena cusitha, jei Simeón xua María tsipaebatsi.

³⁶ Irurũ baxota poponarũ petsiriwa, pewun Ana. Barapowayo Nacom peitorobi jume pepaebiwayo. Barapowa Fanuel pexantiyo tatsi. Aser pon yatsicaya tabũ ducua bapon pia pemomoxi susato jiwana tatsi. Barapowa bara nama penapataewa tsoponae. Barapowa caena bayatha poxonae penowayo tsecae jitha eca. Pia pebinbe siete po weiyobe nabarũ poponabe. Bapoxonae pebin tũpa. ³⁷ Barapowa caena bayatha piseuri cuenta tũpatsi. Anoxuae nama barapowa yaochenta y cuatro po weiyobe jopaba. Barapowa Nacom pin pia bo weya jopa pichapeibiyo. Saya exaneiba pocotsiwa Nacom itoroba merawintha yawa matabintha. Najainboteibano poxonae tsipaebeiba Nacomtha. ³⁸ Poxonae Jesús caponatsi Nacom pin pia botha xua Nacom pecatsinexatsi bapoxonae Ana imoxoyo caquita uncuca barapomonaetha. Barapowa tsipaeba Nacomtha, jeye: “Nacom maisa jũntũ coyene weiweinan xua painta itorobame barapo pexuyo”, jei Ana. Bapoxonae Ana yabara paebaxoya pexuyo jiwitha pomonaetha pomonaewunae ewateiba po coyene xua Nacom itorobina Israel nacuapiwitha pon Israel nacuapiwi capanenebiya exanaeinchi romanomonaeweya.

Meje yabara poxonae Jesusbarũ caibe iyiya Nazaret tomara beya

³⁹ Nexata María irũ José wetabeba daxita xua Nacom, pon jiwi Pecanamataxeinaein, peitorobi jume coyenewa

paeba. Bapoxonae caibe canawiyabe pexuyo Galilea nacua beya xua pia tomara beyabe, Nazaret tomara beyabe. ⁴⁰ Pexuyo wichabeca. Matautano bichocono daunwei nawita, peyaputae coyene xexeinaponano. Nacom tsita juntu coyene xanepanapoinchi.

Meje yabara poxonae Jesús siwa pona Nacom pin pia bo tatsi

⁴¹ Jesús pena tatsi iru paxa tatsi daxita weitha poneiba Jerusalén tomara beya xua nataiba Pascua wun matacabin. Barapo Pascua wun jei, poxonae Israel nacuapiwi nanta xeina xua poxonae pinae bayatha pia pamo susato jiwi tatsi capanenebiya exanatsi Egipto nacua weya, xua Nacom capanenebiya. ⁴² Poxonae Jesús doce po weiyobe yapu jopa, María iru José iru Jesús, Jerusalén tomara beiyiya. Tsipei barapomonae pia cui xua poneiba barapo Pascua wun matacabin nexa. ⁴³ María iru José caibe nawirenabe pia tomara berena poxonae barapo matacabin weta. Ichitha pewowin Jesús naruntaba Jerusalén tomaratha. Jesús pena tatsi iru José jopa taeyobe xua Jesús nacopataba. ⁴⁴ Nanta xeinabe xua Jesús mexeya itara napunaecaponawei pin bicheitha. Caentacabitha María iru José namtotha naecaponabe, bapoxonae itaxanawiyabe pexanto. Necobauyabe pexanto pin bicheitha pia matabuxyo jiwimonaetha, pijiwimonaethano. ⁴⁵ Jopa pexanto caxinaebe. Bapoxonae equeicha caibe iyabe Jerusalén tomara beya, pewenaweneinexa tsanebe pexanto baxotiya equeicha.

⁴⁶ Poxonae acoibi po matabiyobe yapucaewa Jerusalén tomaratha baxota pexanto caxinabe Nacom pin pia botha tatsi. Jesús naeca ichaxota pomonae jiwi pecuidubiwi Nacom pia peitorobi jume. Jesús jume tane barapomonae. Matautano yainyabano nawita barapomonaetha. ⁴⁷ Daxita pomonae jume tane, najuntu

coyene cabenaeca tsipei Jesús peyaputaecin tsecae, matautano tsipei Jesús beta jume nota. ⁴⁸ María iru José poxonae baxua cui tanebe najuntu coyene cabenaecabe. María pexanto barai, jeye:

—Owae, ¿eta xua metha baxua painta exaname? Axa iru xan paca yabara najuntu coyene exabatsibe, paca jeitompatsi, jei.

⁴⁹ Jesús jume nota pena, jeye:

—¿Eta pocotsiwa metha ichawa beya pana nejeitom-pame? ¿Metha bara jopa payaputaem jampa xua bewa necui eenaena xua Taxa pia cui yabara tatsi? jei.

⁵⁰ Ichitha María iru José jopa xapain yaputaeyobe pocotsiwa Jesús paeba.

⁵¹ Jesús caibe nanawiya pena tatsibarutha Nazaret tomara beya. Jesús pena jume jejei tsaibi yawano José jume jejei tsaibichino xua daxita exana pocotsiwa Jesús itorobeibatsi. Jesús pena, daxita baxuan moicha cacui yabara cananta xeineibatsi pejuntu coyenewatha.

⁵² Nexata Jesús wiwichabapona yawa juntu coyene ayapusya exanapoinchino Nacom pia Pejumopetha tunaxu tatsi. Nacom iru jiwi Jesús antobe tsozonaetsi.

3

Meje yabara poxonae Juan pon Pebautisabin jiwi cuiduba ira xuepana susato tsurucuae nacuatha

(Mt 3.1-12; Mr 1.1-8; Jn 1.19-28)

¹ Iruru Tiberio pon romanomona itorobiya pia pepa peewatsinchi tatsi yapu jopa quince po weibe xua itorobiya canamataxeina barapo nacuanthapiwi. Bapoxonae iru Poncio Pilato Judea nacuapiwi peyanacua ewatsinchi naexana. Barichi Herodes Galilea nacuapiwi peyanacua ewatsinchi naexana. Iru Herodes peweicho tatsi Felipe, bapon Iturea nacuapiwi peyanacua ewatsinchi naexana

xua Traconite nacuathano. Barichirũ Lisania Abilinia nacuapiwi peyanacua ewatsinchi naexana. ² Barichirũ Anás irũ Caifás baponbe sacerdotemonae pia pepa pentacaponaeinbe tatsibe. Barapoxonaerũ Nacom Juan tsi-paebatsi poxonae ira xuepana susato tsurucuae nacuatha popona. Juan bapon Zacarías pexanto tatsi. ³ Juan popona ducuaeta Jordán nacuatha ichaxota Jordán mene. Nacom Pejume Diwesi tsipaeba ducuaeta jiwitha. Bapon barai jiwitha, jeye:

—Icha jũntũ coyene paxeinare painya neauraxae xua abe paexaname. Paca bautisabina ichamonae xua Nacom paca necayabara jũntemainenexa abe painya neexanae cuiru coyenein, jei Juan.

⁴ Baxua exana, peyabara jeichixaetsi xua peyabara jeixae pon Nacom peitorobi jume pepaebin Isafás poxonae bapon tina pejume diwesi. Barapo diwesitha Isafás caena bayatha wũnae tsiwũnaeya yabara paeba xua Juan yabara. Isafás namchi, jeye:

“Jume tan pon wawai ira xuepana susato tsurucuae nacuatha. Bapon wawai jeye: ‘Patsinajũntũ cui coyene wũnaere pon jiwĩ pia pepa Pecanamataxeinaeinchi pia pepatopae wũnaeya tsane.

⁵ Daxita pamarafotontha paatsa jehebapoinyama.

Daxita petsuton paatsa caxiquiyama. Pejeyajeyowa namton bopiya dubeinya paexande. Pamarafotofotowa namton, panamto dameyama. Aparajopa yabara janyo namton, jame apara yabara jan painya jũntũ coyenein. Ichi paichim xua namton paxanebame bara paichinde pana najũntũ cui wũnaere painya Nepacacanamataxeinaein nexa

poxonae bapon patopeicaena.

⁶ Daxita nacuapiwimonae yaputaena Nacom pia pecapanenebiyae coyene tatsi', jei pon wawai", jei Isaías pejume diwesitha.

⁷ Pin bicheito pata, xua Juan pebautisabinexa tsane. Juan barai barapomonae jeye: "¡Paxam pomonae pemuxitorobi jiwi pam! ¡Paxam be bara jomomonae pam, tsipei jomo ba cuitaya дѹсѹра nawa! Bara paichim anoxuae paichichipame Nacom pacuitaya дѹсѹрaме xua abe paca exanaeyainwa. Jopa papanenebiyaem tsane bequein bara paca bautisabinchi tsipei jopa pajuntũ coyene xanepanaem Nacomtha. ⁸ Xaniwaicha painompare xain ichamonae paca cui tane xua icha jũntũ coyene painya nexainaewa Nacomtha, pon jiwi Pecanamataxeinaein. Tsipei bequein paxam pajam: 'Waxainchi Abraham pia pemomoxi susato jiwichixaetsi Nacom naca capanenebiya exanaena', pajam, daichitha paxam jopa xaniwaicha pajume cowũntsim Nacom. Daxota Nacom itacũpatsi xua paca cui matawenta pia jopa paca nepaca capanenebiyaenexa tsane. Mataũtano barichino Nacom itacũpatsi xua jiwi forotsinchi barapo ibotixi weya, po ibotixi xote Jordán mene itapatha bobena. Barapo jiwi naexanaena, po jiwi yatsicaewa Abraham pia pemomoxi susato jiwi tatsi, pomonae pejume cowũntsixaetsi Nacom. ⁹ Poxonae pebin naein ũba, sipari ba canacui wũnaeta pecaucubobinexa po naein jopa nacoichiyo. Poxonae barapo naein ucuboba nantatsun eta xua petautsinexa isototha. Paxam bara paca jũta ichiya paca cana exanaena. Nacom paca yabara nacui wũnaeta xua paca bebai tsane isototha, ichaxota po isototha jopa cuinaya itacounayiyo tsipei Nacom jopa xanepanaya pata taexanaem", jei Juan.

¹⁰ Nexata barapomonae Juan yainyabatsi jeichichi:

—¿Eta pocotsiwa Nacom ichichipa pocotsiwa pata exanaenexa xua ichamonae pata necui taenexa tsane xua bara pajantũ coyene xanepanaein Nacomtha? jei barapomonae.

¹¹ Juan jume nota, jeye:

—Pon ainya camisabe xeina, bapon becatsipa pontha pon yatsicaewa jopa naũma xatatsiyo camisa. Irũrũ pon tamatecatsi penabanaewa bapon becatsipa ichũn pontha pon jopa xeinaeyo penabanaewa, jei Juan.

¹² Barichirũ pata, pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. Barapomonae pata xua Juan pebautisabinexa tsanerũ barapomonae. Barapomonae Juan yainyabatsi, jeichichi:

—Pon jiwi Necuidubim, ¿eta pocotsiwa Nacom ichichipa pocotsiwa pata exanaewa tsane? jei barapomonae.

¹³ Juan jume nota, jeye:

—Saya meisa jiwi pawũcaename paratixi xua romanomonae paca itoroba. Jopa yabara muxuitorobiya pawũcaeinde ichawan, jei Juan.

¹⁴ Barichirũ soldadomonae Juan yainyabatsi, jeichichi:

—Irũ paxan, ¿eta pocotsiwa Nacom ichichipa pocotsiwa pata exanaewa tsane? jei barapomonae.

Juan jume nota, jeye:

—Jopa payabara jume daunweya wecobe noteibinde ichamonae piawan tatsi. Mataũtano ichamonae jopa pacui yopiteibinde pocotsiwa exana ichamonae poxonae apara jopa exaneibiyo. Bara saya pajantũ coyene weiweinare poxonae paratixi paxeiname poxonae ichamonae xua pata exaname xua soldadomonae pamxaem, jei Juan.

¹⁵ Daxita pomonae wũnae ewateiba xua Mesías pepatopeicaewa tsane, barapomonae poxonae Juan

jume tainchi, barapomonaē pejuṅtu coyeneintha nanta xeina, xua apara Juan metha apara Mesíaswei. ¹⁶ Ichitha Juan barai daxita barapomonaē, jeye: “Xan paca bautisabatsi meratha. Ichitha nama patopaena pon bichocono ainya cui beyacaincha xan. Bapon pon pepa Pecanamataxeinaein jiwi. Xan saya tapawin. Daxota auran xua tataxu m̄ isanaxubiwa pia penataxu xatatsiwa. Bapon paca jiwana bautisabina Nacom pia Pejumope t̄nax̄tha tatsi. Bapon paca jiwana cui copatsinchi xua atene tsane Jesús pejume cow̄ntsixaetsi tsane. ¹⁷ Bapon pon patopaena bapon bayatha tsinacobenata po paparato xua trigo xu nexa. Bapon trigo xu tsanaya seicaya matapepe jejebapona. Trigo xu jejebapona, trigo xu mataboṭha. Matapepe jejebapona petautsinexa isototha, ichaxota po isoto jopa cuinaya itacounayiyo. Bara j̄ta cana ichi tsane jiwitha icha trigo xu cana ichiya ichichi jiwi Nacom tsananobina pomonaē pejume cow̄ntsixaetsi pia nacuatha nexa. Ichamonaē tsananobinchi pomonaē jopa pejume cow̄ntsiwichi, petautsinexa isototha ichaxota xua jopa itacounayiyo”, jei Juan.

¹⁸ Icha diwesi yabara jumeno Juan barapomonaetha paeba Nacom pia pexeinya jume diwesi tatsi. ¹⁹ Matautano Juan biatane, Herodes biatainchi pon Judea nacuapiwi pia peyanacua ewatsinchi poxoru Herodes peweicho caiba yab̄yo powa Herodías. Herodes peweicho tatsi pew̄n Felipe. Matautano Juan biatane poxoru bayatha Herodes abe exana nawita jiwitha. ²⁰ Ichitha dāmetha equeicha Herodes abe exana xua Juan caenaetatsi ichamonaetha xua pecaponaenexa tsainchi jiwi pec̄bi botha.

*Meje yabara poxonaē Jesús bautisabatsi
(Mt 3.13-17; Mr 1.9-11)*

²¹ Poxonae cataunxuae Juan jopa ecaeyo jiwi pecubi botha, Juan bautisaba ducuaeta jiwi. Barichi iru Jesús nabautisabatsi. Poxonae Jesús tsipaebuncua paxa, peitaboco nayausaranaxuba. ²² Nacom pia Pejumope t̄nax̄ tatsi patopeica Jesustha, be topiboto yaruneica. Jesús jume tane pocotsiwa peitaboco wetsipaebicatsi, jechichi:

—Xam apara Taxantom pom bichocono cantobetsi, pom caitapetatsi. Nejt̄nt̄ coyene weiweina exaname, jei Nacom.

*Meje yabara pomonae Jesús pia pamo susatopiwi tatsi
(Mt 1.1-17)*

²³ Poxonae Jesús treinta po weibe yapu jopa, bapoxonae nama tamropata pitaba barompaya pia pepa peexanae coyenewan po coyene Nacom Pejume Diwesi pecueicuei-jeiwa xuano jiwi axaibi exana ducuaenaebiyano. Jesús, José pexanto tatsi. Daxita jiwi nanta xeina xua mexeya itara José yatsicaewa pexantowei. José, Elí pexanto tatsi. ²⁴ Bapon Elí, Matat pexanto tatsi. Bapon Matat, Leví pexanto tatsi. Bapon Leví, Melqui pexanto tatsi. Bapon Melqui, Jana pexanto tatsi. Bapon Jana, José pexanto tatsi. ²⁵ Bapon José, Matatías pexanto tatsi. Bapon Matatías, Amós pexanto tatsi. Bapon Amós, Nahúm pexanto tatsi. Bapon Nahúm, Esli pexanto tatsi. Bapon Esli, Nagai pexanto tatsi. ²⁶ Bapon Nagai, Maat pexanto tatsi. Bapon Maat, Matatías pexanto tatsi. Bapon Matatías, Semei pexanto tatsi. Bapon Semei, Josec pexanto tatsi. Bapon Josec, Judá pexanto tatsi. ²⁷ Bapon Judá, Joanán pexanto tatsi. Bapon Joanán, Resa pexanto tatsi. Bapon Resa, Zorobabel pexanto tatsi. Bapon Zorobabel, Salatiel pexanto tatsi. Bapon Salatiel, Neri pexanto tatsi. ²⁸ Bapon Neri, Melqui pexanto tatsi. Bapon Melqui, Adi pexanto tatsi. Bapon Adi, Cosam pexanto tatsi. Bapon Cosam, Elmadam pexanto tatsi. Bapon Elmadam, Er pexanto

tatsi. ²⁹ Bapon Er, Josué pexanto tatsi. Bapon Josué Eliezer pexanto tatsi. Bapon Eliezer, Jorim pexanto tatsi. Bapon Jorim, Matat pexanto tatsi. ³⁰ Bapon Matat, Leví pexanto tatsi. Bapon Leví, Simeón pexanto tatsi. Bapon Simeón, Judá pexanto tatsi. Bapon Judá, José pexanto tatsi. Bapon José, Jonam pexanto tatsi. Bapon Jonam, Eliaquim pexanto tatsi. ³¹ Bapon Eliaquim, Melea pexanto tatsi. Bapon Melea, Mena pexanto tatsi. Bapon Mena, Matata pexanto tatsi. Bapon Matata, Natán pexanto tatsi. ³² Bapon Natán, David pexanto tatsi. Bapon David, Isaí pexanto tatsi. Bapon Isaí, Obed pexanto tatsi. Bapon Obed, Booz pexanto tatsi. Bapon Booz, Sala pexanto tatsi xua icha wun Salmón. Bapon Sala, Naasón pexanto tatsi. ³³ Bapon Naasón, Aminadab pexanto tatsi. Bapon Aminadab, Admin pexanto tatsi. Bapon Admin, Arni pexanto tatsi. Bapon Arni Esrom pexanto tatsi. Bapon Esrom, Fares pexanto tatsi. Bapon Fares, Judá pexanto tatsi. ³⁴ Bapon Judá, Jacob pexanto tatsi. Bapon Jacob, Isaac pexanto tatsi. Bapon Isaac, Abraham pexanto tatsi. Bapon Abraham, Taré pexanto tatsi. Bapon Taré, Nacor pexanto tatsi. ³⁵ Bapon Nacor, Serug pexanto tatsi. Bapon Serug, Ragau pexanto tatsi. Bapon Ragau, Peleg pexanto tatsi. Bapon Peleg, Heber pexanto tatsi. Bapon Heber, Sala pexanto tatsi. ³⁶ Bapon Sala, Cainán pexanto tatsi. Bapon Cainán, Arfaxad pexanto tatsi. Bapon Arfaxad, Sem pexanto tatsi. Bapon Sem, Noé pexanto tatsi. Bapon Noé, Lamec pexanto tatsi. ³⁷ Bapon Lamec, Matusalén pexanto tatsi. Bapon Matusalén, Enoc pexanto tatsi. Bapon Enoc, Jared pexanto tatsi. Bapon Jared, Mahalaleel pexanto tatsi. Bapon Mahalaleel, Cainán pexanto tatsi. ³⁸ Bapon Cainán, Enós pexanto tatsi. Bapon Enós, Set pexanto tatsi. Bapon Set, Adán pexanto tatsi. Bapon Adán, Nacom pexanto tatsi.

4

Meje yabara poxonaē Jesús jũntũ coyene jũjũtatsi caurimonae pia pentacaponaein tatsi xua Jesús abe coyeneya petaexanaenexa tsane

(Mt 4.1-11; Mr 1.12-13)

¹ Poxonaē Jesús jũntũ coyene yũcatsi Nacom pia Pejumope tũnaxũ tatsi bapoxonaē caibe nawiya Jordán mene weya. Nacom pia Pejumope tũnaxũ tatsi Jesús mata cayatsi ira xuepana susato tsurucuae nacua beya.

² Baraxotiya Jesús poƀona cuarenta po matacabibe. Caurimonae pia pentacaponaein tatsi Jesús piraichi jũntũ coyene jũjũtatsi xua Jesús abe coyeneya petaexanaenexa tsane. Barapo cuarenta po matacabibetha Jesús jopa nabanaeyo. Poxonaē barapo matacabin yapucaewa Jesús bichocono jainpa. ³ Caurimonae pia pentacaponaein tatsi, Jesús baraichi, jeichichi:

—Icha xam yatsicaya Nacom Pexantom, netsita itũre. Barapo iboto itorobare xain pan naexanaxoya, jei caurimonae pia pentacaponaein tatsi.

⁴ Jesús jume nota. Caurimonae pia pentacaponaein tatsi jume notatsi, jeye:

—Nacom Pejume Diwesitha namchi: ‘Jopa metha bepa meisa jiwi betiya una jinompaetsipae pan’, jei Nacom Pejume Diwesi, jei Jesús.

⁵ Caurimonae pia pentacaponaein tatsi Jesús mat-acapoinchi ichaxota po demxuwa bichocono atororo. Baraxotiya Jesús tsita itũtarabatsi daxita nacuan, xua barapo cae pin nacuathe. ⁶ Bapoxonaē caurimonae pia pentacaponaein tatsi Jesús baraichi, jeichichi:

—Daxita barapo nacuan cacatinchi jiwi neitorobinexa tsane. Mataũtano daxita cacatinchi nacuan pia pewũnaewan, tsipei bayatha necata daxita barapo nacuan xua taitorobeibiwa coyenewan. Tawaxae catsin

ichuntha pontha pon xua ichichipan xua tacatsiwa.
⁷ Ichaunxuae nentabocototha uncuaename taitabaratha, xuano ichaunxuae newuna jainchiname xua nenanta xeinaewaxae xua xan jinya tacacanamataxeinaeinchi, bapoxonae baxuan daxita bara cacatsinchi jinya Necanamataxeinaenexa barapo nacuan, jei caurimonae pia pentacaponaein tatsi.

⁸ Ichitha Jesús jume nota, jeye:

—Yaitama Nacom Pejume Diwesitha namchi, jeye: ‘Meisa wuna jainde jinya Necanamataxeinaein Nacom. Meisa bapon yatsicaewa taexande pocotsiwa caitoroba’, jei Nacom Pejume Diwesitha, jei Jesús.

⁹ Cotacaya nama equeicha Jesús matabapoinchi Jerusalén tomara beya, Nacom pin pia botha pentatupa beicha capoinchi. Jesús baraichi, jeichichi:

—Icha bara xaniwaicha Nacom Pexanto tatsim, wenaxoreinque. ¹⁰ Nacom Pejume Diwesitha namchi, jeye: ‘Nacom itorobina pia matatsunpiwi necayanabinexa.

¹¹ Barapo matatsunpiwi asiya cawaetaboutsina pecobetha, xua jopa necataxu tsaquituncuaenexa tsane ibototha poxonae wenaxorecame’, jei Nacom Pejume Diwesitha, jei caurimonae pia pentacaponaein tatsi.

¹² Jesús jume nota, jeye:

—Barichi Nacom Pejume Diwesitha namchi, jeye: ‘Jopa juntu coyene jujatsiya wucainde Nacom pon jinya Necanamataxeinaein, xua cajume jejei tsane necayawenaenexa poxonae jopa xapain exanaem’, jei Nacom Pejume Diwesitha, jei Jesús.

¹³ Poxonae caurimonae pia pentacaponaein tatsi yauptane xua jopa xeinaeyo po coyenetha equeicha Jesús pejuntu coyene jujatsiwa tsainchi, bapoxonae nama Jesús wepu poinchiba xua saya bara caeto nexa.

Meje yabara poxonae Jesús tamropata pitaba pia penacuichiwa Galilea nacuatha
(Mt 4.12-17; Mr 1.14-15)

¹⁴ Jesús caibe iya Galilea nacua beya. Matautano jopa juniya xeinaeyo Nacom pia Pejumope tñaxu tatsi pia peayapusu itorobi coyenewa tatsi. Daxita jiwi pomonae jinompa barapo nacuatha Jesús yabara paebinoutatsi.

¹⁵ Jesús cuidubeiba barapomonae judiomonae pia penacuetusi bontha tatsi xua daxita tomarantha. Barapomonae Jesús wñae jainteibatsi.

Meje yabara poxonae Jesús Nazaret tomaratha popona
(Mt 13.53-58; Mr 6.1-6)

¹⁶ Nexata Jesús Nazaret tomara beya pona, po tomaratha ichaxota wichaba. Judiomonae barompaya pia pentaquei seicae matabitha tatsi Jesús joniya judiomonae pia penacuetusi botha tatsi tsipei pia cui xeina xua peponebiwa barapocotsi botha. Jesús xenta iya barapomonae peuncuaenexa peitabaratha, peyobinexa Nacom Pejume Diwesi, xua barapomonae pejume taenexa. ¹⁷ Nexata Jesús catatsi Isaías pejume diwesi, pon Nacom peitorobi jume pepaebin, pon caena bayatha tupa. Poxonae Jesús diboro pataxuba baxota taeba pocotsiwa baxota paeba, xua jeye:

¹⁸ “Nacom pia Pejumope tñaxu tatsi neyanta popona.

Nacom neitapeta tatabueicueijeinexa tsane pia pexeinya jume diwesi tatsi pomonaetha pomonae peacopeibi jiwi.

Matautano neitoroba xua tayawenaenexa pomonae anthutane.

Matautano neitorobano xua tayawenaenexa pomonae caurimonae itorobatsi nawita xua barapomonae pepanenebiyaenexa.

Matautano neitorobano xua tane tacana
 exanaenexa pomonae peitata nacutsi jiwi.
 Matautano neitorobano xua tayawenaenexa
 pomonae xua bichocono taayapubetsi xua
 pejinompaewa tsane xua barapomonae jopa pexeinae
 dubenanaebiyaenexa tsane barapo coyenein.

¹⁹ Matautano neitorobano xua jiwi
 tatsipaebinexa po coyene xua Nacom nacui
 wunaeta xua jiwi peyawenaewa tsainchi
 pomonae ichichipa xua Nacom pejume taewatsi”,
 jei Isaías pejume diwesitha, jei Jesús xua yoroba.

²⁰ Poxonae Jesús barapo diboro acataraba, bapoxonae
 cata pontha pon jiwi peyawenequeibin judiomonae pia
 penacaetsi botha tatsi. Bapoxonae Jesús econeca.
 Daxita pomonae baxota ena, Jesús necotenatsi xua cui
 ewatenatsi xua pecueicueijejiwa tsane Jesús. ²¹ Bapoxonae
 Jesús tamropata pitaba xua paeba, jeye:

—Anoxuae xuaunxuae pajume taneme baxua apara
 barapo mataqueithe Nacom nayabara jume cui weta
 painya itutha, jei Jesús.

²² Daxita carepaya jiwi Jesús xanepanaya yabara pae-
 batsi. Daxita barapomonae najuntũ coyene cabenaeca
 xua pejume taexae xua po jume barapomonae petsipae-
 bixaetsi. Barapomonae nantiya nabarai, jeye:

—Maisa jume xeica bapon, jume wunaeya paeba. ¿Bara
 bapon José pexanto tatsi jampa? najei barapomonae.

²³ Jesús barai barapomonae, jeye:

—Metha pana netsipaebichipame icha be pocotsi diwe-
 siyo iche xua pecayabara jũta pepaebi diwesiyo xua ba
 jei: ‘Pon jiwi neyawubin, jinya coutha nayawubare’, xua
 ba jei. Barichi anoxuae pana nejam tsane: ‘Xua paxan
 pajume tan xua juinya Capernaum tomaratha exaname,

barichinde xote exande jinya tomaratha', pana nejam tsane, jei Jesús.

²⁴ Awiya cataunxuae Jesús cueicueijei. Equeicha namchi, jeye:

—Xaniwaicha paca tsipaebatsi pon ba Nacom peitorobi jume pepaebin pia nacuamonaepiwi ba aitaftabichi.

²⁵ Xaniyan paca baraichi xua caena bayatha poxonae Elías popona pon Nacom peitorobi jume pepaebin, ainyawaxi powaxi pecuenta werapaewaxichi pia seuriwi Israel nacuatha jinompa. Barapo nacuatha cuinaya jopa duneicaeyo acoibi po weiyobe xuano seis po xometiyobethano. Daxita jiwi piyain barapo nacuatha Israel nacuatha.

²⁶ Nacom jopa itorobiyo, Elías jopa itorobichi xua peyawenaenexa tsane caewayo jiwana powaxi pecuenta werapaewaxichi pia seuriwi xua Israel nacuatha. Ichitha saya meisa Nacom itoroba, Elías itorobatsi powatha powa pecuenta tupaewayotsi piseuri, powa popona Sarepta tomaratha, xua Sidón nacuatha xua barapowayo peyawenaenexatsi. ²⁷ Barichi Israel nacuatha pinmonae jinompa pomonae peperu sawatsi jiwimonae, poxonae Eliseo popona pon Nacom peitorobi jume pepaebin. Eliseo jopa jiwana axaibi exanaeyo. Ichitha meisa Eliseo Naamán axaibi exanatsi pon bichocono peperu sawinchi. Bapon Naamán, Siria nacuapin, jei Jesús.

²⁸ Poxonae barapomonae jume tane pocotsiwa Jesús paeba pomonae judiomonae pia penacaetutsi botha ena, bapoxonae barapomonae Jesús casebatsi. ²⁹ Asiya ume narucupa barapomonae. Jesús tomara peuma beitaweyatsi. Jesús capoinchi pitapatororo itapa beya, po tsututha bomuxun jeba, xua bara wepexorecaenexa tsainchi Jesús.

³⁰ Ichitha Jesús barapomonae xenta iya, pu seicataba.

*Meje yabara poxonae pebin pon cauri xeina
(Mr 1.21-28)*

³¹ Nexata Jesús pona Capernaum tomara beya po tomara eca Galilea nacuatha. Baxotiya Jesús cuiduba jiwi po mataqueitha pentaquei seicae matabitha.

³² Barapomonaē yabara najuntū coyene cabenaeca tsipei pocotsiwa bapon barapomonaē cuidubatsi be pon peyaputaēin pia peyapusū itorobi jume coyeneya tatsi paeba.

³³ Judiomonaē pia penacaetutsi botha tatsi pebin baxota eca, pon cauri xeina. Bapon bichocono wawaya exanatsi cauri. Bapon Jesús baraichi xua namtsebiya wawai, jeye:

³⁴ —¡Jesús Nazaret tomarapim, warapare pata xainya weya! ¿Eta xua metha patopame pata xantha xua jinya apara abe pata neexanaetsim? ¿Apara patopame jinya pana nejutebicham? Paca yaputainchi yawa paca yaitainchi. Xam apara pon Nacom caitoroba, pon pepa Nentacuiruyapuxanepanaem, jei cauri.

³⁵ Jesús itaweta cauri, jeye:

—¡Moyande! ¡Bapon wepu pondel! jei Jesús.

Nexata cauri pebin iratha xotsi barapomonaē peitutha tatsi. Pebin wepu poinchi cauri, saya jüntema. Equeicha jopa ateneyono. ³⁶ Daxita barapomonaē yabara najuntū coyene cabenaeca, nayainyaba namchi:

—¿Eta po jumera xua bapon paeba? Jamaisa barapo pebin itaweta caurimonaē pia peyapusūya itorobi coyenewatha. Mataütano barapo caurimonaē bara pona.

³⁷ Daxita jiwi paēbinouta Capernaum tomara cuariy-atha pocotsiwa Jesús exana.

Meje yabara poxonaē Jesús axaibi exana Simón Pedro pamiyo tatsi

(Mt 8.14-15; Mr 1.29-31)

³⁸ Bapoxonaē Jesús judiomonaē pia penacaetutsi bo tatsi wejoniya. Jesús joniya Simón pia botha tatsi. Simón

pamiyo tatsi atene, domaebatsi. Barapowa piamonae tatsi Jesús jume daunweya wɔcatsi xua bapowa axaibi peexanaenexa tsainchi. ³⁹ Jesús imoxoyo caquita uncuua pentasipatha. Jesús domaetha namchi, jeye:

—Barapowatha jopa bayatha yacacaewiyande, jei Jesús.

Domae aichurucuae. Nainya barapowa nantacotaxuba. Bapoxonae bapowa pexaewa apata barapomonaetha.

*Meje yabara poxonae Jesús axaibi exana pin bicheitomonae
(Mt 8.16-17; Mr 1.32-34)*

⁴⁰ Poxonae tabopiya tsanaicha pomonae piamonae barompaya taatenetsi pomonae xua jopa nayaromae jɔpaeyo, daxita barapomonae Jesús betacarendenatsi. Jesús ichawa beya jayabapona pecobetha, bapoxonae daxita carepaya axaibi. ⁴¹ Barichi pomonae cauri pex-einaewi Jesús taitaweta barapomonae. Barapo caurimonae wawaya jeye:

—Apara xam Nacom Pexantom, jei.

Bequein caurimonae baxua paeba ichitha Jesús awiya daumetha itaweta caurimonae. Jesús jopa najume copatsiyo xua equeicha pepaebiwa tsane poxoru barapo caurimonae yaputane xua bapon yatsicaewa Mesías pon Nacom itorobica.

*Meje yabara poxonae Jesús cueicueijeji Nacom Pejume Di-
wesi judiomonae pia penacaetutsi bontha tatsi*

(Mr 1.35-39)

⁴² Poxonae baya juntucuru pentha tsina, Jesús tomara weiya ichaxota jiwaibi bara beya pona. Ichitha jiwa Jesús jeitatsi. Barapoxonae bapomonae pata ichaxota Jesús poɔpona. Barapomonae aichaxaibi xua Jesús pewepu warapaewa barapomonae. ⁴³ Ichitha Jesús namchi, jeye:

—Bewa irɔ yabara paebin Nacom pia pexeinya jume diwesi tatsi, po diwesi yabara xua Nacom waba jiwa petanaexanaenexatsi piamonae pomonae Nacom jɔntɔ

coyene itorobiya ewata. Apará baxua netsiyabara itorobica, jei Jesús.

⁴⁴ Daxota Jesús paeba ducuaeta Nacom Pejume Diwesi Judea nacuatha xua judiomonae pia penacaetutsi bontha tatsi.

5

Meje yabara poxonae Jesús piamonae yawena xua duwei yamona

(Mt 4.18-22; Mr 1.16-20)

¹ Caentacabi Jesús Genesaret pucua itapatha uncua. Pin bicheito pata bichocono nacucunaxuba Jesththa, tsipei barapomonae ichichipa jume tane Nacom Pejume Diwesi tatsi. ² Jesús ainya jerabe tane pucuatha taetabo itapatha, po jera saya naebe. Tsipei duwei peyamaewi bayatha nacui wetarucupa, matautano poxoru bayatha nonobouna taetabotha. Barapomonae pia peyamaewan iquicompá. ³ Nexata Jesús jeratha nontabiya Simón pia naetha tatsi. Jesús Simón baraichi:

—Tsiwiyo neyana torotaxoyam, jei Jesús.

Bapoxonae Jesús eca jeratha. Jesús mene wecuidubecarena jiwí Nacom Pejume Diwesi. ⁴ Poxonae Jesús najume weta, Simón baraichi, jeye:

—Jeratha ponde ichaxota pentatheibũ. Paxoyama painya neyacamaewa painya necapirenaenexa duwei, jei Jesús.

⁵ Simón, Jesús jume notatsi, jeye:

—Pon jiwí Necuidubim, bequein barapo merawithe payamonompan, pacobesa patan. Yaitama aunxuae neitorobame, methaunxuae xoyaein tayamaewa, jei Simón.

⁶ Poxonae barapomonae xoya, duwei pin tunto capirena, muxu peucubabi xua peyamaewa. ⁷ Nexata

barapomonae moya pecobetha itacowaeba pomonae penabarũ yaxunobompaexae, pomonae icha jeratha jinompa itacowaebatsi, penayawenaenexa. Barapomonae pata. Jera ainya naebe wãntabe duwei. Muxu pebunopaebe jerabe. ⁸ Simón pon Jesús icha wãn duta, xua Pedro baraichi, bapon tane baxua. Bapoxonae bapon Jesús peitabaratha tauncuatsi pentabocotha. Simón, Jesús baraichi, jeye:

—Tanecanamataxeinaein, newepu ponare, tsipei xan abe taexanaein, jei Simón Pedro.

⁹ Poxoru Simón Pedro junuwiya najũntũ coyene cabenaeca yaitama peyacomonaewatha capirena duwei pin tunto. Irũ pomonae Simón Pedro pia jeratha petaenaewichi barapomonae irũ junuwiya najũntũ coyene cabenaeca. ¹⁰ Irũ Zebedeo pexantobe tatsi, Santiago irũ Juan baponbe irũ junuwiya najũntũ coyene cabenaecabe. Baponbe ponbe Simón pebarũ yamonaeinbe tatsibe. Ichitha Jesús Simón baraichi, jeichichi:

—Simón, jopa junuwinde, anoxuae caexanaeinchi xua pinmonae yawenaename xua barapomonae pejume cowãntsiwa tsane Nacom icha bayatha ichim poxonae yamoname duwei nawita, jei Jesús.

¹¹ Nexata poxonae barapo jerabe botounabe, barapoxonae barapomonae baxuan daxita nacui barapenta. Bapoxonae barapomonae Jesús puna poinchi.

Meje yabara poxonae Jesús axaibi exana pon peperũ sawinchi

(Mt 8.1-4; Mr 1.40-45)

¹² Jesús icha tomara siwa pona. Bapoxonae pebin patopa pon peperũ sawinchi. Poxonae Jesús taebatsi, bapon Jesús peitabaratha tatsi pentabocotha tauncuatsi

yawa ira betaeuncuareca. Bapon Jesús jume daunweya wɛcɛtsi, jeichichi:

—Pon Necanamataxeinaem jiwi, icha bara ichichipame bara caitacɔpa xua axaibi tana neexanaewam, tsipei jinya neayapusɔ itorobi coyenewa nexainaem, jeichichi Jesús bapon.

¹³ Nexata Jesús, nacobe yota, yawa mata jayaba bapon, pon peperɔ sawinchi. Jesús barai, jeye:

—Bara ichichipan. ¡Bara axaibinde! ¡Bara caaperɔxaibi exanatsi! jei Jesús.

Bapoxonae bapon nainya taaichurucaetsi xua peperɔ sawiwatsi. ¹⁴ Nexata Jesús barai bapon, jeye:

—Jopa yabara tsipaebinde ichamonaetha xua neaxaibiwam. Saya jame meisa ponde sacerdotemonaepintha xua nenaitutsinexa xua bapon necataenexa xua bayatha nejumewa. Bapontha care pocotsiwa xua pecatsiwa Nacomtha, pocotsiwa xua bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita itapeinya xeinatsi xua xam bara jumem yawa xua perɔ wɛnaem, jei Jesús.

¹⁵ Ichitha daxita jiwi taju beya jume taetaepona pocotsiwa Jesús exana. Pin bicheiton nacaetutapona Jesustha pejume taenexa tsane pocotsiwa Jesús exana. Mataɔtano nacaetutapona xua Jesús peaxaibi exanaenexa barapomonae. ¹⁶ Ichitha Jesús ichaxota jiwaibi bara beya poneiba compa. Baxotiya Paxatha tsipaebeiba.

Meje yabara poxonae Jesús axaibi exana pon pecuenobinchi (Mt 9.1-8; Mr 2.1-12)

¹⁷ Caentacabi Jesús cuidubauya. Irɔrɔ baxotiya ena pomonae fariseomonae jiwana tatsi. Irɔ baxota ena pomonae jiwi pecuidubiwi Moisés pia peitorobi coyenewa tatsi. Barapomonae daxita tsiqui tomaraxi werendena

po tomaraxi ena Galilea nacuatha. Iru daxita tsiqui tomaraxi werendena po tomaraxi ena Judea nacuatha, iru ichamonae Jerusalén tomara werendena. Nacom pia peayapusu itorobi coyenewa tatsi Jesús yawenatsi, daxota axaibi exana peatene jiwi. ¹⁸ Nexata pebiwi pata. Barapo pebiwi carendena pon pecuenobinchi. Xua xota pocotsiwatha maiteiba, barapomonae barapocotsiwatha carendenatsi pecuenobinchi. Barapomonae bepa bomuxutha cajojoniya ei xua bepa Jesús peitabaratha tabotichei. ¹⁹ Ichitha barapomonae jopa cajojoniyaeyo bomuxutha tsipei pin bicheito boupa quecona. Barapo bo matatupa pereca. Nexata daxota barapo bo matatupa beenoinya. Barapomonae barapo penta tupa weatsa caxina xoreca. Nexata barapomonae nantiya opi quetabe bamacatha barapo pemaiteibiwatha. Bapoxonae bara weyawa yorecatsi barapo pecuenobinchi jiwi pexainya deca tatsi, Jesús peitabarayo decano tatsi. ²⁰ Jesús tane xua barapomonae yabara cui jume cowanta xua Jesús bara peitacupaewatsi xua axaibi peexanaewatsi pon pecuenobinchi. Daxota Jesús barai pecuenobinchi, jeye:

—Tajiton cayabara cui junte mainatsiba abe jinya neexanae cuiru coyenein, jei Jesús.

²¹ Nexata pomonae jiwi pecuidubiwi Moisés pia peitorobi coyene, iru fariseomonae, daxita barapomonae caemonae natsipaeba, najei: “Maisa bapon bichocono abe tsipei pocotsiwa bapon paeba bichocono Nacom tsita ajumebetsi. Jiton dapocotsin aibi pon xua jiwi cacui yabara junte mainaya juntu puxana exanatsi abe pia peexanae cuiru coyenein tatsi. Jame meisa apara caein Nacom yaputane xua jiwi cacui yabara junte mainaya juntu puxana exanatsi abe pia peexanae cuiru coyenein tatsi”, najei barapomonae.

²² Ichitha Jesús yaputane xua barapomonae caemonae

natsipaeba. Jesús barai barapomonaē, jeye:

—¿Eta pocotsiwa metha baxua pana natsipaebame?
²³ ¿Eta po jumetha baran tsane pecuenobinchin? ¿Metha
 jan tsane: ‘Abe jinya neexanae cuiru coyenein cata jũn-
 temainatsi’, jan tsane? Ichacuitha ¿metha jan tsane:
 ‘Asiya uncuatabare yawa ponare’, jan tsane? ²⁴ Daxota
 aunxuae paca tsita itapeinya xeinaeinchi xua xan ponx-
 aein Nacom Tananeitapetsin, xua xeinan taayapusũ
 itorobi coyenewa xua bara tana neitacũpaewa xua jiwi
 tayabara cacui jũntemainaya jũntũ puxana exanaewa
 abe pia peexanae cuiru coyenein tatsi pomonaē jinompa
 barapo cae pin nacuathe, jei Jesús.

Bara nexata pecuenobinchi Jesús barai, jeye:

—Catsipaebatsi, nontaponde. Jinya nemaituncuaewa
 pire. Jinya bo be-iyandeno, jei Jesús.

²⁵ Bapoxonaē pon pecuenobinchi caena nainya non-
 tapona barapomonaē peitũtha tatsi, yawa pita xua pe-
 maituncuaewa. Pia bo be-iya yawa Nacom wũnaē jain-
 tatsi poxonaē namtotha ecapona. ²⁶ Barapomonaē daxita
 yabara najũntũ coyene cabenaeca yawa Nacom wũnaē
 jaintatsi. Barapomonaē junuwiya namchiya jeye:

—Anoxuae waxainchi tainchi xua pewũnaewa pocot-
 siwa jopa yaputaetsi, jei barapomonaē.

*Meje yabara poxonaē Leví wabatsi, Jesús waba
 (Mt 9.9-13; Mr 2.13-17)*

²⁷ Poxonaē baxua Jesús nacui weta, bapoxonaē Jesús
 pontaba. Jesús tane pebin pon pewũn Leví. Leví bapon
 pon paratixi pentoma noteibin po paratixi jiwi bewa cat-
 sibina pon romanomonaē pia pepa peyanacua ewatsinchi
 nexa. Bapon eca ichaxota paratixi matoma noteibeca.
 Jesús Leví baraichi, jeichichi:

—Nepuna ponde, jei Jesús.

²⁸ Bapoxonae Leví nontapona. Daxita baxua xubota, cuenta pona. Bapoxonae Jesús puna poinchi.

²⁹ Pirapaeyo Leví pin penabanaewa exana pia botha xua Jesús tsiexanatsi. Irũ pebiwi pinmonae pomonae paratixi pentoma noteibiwi po paratixi jiwi bewa catsibina pon romanomonae pia pepa peyanacua ewatsinchi nexa, barapomonae Jesús barũ eca pexaethopeibiwatha, irũ ichamonaeno barũ enatsi penabarũ nabanaenexa tsane. ³⁰ Ichitha fariseomonae irũ pomonae jiwi pecuidubiwi Moisés pia peitorobi coyenewa, daxita barapomonae Jesús pijimonae abeya tsipaebatsi xua Jesús yabara. Barapomonae namchi, Jesús pijimonae tatsi baraichi, jeichichi:

—Maisa Jesús abe exana poxoru barũ xayeca pomonae paratixi pentoma noteibiwi po paratixi jiwi bewa catsibina pon romanomonae pia pepa peyanacua ewatsinchi nexa. Matautano barũ xayeca pomonae abe peexanae cuiru coyene peexanaewi, jeichichi Jesús pijimonae tatsi barapomonae.

³¹ Jesús jume nota barapomonae, jeye:

—Pomonae ba xua xaniwaicha jinompa xua jopa ateneyo barapomonae ba jopa canantawenonaeyo pon jiwi peyawubin. Saya jame meisa pomonae ba atene canantawenona pon jiwi peyawubin. ³² Barichinno xan patopan apara tha jopa tawabinexa tsane pomonae pejuntũ coyene xanepanae jiwi. Apara tha meisa tawabinexa tsane pomonae peajuntũcoyenebe jiwi, xua barapomonae icha juntũ coyene pexeinaenexa tsane Nacomtha, jei Jesús.

Meje yabara poxonae Jesús yabara yainyabatsi po coyene xua Nacom peyabara nainbotsiwatsi

(Mt 9.14-17; Mr 2.18-22)

³³ Nexata barapomonae fariseomonae iru pomonae jiwi pecuidubiwi Moisés pia peitorobi coyene, daxita barapomonae Jesús yainyabatsi, jeichichi:

—Pomonae Juan pia pepuna jinompaewichi jopa juniya nainboteibiyo xua jopa juniya tsipaebeibiyo Nacomtha. Iru pomonae fariseomonae barichiru. Ichitha nama jinyamonae daxua jopa cou daichiyo, saya cou u penabaneibi xuano saya u peapeibi cou, jeichichi Jesús.

³⁴ Jesús jume nota barapomonae, jeye:

—Paxam jopa bewa paexanaem tsane xua ichamonae nainbotsina, pomonae patsiwabame pexaewa xua penabanaenexa xua poxonae pebin pecotsiwa pita. Poxonae cataunxuae awiya bapon eca poxonae jiwi nabane, jopa ba bapoxonae nainbotsi. ³⁵ Ichitha icha pon aena piowa pita, bapon caena nainya waetabatsi, ichamonae waetaba xua bapon taju pecaponaenexatsi, bapoxonae jame jiwi ba bewa wecoyeya yabara nainbotsi, xua equeicha bapon caewa pepatopaewa tsane, jei Jesús.

³⁶ Matautano Jesús pecayabara juta pepaebi diwesiyo tsipaeba barapomonae, jeye:

—Jiwi ba jopa exanaeyo xua pena dorouto tsiwiyo jiwana caxinaxubeta xua peru dorouto pewan botsinexa. Icha baxua exanaetsipa xua pena paparuwatha wan bota peru dorouto, bapoxonae barapo dorouto abe tsanaya. Tsipei poxonae barapo dorouto matanaxuba barapo pena paparuwa natsaquetabiya. Poxonae barapo pena paparuwa natsaquetabiya equeicha wan tsitsipanarena barapo dorouto. Bapoxonae equeicha pin wan tsanaya beyacaincha xua poxonae copiya. ³⁷ Matautano jiwi ba pena vino mera jopa eparecaeyo peru bocoto, tsipei icha baxua exanaetsipa, barapo pena vino mera abe exanaetsipa barapo bocoto tsipei barapo bocoto jopa nayeyetaponaeyo poxonae barapo vino mera atsaxa.

Barapo pena vino mera naxuba xuano barapo bocotono naxuba poxonae barapo bocoto tsitsica. ³⁸ Daxota bewa jame pena vino mera eparecae pena bocototha. Bapoxonae pena vino mera jopa naxubiyo, xuano pena bocoto jopa nacubiyo poxoru boco yeyena xuano poxoru pena bocoto. ³⁹ Pon ba xua peru vino mera apa pirapaeyo jopa ichipaeyo pena vino mera. Bapon jei: ‘Maisa peru vino mera xeica, beyacaincha pena vino mera’, jei.

6

Meje yabara poxonae Jesús pijimonaе tatsi yaboto nota trigo xu judiomonaе barompaya pia pentaquei seicae mataqueitha tatsi

(Mt 12.1-8; Mr 2.23-28)

¹ Caentacabitha judiomonaе barompaya pia pentaquei seicae matabitha tatsi Jesús pijimonaе baru iya pabi iyiya. Jesús pijimonaе tatsi xunumenapona trigo xu, bapoxonaе barapomonaе pecobetha xu mata pepeta yawa xu xane. ² Nexata Jesús pijimonaе tatsi tayainyabatsi, fariseomonaе yainyaba, jeye:

—¿Eta pocotsiwa baxua paexaname? Apará jiwi jopa yabara cui copatsiyo xua ichamonaе penacuichiwa barapo matabithe, xua judiomonaе barompaya pia pentaquei seicae matabi tatsi, jei barapomonaе.

³ Jesús jume nota barapomonaе, jeye:

—Barapo tajimonaе jopa apará abe exanaeyo. ¿Jopa payabara yorobim pocotsiwa bayatha David exana poxonaе jainpa poxonaе iru pijimonaе tajainpatsiru? Bapon David pon caena bayatha Israel nacuamonaе itorobiya pia pepa peewatsinchi. ⁴ Bapon David iru pijimonaе tatsi barapomonaе Nacom pin pia botha jojoniya. David xane pan, po pan ichamonaе cana exana xua Nacomtha pecatsiwatsi. Iru barapo pan David pijimonaе cata xua

pexaenexarꝛ. Barapomonaē xane bequein barapo Nacom pia peitorobi coyenewatha copata xua saya meisa sacerdotemonaē itacꝛpatsi xua pexaewa barapo pan.

⁵ Jesús namchi, jeye:

—Xan ponxaein Nacom Tananeitapetsin taitorobi coyenewa xeinan xua jiwi tacoya taitorobiwa pentaquei seicaē matabitha, jei Jesús fariseomonaetha.

Meje yabara poxonaē Jesús cobe wꝛnaē exana pon pecobe mꝛbinchi

(Mt 12.9-14; Mr 3.1-6)

⁶ Icha matabitha judiomonaē pia pentaquei seicaē matabitha tatsi Jesús joniya judiomonaē pia penacae-tutsi botha tatsi. Matautano tamropata pitaba xua cuiduba barapomonaē. Barapo botha eca pon pecoxa weya pecobe mꝛbinchi. ⁷ Pomonaē jiwi pecuidubiwi Moisés pia peitorobi coyene tatsi, irꝛ fariseomonaē baxota ena. Daxita barapomonaē Jesús necotenatsi pecui taenexatsi icha bara metha Jesús cobe wꝛnaē exanaena pentaquei seicaē mataqueitha pon pecobe mꝛbinchi. Icha Jesús pon pecobe mꝛbinchi axaibi exanatsi, bapoxonaē barapomonaē xeinaena po coyenewa xua Jesús abe peyabara paebiwatsi tsainchi. ⁸ Ichitha Jesús yaputane pocotsiwa barapomonaē nanta xeina. Jesús barai pontha pon pecobe mꝛbinchi, jeye:

—Nontaponde, uncuare xote, jei Jesús.

Bapon nontapona, asiya uncua Jesús peitabaratha tatsi.

⁹ Nexata Jesús barai ichamonaē, jeye:

—Paca yainyabinchi, ¿eta xua copata pentaquei seicaē matabitha? ¿Wꝛnaē jampa? ¿Abe jampa? ¿Eta xua, xua exana jane? ¿Xua pebin capanepatsi jampa? ¿Xua pebin bexotsi jampa? ¿Eta xua jane? jei Jesús.

¹⁰ Nexata Jesús naita muxunene cauncuapona, tane pomonae pematawacaicha enaewichi. Jesús barai pon pecobe m̄binchi, jeye:

—Nacobe doire, jei Jesús.

Bapon nacobe doita. Nainya cobe w̄nae tsanaya.
¹¹ Ichitha barapomonae bichocono Jesús casebaruc̄patsi. Barapomonae caemonae natsipaeba najei:

—¿Etabe cui yabara ichainchi Jesús? jei barapomonae fariseomonae.

Meje yabara poxonae Jesús itapetsiya waba pia peitorobiwi tatsi pomonae xua doce poyobe

(Mt 10.1-4; Mr 3.13-19)

¹² Barapo matabintha Jesús pona demxuwatha petsipaebinxaxa Paxa. Baraxotiya Jesús Paxa matowa tsipaeba barapo merawitha. ¹³ Poxonae baya xometo pentha tsina bapoxonae Jesús pijimonae waba. Barapomonae jiwana itapetsiya waba doce poyobe, pomonae baraichi xua jeye: “Jesús pia peitorobi jiwitatsi”, yabara jeichichi. ¹⁴ Meje barapo doce poyobe pomonae Jesús pia peitorobiwi tatsi. Meje barapomonae: Simón, pon icha w̄n “Pedro”, baraichi, ir̄u ich̄n pew̄n Andrés, pon Simón peweicho tatsi, ir̄u ich̄n pew̄n Santiago, ir̄u ich̄n pew̄n Juan, ir̄u ich̄n pew̄n Felipe, ir̄u ich̄n pew̄n Bartolomé.

¹⁵ Ir̄u ich̄n pew̄n Mateo, ir̄u ich̄n pew̄n Tomás, ir̄u ich̄n pew̄n Santiago, pon Alfeo pexanto tatsi, ir̄u ich̄n pew̄n Simón, pon celotemonaepin. ¹⁶ Ir̄u ich̄n pew̄n Judas, pon Santiago pexanto tatsi, ir̄u ich̄n pew̄n Judas Iscariote, pon Jesús caenaetaxubatsi ichamonaetha xua Jesús pebexubinexatsi.

Meje yabara poxonae Jesús pin bicheitomonae cuiduba

(Mt 4.23-25)

¹⁷ Barapo doce poyobe Jesús demxuwa webarũ dunareca, peira matafatanaewatha barũ patopa. Baxota peira matafatanaewatha pin bicheito Jesús ewatumeinchi. Ichamonae pomonae Jesús pejume cowũntsiwichi baxota umena. Iru Jerusalén tomarapiwi pata xua Judea nacuapiwi. Barichi Tiro tomarapiwi, Sidón tomarapiwino pata. Barapo tomarabe mar mene itapatha ecabe. Daxita barapo pin bicheito pata xua Jesús pejume taenexatsi xua cueicueijeji xuano xua Jesús pia axaibi exanaetsi peatene jiwi. ¹⁸ Pomonae cauri pexeinaewi barapomonae Jesús taitaweta cauri. ¹⁹ Daxita jiwi ichichipa xua Jesús pejayabiwatsi tsipei Jesús daxita jiwi axaibi exana pia peayapuswatha.

Meje yabara poxonae Jesús yabara cuiduba pejũntũ coyene weiweinaewa, xuano jopa pejũntũ coyene weiweinaewa

(Mt 5.1-12)

²⁰ Nexata Jesús pijimonae necota. Jesús barai pijimonae, jeye:

“Pajũntũ coyene weiweiname bequein anoxuae peacopeibi jiwi pam. Tsipei Nacom pia pejume cowũntsiwichi tatsi piamonae tatsi pam, pomonae Nacom jũntũ coyene itorobiya ewata.

²¹ “Pajũntũ coyene weiweiname, bequein bara anoxuae pajainpame, bexa tsane patonsanaename.

“Pajũntũ coyene weiweiname, bequein bara anoxuae pawecoyam, bexa tsane bichocono pajũntũ coyene weiweinaename.

²² “Pajũntũ coyene weiweiname poxonae bequein jiwi paca ita aenae-aenei, bequein paca itaweta bo weya xuano poxonae bequein abeya paca muxutainyaba. Matautano poxonae bequein jiwi paca yabara abe paeba. Barapomonae baxua paca cana exana tamonae jiwi pamxaem xua xan ponxaein Nacom Tananeitapetsin. ²³ Bichocono

pajuntũ coyene weiweinare barapo matabitha, tsipei peitabocothicha Nacom paca catsibina pia pexeinya peitupanaewan pocotsiwan Nacom paca jantana jeba pia nacuatheicha. Icha barapomonaē paca ichi, barapomonaē pia pamo susato jiwi tatsi, Nacom pia peitorobi jume pepaebiwi barichichi abeya biatainchi yawa abe exanatsi.

²⁴ “¡Ichitha pai jaibo paxam, anoxuae copei paacabem tsobenaem poxoru methaunxuae equeicha jopa painya neraichiwa tsane!

²⁵ “¡Pai jaibo, paxam pomonaē anoxuae patonsan-abename tsipei methaunxuae bexa tsane pajainpabenaē-name!

“¡Pai jaibo, paxam pomonaē pajuntũ coyene weiwein-abename tsipei anoxuae methaunxuae pajuntũ coyene wecoyam tsane!

²⁶ “¡Pai jaibo, pomonaē jiwi wũnaē paca jainteibena painya necueicueijeixae po diwesi jopa Nacom Pejume Diwesiyo! ¡Icha barapomonaē paca ichi barichi barapomonaē pia pamo susato jiwi tatsi, wũnaē jainta pomonaētha pomonaē naerabiya paeba xua pinaē barapomonaē Nacom pia peitorobi jume pepaebiwi!” jei Jesús.

Meje yabara poxonaē Jesús yabara cuiduba xua jiwi bewa antobe pomonaētha pomonaē pia peaitafaetabi jiwichi

(Mt 5.38-48; 7.12)

²⁷⁻²⁸ Equeicha Jesús namchi, jeye: “Paxamtha pomonaē beta pana nejume taneme, barapomonaē paca baraichi: Paantobeinde pomonaē bequein painya nepaca caaitafaetabi jiwi. Matautano beta pata taexande pomonaē paca ita aenaē-aenei. Matautano amanaya beta papaebare pomonaētha pomonaē paca yabara abe paeba. Nacomtha patawũcare pomonaē xua paca biatane. ²⁹ Icha ichũn paca jumata tsaquinopa pecobetha, moya equeicha icha jumata pana najumata caeware

xua painya necajumata tsaquinopaenexa. Icha ichun pacata pita peamtiyu camisa, po camisa xua athawe peruyaewa yawa bara saya moya pacopare xua equeicha painya nepacata pichiwa tsane camisa. ³⁰ Daxita coyenexi pocotsiwa ichamonae paca wuca moya bara pacachabeibare. Pon pacata pita painyawa jopa equeicha caewa pawcaeiinde. ³¹ Paexande ichamonaetha xua po coyene painya neichichipaewa xua barapomonaе beta painya nepacata exanaewa tsane.

³² “Icha saya meisa paantobem pomonaе painya nepaca antobexae, Nacom jopa paca cui yabara matomacae tsane. Tsipei apara iru pomonaе peajuntucoyenebewi antobe ichamonae pomonaе peantobewixaetsi. ³³ Barichi icha saya beta pata exaname pomonaе beta pacata exana, Nacom jopa paca cui matomatsiyo tsaneno baxua. Tsipei pomonaе peitabe jwi barapocotsi coyene iru exana ichamonaetha pomonaе peitabe jiwitha. ³⁴ Barichi icha saya pacatsibame ichamonae xua bexa xuya painya nepaca catsibinexa, Nacom jopa paca cui matomatsiyo tsane baxua. Tsipei pomonaе peitabe jwi barichi icha peitabe jiwitha catsiba xua xuya equeicha pecatsibeibinexatsi. ³⁵ Paxam jame bewa paantobem tsane painya nepaca caaitafaetabi jwi, xuano jame beta bewa paexanaem ichamonaetha. Matautano jame bewa bara pacatsibim ichamonae xua jopa painya neyabara ewateibiwa xua xuya painya nepaca catsibeibiwa tsane. Icha baxua paexanaename Nacom paca catsibina pia nacuatheicha pocotsiwa xua paca juntana jeba pia nacuatheicha. Matautano Nacom paca cana exanaena pia pexanton jwi tatsi pam, pon peitabocotha eca. Tsipei Nacom pejuntu coyene xanepanaein, daxota yawena barapomonaetha, pomonaе bequein xua jopa wecobe noteibiya jacobebiyo xuano xua peitabe jwi. ³⁶ Payabara cui nanta xeinare po coyene xua

ichamonae painya neyawenaewa. Icha be Nacom ichi xua yabara cui nanta xeina po coyene xua peyawenaenexatsi jiwi, bara paichinde”, jei Jesús.

Meje yabara poxonae Jesús cuiduba xua jiwi jopa bewa yabara paebina ichamonae xua penatsicuentsiwa xua abe peexanaexae

(Mt 7.1-5)

³⁷ Equeicha Jesús namchi, jeye: “Jopa ichamonae payabara paebinde xua penatsicuentsiwa xua abe peexanaexae. Nexata bapoxonae Nacom jopa paca yabara paebi tsane painya xua nenatsicuentsiwa xua abe painya exanaexae. Ichamonae jume daunweya jopa pajande: ‘Apara bapon picoya, apara bapon picoya’, jopa pajande. Nexata Nacom jopa paca daichi tsane baxua. Pacui yabara jüntemainare po coyene ichamonae pacata abe exana, nexata Nacom paca cui yabara jüntemainena xua abe painya neexanaewa. ³⁸ Ichamonaetha, jopa juniya pacatsibinde, nexata Nacom jopa juniya paca catsibi tsane. Painya dorotha paca catsina, beta pacata pesabina, yawa beta pacata xatabacorecaena pecobetha yawa pacata nūncūtaxuina. Yawa pacata wunca exanaena. Icha daunweya payabara paebiname xua penatsicuentsiwa ichamonae xua abe peexanaexae, Nacom barichi daunweya paca yabara paebina xua painya nenatsicuentsiwa xua abe painya neexanaexae”, jei Jesús.

³⁹ Jesús tsipaeba barapomonaе pecayabara jūta pepaebi diwesiyo, jeye: “Pon ba peitata nacūtsin jopa itacūpaetsi xua pematacaponaewa ichūn pon irū peitata nacūtsin. Icha bapon baxua exanaetsipabe, baponbe fetotha joparecaetsipabe. ⁴⁰ Pon ba aena nacuiduba xua peyaputaenexa, bapon jopa be bapocotsinyo, pon pecuidubin jiwi, pon peyaputaein. Ichitha pon poxonae

wetsina xua nacuiduba, bapon be pia pecuidubin cui jupa”, jei Jesús.

⁴¹ Barichi equeicha Jesús paeba caeintha pomonae pijimonaе tatsi jiwana icha pecayabara juta pepaebi diwesiyo, jeye: “Xam be jinya jiton itata taneme poxonae naeputiyo itata jopiyatsi, ichitha jopa taem xua iruru xam nama pin naeputo neitacueretha ducua. Barapocotsi juta coyeneya ichi, xam ba jinya jiton cui taneme xua poxonae abe exana, ichitha jopa nayaputaem xua iruru xam bara ichim nama bichocono abe exaname. ⁴² Icha jopa taem pin naeputo xua neitacueretha ducua, jopa caitacupaeyo xua nejeiwa jinya jitontha: ‘Tajiton, cata jutinchi naeputiyo xua ducua neitacueretha’, xua nejeiwa. Xam nepaebin xua ichun exana xua baxua neexanaewatha iru. Xam copiya nata jure barapo pin naeputo xua neitacueretha ducua. Bapoxonae beta taename ne-jutsinexa tsane naeputiyo xua jinya jiton peitacueretha tarucuatsi”, jei Jesús.

Meje yabara poxonae Jesús yabara cuiduba xua pinae jiwi yaputane nae penacoichixae

(Mt 7.17-20; 12.34-35)

⁴³ Jesús namchi, jeye: “Po naein pexeinya naein jopa bapana nacoichiyo po pethei camatsa thei. Barichi po naein camatsa naein jopa bapana nacoichiyo po pethei pexeinya thei. ⁴⁴ Jiwi yaputane nae po nae penacoichixae. Daxita jiwi yaputane xua higo thei, po pethei pexeinya thei jopa bapana teracae po naetha sojei xua camatsa nae. Matautano jiwi yaputane xua uva thei po thei unbototha xuwa jopa bapana teracae naexitha. Bara juta ichi jiwi yaputane xua pebin pejuntu coyene xanepanaein pon xanepanaya peexanaeinxae. ⁴⁵ Pon ba pejuntu coyene xanepanaein, bapon ba jame ba paeba pocotsiwa pexeinya coyene, pejuntu coyene xanepanaeinxae. Barichi

pon ba peajuntucoyenebein bapon ba abe paeba, peajuntucoyenebeinxae. Pocotsiwa jiwi nanta xeina pejuntucoyenetha, baxua ba pecoiboto tsina cueicueijei”, jei Jesús.

Meje yabara poxonae Jesús ainya bomux̄be yabara paeba (Mt 7.24-27)

⁴⁶Equeicha Jesús namchi, jeye: “Paxam pana neyabara jam: ‘Patatanecanamataxeinaem’, pajam, daichitha jopa paexanaem pocotsiwa paca itorobatsi. ⁴⁷Incane yabara paca tsipaebinchi pon xua patopa taxantha, nejume naitomata pocotsiwa paeban, matautano exanano pocotsiwa ichichipan, bapon beta popona Nacom nexa. ⁴⁸Bapon barapocotsi juta coyeneya nacana exana icha be ichi pon bo acabanota peira matatsucaewatha xua ichaxota ira daunwei. Meje jeye: Copiya muth̄n̄n taj̄n̄ exanareca pecuaranobinexa bomux̄n̄ naeton. Poxonae mene matacaewaxuba, barapo bomux̄n̄ jopa joparenaeyo poxoru naeton taj̄n̄ umenareca xuano poxoru bomux̄n̄ uncua pematatsucaewatha ichaxota ira daunwei. ⁴⁹Ichitha nama pon nejume taetha, xuano jopa exanaeyo pocotsiwa ichichipan, bapon be meje: Bapon be pocotsin bo acabanota ichaxota ira matafatsana, xuano naeton jopa taj̄n̄ umenarecaeyo. Poxonae mene matacaewaxuba, barapo bomux̄n̄ joparena poxoru naeton jopa taj̄n̄ umenarecaeyo, xuano poxoru bomux̄n̄ uncua ichaxota ira matafatsana. Barapo bomux̄n̄ nainya joparena. ¡Maisa bomux̄n̄ bi-chocono abel!” jei Jesús.

7

Meje yabara poxonae Jesús axaibi exana pon soldadomonae romanomonae pia pentacaponaein tatsi tanacuitatsi (Mt 8.5-13)

¹ Poxonae Jesús baxuan najume weta xua barapomonae jume tane, bapoxonae Capernaum tomara beya pona.

² Baxotiya popona romanomonae soldadomonae pia pentacaponaein tatsi, pon xeina pia petanacuiteibinchixaetsi. Barapon bichocono antobe pia petanacuitinchi. Bapon pon petanacuiteibin bichocono atene, xua awatha petu-pae.

³ Poxonae romanomonae soldadomonae pia pentacaponaein tatsi Jesús yabara jume tainchi, bapoxonae itoroba pitiri jiwi judiomonae jiwanapiwi Jesús beya xua petaaxaibi exanaenexa tsainchi pia petanacuichin tatsi.

⁴ Barapomonae Jesús imoxoyo caquita poinchi. Barapomonae Jesús jume daunweya tsipaebatsi, jeichichi:

—Barapo pentacaponaein, pentacui xanepanaein, daxota yawende. ⁵ Poxoru bapon wanacuamonae wūnae yabara cananta xeineibatsi. Matautano bapon itoroba xua acaba pata penacaetutsi bo pia paratixitha, jei barapo pitiri jiwi.

⁶ Nexata Jesús baru poinchi barapomonae. Ichitha poxonae Jesús muxu pepatopae, romanomonae soldadomonae pia pentacaponaein tatsi pia botha tatsi, barapo soldadomonae pia pepa pentacaponaein tatsi, bapon itoroba pia jiwi xua petacajume jeichinexa tsainchi Jesththa: “Tanecanamataxeinaein, xan saya tacui pawin. Auran xua xam nepatopaewa tsane tabotha tsipei xam ainya cuim. ⁷ Daxota jopa patopaeinyo nexainya beya, tsipei xam ainya cuim, xua paebiname pia peatenewatha tatsi bapoxonae bapon axaibi bara tsane pon inta nacuiteiba. ⁸ Xan bichi xeinan tanecanamataxeinaein, pon neitoroba. Barichiru xeinan soldadomonae pomonae itorobeiban. Poxonae ichun itoroban: ‘ponde’, jan, bapon pona. Poxonae ichun waban: ‘antha’, jan, bapon patopa. Pon inta nacuita, itoroban: ‘inta exande’, jan, inta exana”, jeye pentacaponaein, jei pomonae penacajume caitoro-

bixaetsi.

⁹ Poxonae Jesús baxua jume taeba, jume cui yabara cananthuthu nanta xeinanaya cabenaeca beta pepae-bixae romanomonae soldadomonae pia pentacaponaein tatsi. Jesús necotaba pomonae puna poinchi, barai, jeye:

—Xaniyan paca tsipaebatsi Israel nacuatha iru dapoc-otsin jopa caxinaeinyo pocotsin icha pon iche pon tana necui yabara jume cowantsin xua bara neitacupa xua axaibi taexanaewa jiwi, jei Jesús.

¹⁰ Poxonae barapomonae botha caibe nawibiya, barapomonae taeba ducupa xua axaibiya boca romanomonae soldadomonae pia pentacaponaein tatsi pia petanacuichin tatsi.

Meje yabara poxonae Jesús petupaein asu exana pexanto tatsi powa pecuenta tupaewayotsi piseuri

¹¹ Poxonae Jesús baxua nacui weta, bapoxonae Naín tomara beya pona. Jesús cueyabatsi pijimonae, iru pin bicheitomonaeno napona. ¹² Poxonae Jesús muxu pepatopae tomaratha, Jesús tane xua pewowin petupaein cajojondenatsi xua pemuthuthu xubinexa tsainchiba, pon pena tsita compa. Barapo pewowin powa pecuenta tupaewayotsi piseuri barapowa pexanto tatsi. Barapowa puna poinchi pin bicheito. ¹³ Bapon Jesús pon Pecanamataxeinaeinxae jiwi, barapowa yabara cui nanta xeinatsi. Jesús barai bapowa, jeye:

—Jopa wecoyande, jei Jesús.

¹⁴ Nexata Jesús imoxoyo caquita pona petupaein, yacaja jayabano. Pomonae yacaja capona yacaja caumenarucupa. Jesús barai petupaein, jeye:

—Pewowin catsipaebatsi, nontaponde, jei Jesús.

¹⁵ Nexata pewowin pon tupa, nantacotecataba, yawa tamropata pitaba xua pecueicueijeewa. Jesús coxi-watha cana cobenata pexanto. ¹⁶ Poxonae pin bicheito

taerucupa baxua, barapo pin bicheito bichocono junuwa. Barapoxonae barapo pin bicheito Nacom wɔnae jaintatsi, barapomonae namchi:

—Nacom peitorobi jume pepaebin, pon ainya cui, waxantha patopa. Nacom siwa pona peyawenaenexa pijimonae pomonae pia pejume cowantsiwichi, jei barapomonae.

¹⁷ Daxita jiwi jume tane xua Jesús exana Judea nacuatha, irɔ po nacuan imoxoyo caquita ena Judea nacuatha.

Meje yabara poxonae Juan itoroba pijimonae Jesús beya peyainyabinexa tsainchi Jesús
(Mt 11.2-19)

¹⁸ Juan pijimonae tsipaebatsi daxita baxua xua Jesús exana. Juan waba ainya pebinbe pijimonae jiwana tatsi.

¹⁹ Baponbe Juan itoroba Jesús beya xua najume caruta baponbetha matauta xua Jesús peyainyabinexatsi xua icha metha bara baponde jei pon bewa patopeicaena, bapon Cristo, jei. Ichacuitha metha ichɔn jampa, xua pawɔnae ewatsin jampa jei. ²⁰ Bara baponbe ponbe Juan peitorobixaebe, baponbe imoxoyo Jesús caquita uncuat-sibe. Baponbe Jesús baraichi:

—Juan pon jiwi Pebautisabin, bapon pana nejume caruta, bapon namchi: ‘¿Metha bara xaniwaicha baponda, pon bewa patopeicaena, bapon Cristo?’ jei. ‘¿Ichacuitha metha bara ichɔn pawɔnae ewatan jampara?’ jei Juan, jei baponbe.

²¹ Poxonae baponbe patopabe, Jesús axaibi exana peatenewi, irɔ pomonae pin domae xainchi, yawa taitaweta pomonae cauri xeina. Matautano yawenano xua equeicha tane pomonae jopa necotsiyo. ²² Baponbe jume notatsibe. Jesús jume nota, jeye:

—Paponarebe Juan beya. Juan patsipaebarebe xuaunxuae pocotsiwa panecui tanemebe, matautano xuaunxuae pocotsiwa pana nejume tanemebeno. Matautano patsipaebarebe xua pomonae peitata nacutsi jiwi equeicha tane, matautano xua pomonae pejajuyajuyei-monae beta pona equeicha. Matautano xua pomonae peperu sawichimonae equeicha peru wuna, matautano xua pomonae pemuxusipanaewi equeicha muxu nasaba, matauta xua pomonae pewerapaewi equeicha asu. Matautano pomonae xua peacopeibiwi jume tane Nacom pia pexeinya pecapanenebiyae diwesi jume. ²³ Patsipaebare Juan xua xan janje: 'Juntu coyene weiweinaena pon jopa ainya unthuthunyo, pon xaniwaicha neyabara cui jume cowanta', xua jan, jei Jesús.

²⁴ Nexata ponbe Juan itorobabe ponabe Juan beya. Bapoxonae Jesús tsipaeba jiwitha, xua Juan yabara pae-batsi, jeye barapomonaetha: "Ira xuepana susato tsuru-cuae nacuatha paponame. Poxonae bara beya paponame, ¿eta xua painyatsi? ¿Painya jume taetsi pebin pon ainya unthuthuto cui xeina icha be naepanaewa ichi xua saya joibo ba jubabiya caya tsaibi? Jume apara. ²⁵ Bara paichim paponame, ¿painya nejume taenexa pebin, pon peitupanae paparuwa nama xatata? Jume apara. Paya-putaneme pomonae peitupanae paparuwan nama xataba, barapomonaе jinompa pexeinya bontha pomonae jiwi itorobiya pia pepa peewatsiwixaetsi. ²⁶ Jume. Jopa baxua patsiponaem xua jopa painya jume taenexa pebin pon ainya unthuthuto cui xeina, matautano xua jopa painya jume taenexa pebin pon peitupanae paparuwa nama xatata. Apara jame baxua patsiponaem xua painya nejume taenexa pon Nacom peitorobi jume pepaebin. Bapon Juan bichocono peainya cuin pon Nacom pia peitorobi jume pepaebiwi jiwana pin beyacaincha ichun

pon Nacom peitorobi jume pepaebin. ²⁷ Juan bapon apara, pon yabara paebatsi Nacom Pejume Diwesitha poxonae Nacom netsipaeba, nejei:

‘Catsiwanae itorobinchi copiya pon tana nacajume carutsin.

Barapon j̄unt̄a cui w̄naetsina jiwi,

xua daxita jiwi naj̄unt̄a cui

w̄naetsina xam nexa, xua necantenta

weyataeya wabinexa poxonae patopaename’,

nejei Nacom Pejume Diwesitha.

²⁸ Paca tsipaebatsi, xua daxita Nacom peitorobi jume pepaebiwi pomonae Juan tsiwanaya jinompatsi bayatha, dapocotsin aibi barapomonae jiwana pon yatsicaewa peainya cuin beyacaincha pon Juan, pon jiwi Pebautisabin. Juan peainya cui diwesi yabara cueicueijeji po coyene xua Nacom itorobina jiwi. Ichitha po diwesi xua tamonae anoxuae paeba barapo diwesi bichocono ainya cui diwesi beyacaincha xua Juan cueicueijeji, bequein jiwi nanta xeina xua tamonae jopa ainya cui jiwi.

²⁹ “Daxita barapomonae baxua jume taer̄uc̄pa. Ir̄uc̄ jume taer̄uc̄pa pomonae paratixi pentoma noteibiwi romanomonae pia pepa peyanacua ewatsinchi nexa, pomonae bayatha Juan bautisaba. Daxita barapomonae nanta xeinar̄uc̄pa xua Nacom bara pepa pentacui xanepanaein. ³⁰ Ichitha fariseomonae ir̄u pomonae jiwi pecuidubiwi Moisés pia peitorobi coyene tatsi, barapomonae jume itaweta, Nacom jume itawetatsi pocotsiwa xua Nacom beexanaena barapomonae nexa. Matautano barapomonae cui itaweta, Juan cui itawetatsi xua pia pebautisabi coyenewa.

³¹ “Jiwi pia Pecanamataxeinaeinchi tatsi, bapon Jesús namchi, jeye: ¿Eta pocotsimonae cui j̄upatsi barapomonae pomonae xote jinompe pomonae Nacom jume itawetatsi? ¿Etabe j̄uta ichi barapomonae?

³² Barapomonaē be pexui, pocotsixi panatha nabarū jinompa. Nabarū wawai tsurubenaēbiya. Barapoxi nabarai, jeye: ‘Bayatha oibo paca tsimuxu obatsiba ichitha jopa panawirabim. Bayatha paca tsimuxu wecoyēichiba icha be ichi poxonaē ichūn tatūpatsi, ichitha jopa pana itanuwe jume notsim xua painya newecoyēinexarū’, jei barapoxi. ³³ Juan patopa pon jiwi Pebautisabin. Bapon jopa xaeyo pan. Matautano jopa apaeyo vino mera. Ichitha paxam pajam: ‘Apara Juan puna popoinchi cauri’, pajam. ³⁴ Bapoxonaē xan, ponxaein Nacom Tananeitapetsin patopan. Xan pan taxaein yawa vino mera taapaein. Paxam pana neyabara paebame, pajam: ‘Bapon maisa jopa juniya nabanaeyo, yawa jopa juniya apaeyo. Peatsacae jiwi abe peexanaē jiwi pia jiton tatsi, irū pomonaē paratixi pentoma notebiwi barapomonaē pia jiton tatsi’, pana neyabara jam. ³⁵ Nacom piamonaē tatsi barapomonaē tsita exana xua jiwi tsita exanatsi Nacom pia peyaputae coyeneintha tatsi. Po coyene barapomonaē exana baxua Nacom tsita pexeinya coyenetsi”, jei Jesús.

Meje yabara poxonaē Jesús siwa pona Simón fariseomonaepin pia bo beya tatsi

³⁶ Caein fariseomonaepin bapon Jesús wabatsi petaxaenexa tsainchi pia botha. Jesús pona bara beya yawa naeca pexaethopaewatha penanabanaenexa tsane. ³⁷ Nexata petsiriwa patopa powa pesi cui weiweinaewa, powa barapo tomaratha popona. Barapowa yaputane xua Jesús nanabanaeicha fariseomonaē jiwana pintha. Barapowa alabastro ibo wūn bosibū atsato capatopa Jesththa xua petuxuei nasiwa xua bichocono wūnca. ³⁸ Barapowa Jesús imoxoyo caquita wecoyēi tsuncuaetsi yawa peitacuere mentha Jesús taxu atatsica exanatsi. Bapoxonaē barapowa pia pentanatha baxota Jesús taxu

tsewa exanatsi. Barapowa Jesús taxu tsutsubatsi poxoru Jesús Pecanamataxeinaein jiwi. Bapoxonae barapowa Jesús taxu eatabatsi petuxuei nasiwatha. ³⁹ Poxonae fariseomonae jivanapin pon Jesús pewabixaetsi petax-aenexa tsane pia botha, poxonae bapon tane baxua, bapon pia coutha nabarai: “Icha bapon xaniwaicha tsi-pae pon Nacom peitorobi jume pepaebin tsipae metha yaputaetsipa xua powa jayabatsi apara powa pesi cui weiweinaewa, matautano xua bapowa powa peatsacaewa. Ichitha bapon xaniwaicha jopa daponyo pon Nacom itoroba”, jei barapon pon fariseomonaepin. ⁴⁰ Nexata Jesús barai fariseomonae jiwana jiton, jeye:

—Simón incane catsipaebinchi, jei.

Bapon jume nota, jeye:

—Pon jiwi Necuidubimxae, moya taema, jei.

⁴¹ Jesús barai, jeye:

—Pebinbe nacueyatabe nacowaetabe paratixi ichuntha. Ichun jopa cataunxuae xuya catsiyo quinientos po paratiximonaebe po paratixi quinientos po matacabibe nexa poxonae nacuita. Ichun jopa cataunxuae xuya catsiyo cincuenta po paratiximonaebe pontha pon penacowaetsixaetsi. ⁴² Poxoru baponbe jopa itacupaetsibe xua xuya equeicha pecatsiwa tsanebe pontha pon penacowaetsixaebe, daxota pon penacowaetsixaetsi paratixi, bapon namchi, jeye: ‘Metha basaya paca cui yabara jüntemainatsibe’, jei. Incane netsipaebare Simón xua baponbe, ¿jintam yatsicaewa antobetsira xua beyacaincha ichun antobetsi xua antobe pon nacowaetatsi paratixi? jei Jesús.

⁴³ Simón jume nota, Jesús jume notatsi, jeye:

—Bɛ, metha moya pon bichocono cacui yabara jüntemainatsi bichocono pon penacowaetsixae quinientos po paratiximonaebe, jei Simón.

Jesús barai:

—Bara beta nejume notame, jei Jesús.

⁴⁴ Nexata Jesús necota barapo petsiriwa, bapoxonae Jesús Simón baraichi: Taema pocotsiwa barapo petsiriwa inta exana. Xan patopan jinya botha ichitha jopa meratha netaxu waexubim xua painya cui coyeneyathaxae xua judiomonae pamxaem. Nama barapowa peitacuere mentha netaxu atatsica exana yawa pia pentanatha netaxu tsewa exana. ⁴⁵ Xam jopa netsutsubim, ichitha bapowa poxonae caena jonarenan awiya came netaxu tsutsuba.

⁴⁶ Jopa nenta epatabim petuxuei tuxusi nasi mera. Ichitha barapowa petuxuei tuxusi nasi mera netaxu epataba. ⁴⁷ Daxota catsipaebatsi xua bapowa matowa nasi cui matacaeta. Daxita baxuan yabara jüntemainan, daxota bichocono neantobe. Ichitha nama pon be conotha nasi cui matacaeta, be conotha yabara cui jüntemainan. Bapon be conotha neantobe, jei Jesús.

⁴⁸ Equeicha Jesús namchi bapowatha. Petsiriwa baraichi, jei:

—Cacui yabara jüntemainaya jüntu puxana exanatsiba abe jinya neexanae cuiru coyenewan, jei Jesús.

⁴⁹ Pomonae Jesús pebaru nabanaexaetsi, barapomonae nabarai, jeye:

—Bapon, ¿jintamda, jamaisa bapowa cacui yabara jüntemainaya jüntu puxana exanatsi abe pia peexanae cuiru coyenewan tatsi? jei barapomonae pomonae baxota naena.

⁵⁰ Jesús barai petsiriwa, jeye:

—Bayatha necacapanepaewa caexainchi tsipei yabara tana nejume cowantsixaem. Saya jüntemiya poponde, jei Jesús.

8

Meje yabara yabuxi powaxi Jesús yanabatsi

¹ Bapoxonae pirapae Jesús daxita tomarantha pona ducuaeta, tsica tomaraxithano po tomarantha pin tomaranthano. Matautano paeba ducuaeta Nacom pia pexeinya jume diwesi tatsi po diwesi yabara xua Nacom waba jiwi petanaexanaenexatsi piamonae pomonae Nacom juntu coyene itorobiya ewata. Jesús yanabatsi pia peitorobiwi tatsi pomonae doce poyobe. ² Barichi Jesús yanabatsi petsiriwaxi, powaxi Jesús bayatha taitaweta cauri xuano axaibi exanano xua domae xainchi. Barapowaxi jiwana caewayo pewun María Magdalena, tsipei pia tomara tatsi pewun Magdala. Barapowa María powa bayatha taitawetatsi siete poyobe cauri. ³ Bichiru petsiriwa, powa pewun Juana, barapowa napona. Barapowa Juana, Cuza piowa tatsi. Bapon Cuza pon Herodes pia bo tatsi tayapucaeatsi. Iru ichowa pewun Susana, barapowa napona. Iru ichowaxi ainya yabuxiru napona. Daxita barapowaxi Jesús upain exaneibatsi xua xoxi barapowaxi pexeinaexae.

Meje yabara poxonae Jesús cuiduba jiwi pecayabara juta pepaebi diwesiyo xua pon peubin yabara

(Mt 13.1-9; Mr 4.1-9)

⁴ Daxita tomaranpiwi pata. Poxonae pin bicheito nacaetuta Jesús cuiduba barapo bicheito po diwesiyo pecayabara juta pepaebi diwesiyo. ⁵ Jesús barai: “Pebin pon peubin pontaba pia ubichi pabitha. Poxonae pon peubin ubauya, icha xu namtotha othopeica, pexu jiwi taxunaunaba, yawa pepupunaewi xu xane. ⁶ Icha xu, xu othopeica ibowantha. Poxonae barapo xu xuwa, barapo xu, xu yunna poxoru jopa tajü xuwarecaeyo poxoru ibotixi nacucuna yawa poxoru ira tsewa. ⁷ Icha xu, xu othopeica ichaxota pesoiwan xuwinaena. Barapo xu yaboto

nanta capanaba poxoru yawa muxuna xuwina pesoiwan.
⁸ Icha xu, xu othopeica ichaxota ira wɔnae. Poxonae barapo xu, xu xuwa, xu nawɔnaeta. Cae xuto nacoita cien po xu matabuxɔyobe”, jei Jesús.

Poxonae Jesús baxua paeba, bapoxonae jume daunweya namchi: “Icha pamuxu dubename, moya pana nejume naitaeware pocotsiwa tapaca tsipaewatsi”, jei Jesús.

Meje yabara poxonae Jesús namchi xua exua metha pecayabara jɔta pepaebi diwesiyo yabara, jane jei (Mt 13.10-17; Mr 4.10-12)

⁹ Nexata Jesús yainyabatsi pijimonae, barapomonae namchi, jeye: “¿Eta pocotsiwa yabara caunutame poxonae pana netsipaebame barapo pecayabara jɔta pepaebi diwesiyo?” jei bapomonae. ¹⁰ Jesús jume nota, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawɔn xeinaewa. Barapo moya peyawɔn xeinaewa apara xua Nacom exana xua paca cana exana xua painya nepaca itacɔpaewa xua painya nenaexanaewa Nacom piamonae tatsi pam, pomonae pamxaem Nacom itorobiya paca ewata. Ichitha jame ichamonae meisa pomonae jopa nejume cowɔntsiyo jopa daichichi Nacom jopa copatsiyo xua barapomonae peyabara yaputaewa baxua. Daxota barapomonae cuiduban pecayabara jɔta pepaebi diwesintha xua Nacom peyabara yaputaenexatsi. Baxua paeban xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane”, jei Jesús.

Meje yabara poxonae Jesús pijimonae muxu yaputane exana po diwesi xua pecayabara jɔta pepaebi diwesiyo pon

peabin yabara

(Mt 13.18-23; Mr 4.13-20)

¹¹ Equeicha Jesús namchi: “Meje apara baxua yabara caunutan poxonae paeban pecayabara jüta pepaebi diwesiyo: Po xuto xua iratha xuwa nacoichiya xanepanaya exana. Barapo xuto yabara caunuta Nacom Pejume Diwesi xua poxonae pebin jüntü coyene webocatsi pebin wünaeya xanepanaya cana exanatsi. ¹² Po xuton xua namto beothopiya, aichurubena. Barapo xuton yabara caunuta xua jiwi bara jüntü coyene weichichi caurimona pia pentacaponaein tatsi. Jiwi jüntü coyene weajumetsurubena exanatsi Nacom Pejume Diwesi xua bayatha po jume jume tane, xua bapoxona jopa petajume cowüntsinea tsainchi Nacom, yawa xua jopa petana capanenebiyaenexa tsainchi Nacom beya xua Nacom exanaena. ¹³ Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi xuano jüntü coyene weiweinyaya Nacom jume cowüntatsi. Ichitha bara caeto jume cowünta poru barapomona antüfaetabiya jume jeba Nacom Pejume Diwesi pejüntü coyeneintha. Matauta cauri jüntü coyene wemuxu paeba xua abe peexanaenexa tsane. Daxota barapomona cayabara jüntemaina Nacom. ¹⁴ Po xuton xua xu othopa pesoiwantha barapo xuton caunuta xua pomona Nacom Pejume Diwesi jume tane ichitha saya barompaya pia jüntü coyenyatha jinompa, yawa saya ü copei cayabara nanta xeina, yawa saya exana pocotsiwa jüntü coyene weiweina cana exanatsi. Po coyene pebiwi exana baxuan barapocotsi jüta coyeneya exana icha ichi xua po xuton be pesoiwantha xu othopiya. Barapo xuton jopa thei dubenaeyo. Barapocotsi jüta coyeneya ichi, barapo jiwi jopa xanepanaya jinompaeyo Nacom nexa. ¹⁵ Po xuton xua xu othopeica peira wünaewatha,

bara nacoita. Barapo xuton yabara caunuta pomonae jume tane Nacom Pejume Diwesi xuano jume cowuntano poxoru juntu coyene xanepanaya jume tane. Matauntano beta exana dubenanaebiya beya matapainya jiwi cui tane xua barapomonae juntu coyene xanepana Nacom peitabaratha tatsi”, jei Jesús.

Meje yabara poxonae Jesús pijimonae tsipaeba pecayabara juta pepaebi diwesiyo xua pecoicha yabara

(Mr 4.21-25)

¹⁶ Equeicha Jesús namchi: “Poxonae jiton pecoicha coicha exana bapoxonae jopa coicha matakatsiyo. Matauta jopa coicha exanaeyo cama peupana deca. Jame asiya coicha exanatsi, pecoicha taenexa pomonae jojoneibarena. ¹⁷ Daxita pocotsiwa xua moya peyawun xeinaewa bexa tsane jiwi yabara yaputaena. Barichi barapo diwesiyo xua pecayabara juta pepaebi diwesiyo xua paebaponan jiwi itacupaeinchi xua peyabara yaputaewa tsane.

¹⁸ “Pana nejume naitaeware painya neexanaenexa pocotsiwa paca tsipaebatsi. Pon ba be conotha Nacom yabara yaputainchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

Meje yabara Jesús pena tatsi iruru peyapin jiwi tatsino

(Mt 12.46-50; Mr 3.31-35)

¹⁹ Nexata Jesús pena tatsi iruru peyapin jiwi tatsino pata ichaxota Jesús uncua. Ichitha jopa Jesús imoxoyo caquita ponaetsi tsipei bichocono pin bicheito. ²⁰ Ichun Jesús baraichi:

—Ena, iruru neyapin jiwino pesato beya umena. Bepara bequein cataei, jei bapon.

²¹ Jesús namchi barapomonaetha:

—Apara jame be taena tsicotan yawano be tayapin jiwi tsicotan pomonae xua jume tane Nacom Pejume Diwesi xuano xua exana pocotsiwa Nacom itoroba, jei Jesús.

Meje yabara poxonae Jesús xainya ducuanaya exana joibo, yawa maratsacano xainya mene ducuanaya exanano

(Mt 8.23-27; Mr 4.35-41)

²² Caentacabi Jesús baru pona pijimonae jeratha. Jesús pijimonae barai:

—Anthas, poinchi icha muxunene beya, pucua beya, jei Jesús.

Bara ponarucupaba. ²³ Poxonae cataunxuae jeratha yana enapona bapoxonae Jesús maituncuataba. Bapoxonae jemeicha pin joibo naetaba mentha. Matauta bichocono jera mene wunca, muxu pebunarecae. ²⁴ Nexata Jesús yaubaxotsi. Jesús baraichi:

—¡Jesús, Patatanecuidubim, yana bunarecatsi! jei barapomona.

Nexata Jesús nacosataxuba. Jesús itawetaxuba joibo maratsacano. Daxita caewanaya joibo yawa maratsacano.

²⁵ Nexata Jesús barai pijimonae:

—¿Jopa pana nejume cui yabara jume cowuntsim xua bara tana neitacupaewa xua tapaca yawenaewatsi? jei Jesús.

Barapomona bichocono junuwa yawa najuntu coyene cabenaecarucupa. Barapomona caemonae natsipaeba, jeye:

—¿Jintam metha baponda? ¡Jamaisa bapon itaweta joibo yawa maratsacan xua daxita xainya dubenanaya! najei barapomona.

Meje yabara xua pebin yabara pon caurimonae pexeinaein pon Gerasa nacuapin

(Mt 8.28-34; Mr 5.1-20)

²⁶ Pirapaeyo jebouna Gerasa nacua itapatha, po itapa eca Galilea nacua icha itapa panawa beya. ²⁷ Poxonae Jesús muxu penontounae jeratha, pebin pon copiya tomarapin pon equeicha aisowapin naexana, bapon patopa. Jesús caquita uncuatabatsi. Caena bayatha bapon puna jinompatsi caurimonae. Paparuwa jopa yawa poponaeyo, matautano botha jopa poponaeyo, saya ibo wountha poponeiba. ²⁸ Poxonae Jesús tainchi, iratha jopa. Pentabocototha uncua bapon, Jesús peitabaratha tatsi. Jume daunweya wawai:

—Jesús, Nacom Pexantom, pon peitabocotha eca. ¿Eta pocotsiwa metha patopame taxantha? ¡Jume daunweya cabaraichi jopa neperaxa exanaeinde! jei.

²⁹ Daxota bapon baxua paeba yaitama Jesús taitaweta cauri xua peponaenexa bapon pia xainya weya tatsi. Bapon matowa teiqueibatsi cauri. Bayatha bequein jiwi taxu cūbeiba yawa pemaхно penaintotha xua bapon xua jopa peponaenexa, ichitha bapon nain xuneiba. Bapon ira xuepana susato tsurucuae nacua beya itorobeibatsi cauri.

³⁰ Jesús yainyaba:

—¿Eta po wum? jei Jesús.

Bapon jume nota exanatsi Jestustha. Bapon namchi, jeye:

—Tawun ayei, jei.

Baxua namchi tsipei bayatha cauri bicheito cunto pata bapontha. ³¹ Equeicha barapo pebin cueicueije exanatsi barapo cauri bicheito cunto. Barapo cauri cunto namchi, jeye: “Jesús jopa pana neitawetsinde po nacua ira bereca ichaxota jiwi atene tsaibi”, jei bapon xua cueicueije exanatsi cauri. ³² Pin marrano duweimonae pitapatororotha

jinompa xua yawa xayompano. Caurimonae Jesús jume daunweya wꞩcatsi, jeye: “Pana nepu copabare marrano duweimonaetha”, jei. Jesús namchi: “Moya pataema”, jei. ³³ Nexata caurimonae pebin wepu ponatsi, yawa marrano duweimonaetha pata. Barapo marrano duweimonaetha dꞩcꞩpa, pin pitapatororo othopareca. Pucuatha bunothopa. Caurimonae cabunothopatsi.

³⁴ Pomonae yapu eena barapo marrano duweimonaetha junuwiya cuinaenouta tomarantha xuano tomaran aisowapiwi, xua pepaebinexa xua baxua exana. ³⁵ Jiwi poxonaetha baxua tane, pata baxota ichaxota Jesús uncu. Tainchi pon wepu poinchi caurimonae. Bapon Jesús petaxu deca taecatsi, xuano paparua nama xatateca. Axaibiya eca, be pocotsin jopa matsiyaibichi. Barapo jiwi junuwa nawita. ³⁶ Pomonae copiya tane, barapomonae equeicha tsipaeba ichamonaetha pomonaetha pomonae jopa taeyo po coyene xua bapon equeicha jume xua copiya bequein caurimonae pexeinaewa. ³⁷ Poxonae daxita barapo Gerasa nacuapiwi jume tane baxua, daxita barapomonae Jesús itawetatsi xua pewarapaenexa bara weya xua Gerasa nacua weya, poxoru barapomonae junuwa bichocono. Daxota Jesús jeratha nontabiya bara warapano. ³⁸ Pebin, pon wepu poinchi caurimonae, Jesús wꞩcatsi xua bepara puna ponaetsei Jesús. Ichitha Jesús jopa copatsiyo xua pepuna ponaewa tsainchi bapon.

³⁹ —Jinya bo beya ponare. Daxita paebare jiwitha xua bayatha Nacom cata exana, jei Jesús.

Pebin nawiya tomara beya yawa daxita paebano tomaratha xua po coyene bayatha Jesús taexana xua bapon tacana exanatsi.

Meje yabara xua poxonaetha Jairo pexantiyo taaxaibi exanatsi; yawa yabara xua bapoxonaetha irꞩ icha yabꞩyo axaibi exanatsi

poxonae Jesús pia paparuwa tajayabatsiru

(Mt 9.18-26; Mr 5.21-43)

⁴⁰ Poxonae Jesús caibe patoparena Galilea nacua berena, jiwi Jesús matenta weiweinaya wabatsi, tsipei daxita barapomonae Jesús ewatatsi. ⁴¹ Nexata pebin patopa pon pewun Jairo. Bapon Jairo pon canamataxeina judiomonae pia penacaetutsi bo tatsi. Jesús petaxutha irabe tatayecarecatsi. Baxua Jairo exana poxoru Jesús pon ainya cui peexanaeinchi. Bapon Jairo Jesús jume daunweya wabatsi, jeye: “Antha tabotha ponare”, jei Jairo. ⁴² Bapon baxua paeba tsipei Jairo pexantiyo saya compa tatsi. Barapowayo doce po weibe xeina. Bapowayo muxu petupae.

Poxonae Jesús iya iru pin bicheito napona. Bichocono jiwi acucu. ⁴³ Barapo pin bicheitho yabuyo iru napona. Bapowa caena bayatha beya yadoce po weiyobe jopa xua pentabu janatha boca xua be nantawane. Barapowa daxita cobe caewitatsi xua peaxaibi exanaenexa tsainchi. Pomonae jiwi peyawubiwi cobe caewita daichitha jopa axaibi exanaetsi. ⁴⁴ Bapoxonae barapowa imoxoyo caquita uncuataba Jesús peputha tatsi. Barapowa Jesús pia paparuwa tatsi tajayabatsi xua peopirawa. Bapoxonae caena nainya bapowa ajaneibi tsanareca. ⁴⁵ Nexata Jesús yainyaba barapo pin bicheitho, jeye:

—¿Jintam nejayabara? jei.

Daxita barapomonae paeba xua pinae jopa jayabichiba. Daxota Pedro barai:

—Patatanecuidubim, barapo pin bicheito acucu canapuna torobabiya tane, dacotsiwa jam: ‘¿Jintam nejayaba?’ jam, jei Pedro.

⁴⁶ Ichitha Jesús jume nota:

—Ichun nejayaba tsipei taayapusuwa newepu jiwana aichurucuae xua axaibi exanan, jei Jesús.

⁴⁷ Petsiriwa yaputane xua cobe yaputainchi xua Jesús cobe yaputane poxonae bapowa jayaba. Barapowa junuwiya patopa yawa pentabocototha uncua ira betae-uncuarecano Jesús petaxutha tatsi. Baxua exana bapowa poxoru Jesús ainya cui peexanaeinchi. Nexata barapowa namchi barapo bicheito peitabaratha, jeye:

—Apara xan jayaban. Poxonae jayaban caena nainya axaibin, jei. ⁴⁸ Nexata Jesús barai, bapowa baraichi, jeye:

—Yabũyo caaxaibi exanatsi tana neyabara jume cowũntsixaem xua bara tana neitacũpaewa xua tacaaxaibi exanaewatsi. Saya jũntemiya poponde, jei Jesús.

⁴⁹ Poxonae cataunxuae Jesús tsipaebauya bapowatha, pebin patoparũ pon Jairo pia bo tatsi weya pona. Bapon tsipaeba pontha pon pecanamataxeinaeinxae judiomonaе pia penacaetutsi botha tatsi pon Jairo. Jairo baraichi, jeichichi:

—Nexantiyo bayatha cata tũpa. Jopa came fayacotsinde pon jiwi Pecuidubin, jeichichi Jairo bapon.

⁵⁰ Ichitha poxonae Jesús jume tane baxua, xua Jairo baraichi, Jesús barai, Jairo baraichi, jeye:

—Jopa junuwinde, maisa saya nejume cowũnde. Nexantiyo cata axaibi tsane, jei Jesús.

⁵¹ Poxonae botha pata, Jesús jopa juntucuru bebarũ joniyaeyo ichamonaе. Saya meisa Pedro irũ Santiago irũ Juan irũ powayo tũpa paxa tatsi, bapon Jairo yawa pena tatsi, Jesús barũ joniya barapomonaе. ⁵² Daxita barapomonaе yabũyo siwa wawaya wecoyeichi. Ichitha Jesús barai barapomonaе, jeye:

—Jopa pawecoyande, yabũyo apara jopa tũpaeyo, maituncua apara, jei Jesús.

⁵³ Ichitha Jesús jume caponatsi barapomonae. Tsipei barapomonae yaputane xua yatsicaewa अपरा तृपा बारपुवायु. ⁵⁴ Nexata Jesús jume daunweya cobe pichiya barai, jeye:

—¡Ja, owae asiya uncuatabare! jei Jesús.

⁵⁵ Barapowayo equeicha petupaewa nacosataxuba, caena nainya asiya uncuataba. Jesús itoroba barapomonae xua barapowayo peapatsinexatsi pexaewa. ⁵⁶ Barapowayo paxa tatsi iru pena tatsi najuntu coyene cabenaecaeya tanebe. Jesús barapomonae tsipaeba xua jopa cui yopichi tsainchi ichamonaetha xua po coyene bapon peexanaexae.

9

Meje yabara poxonae Jesús pijimonae itoroba xua barapomonae peyabara cueicueijeinexa jiwitha po coyene xua Nacom waba jiwi xua petanaexanaenexatsi pijimonae tatsi (Mt 10.5-15; Mr 6.7-13)

¹ Jesús pijimonae caetuta pomonae xua doce poyobe. Yawa pijimonae cata pia peayapuswa. Matautano catano peitorobi coyenewa xua barapomonae peitaweteibinexa tsane cauri xuano xua peaxaibi exanaenexa tsaibi tsane jiwi pomonae atene. ² Jesús itoroba barapomonae xua barapomonae peyabara cueicueijeinexa tsane jiwitha xua po coyene Nacom waba jiwi xua petanaexanaenexatsi pijimonae pomonae itoroba peewatsixae. Matautano itoroba xua barapomonae peaxaibi exanaenexa tsane jiwi pomonae atene. ³ Jesús barai pijimonae:

—Jopa pacaponaeinde ichawa xua painya necawara-paenexa. Matautano jopa iwabi pacaponaeinde, yawa jopa cote pacaponaeinde. Matautano jopa pacaponaeinde pexaewa, yawa jopa pacaponaeinde paratixi. Saya cae

camisa panama xatabare, jopa icha camisan pacapon-aeinde. ⁴ Botha po botha papatsiname, bara po botha painya nepu enaeinde bapoxonae barapo botha painya nepu warapaeinde. ⁵ Pomonae xua ichaxota jopa paca mantenta weyataya wabiyo barapo tomara weya pawarapare. Pana taxu wenunubabare tsorobon po tsorobon painya taxutha dubena. Baxua paexande xua barapomonae peyaputaenexa xua abe exana paxamtha, jei Jesús.

⁶ Bara barapomonae ponarucupa. Matautano barapomonae pona daxita carepaya peya tomaraxitha. Matautano papaeba tsiniya Nacom pia pecapanenebiyae diwesi jume tatsi. Yawa axaibi exana tsiniyano jiwi pomonae atene.

*Meje yabara poxonae Herodes Juan yabara jume unthuthu deideijeichi pebexubixaetsi bayatha
(Mt 14.1-12; Mr 6.14-29)*

⁷ Bapoxonae Herodes Galilea nacuapiwi pia peyanacua ewatsinchi daxita jume tane xua Jesús exana. Bapon Herodes jopa xapain beta nanta xeinaeyo. Tsipei ichamonae catsawa Jesús yabara namchichi: “Apara bapon Juan, pon bequein bayatha tupa, equeicha asu juina”, jei. ⁸ Iru ichamonae namchi: “Bapon apara Elías, pon tsita naituta jiwitha”, jei. Iru ichamonae namchi: “Apara pomonae bayatha Nacom peitorobi jume pepaebiwi, barapomonae jiwana, bapon apara, pon petupaein equeicha juina”, jei barapomonae. ⁹ Ichitha Herodes namchi:

—Bara bayatha ichamonae cobe itorobacoumba xua Juan pewisi ucuibiwatsi. Jintam metha bapon xua yabara jume tan nawita xua pinae peitupanaewan exana? jei.

Herodes bichocono beyaitaena, Jesús beyaitaeinchi pon wuna peexanaein.

*Meje yabara poxonae Jesús apata pexaewa cinco mil pebiwi
(Mt 14.13-21; Mr 6.30-44; Jn 6.1-14)*

¹⁰ Poxonae pata pomonae Jesús itoroba, barapomonae Jesús tsipaebatsi pocotsiwa xua barapomonae exana. Jesús tsana baru jopa barapo pijimonae tatsi xua pin bicheito weya. Ichaxota jiwi aibi, Jesús bara beya baru pona pijimonae, Betsaida tomara pecuariya beya baru pona. ¹¹ Ichitha poxonae barapo bicheito yauptane xua xota Jesús ponaena, barapo bicheito iru Jesús puna poinchi. Jesús matenta weiweinaya waba barapo pin bicheito. Matautano Jesús yabara tsipaeba barapo bicheitha po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae. Matautano Jesús axaibi exana atenemonae.

¹² Poxonae imoxoyo tabopiya Jesús barompaya pijimonae tatsi pomonae xua doce poyobe, barapoyobe Jesús imoxoyo caquita umenarucupatsi. Jesús baraichichi, jeye:

—Barapo bicheito itorobare pejeichinexa tsane xua ichaxota maichina xuano xua pexaewa pejeichinexa tsane tomaranxitha yawa po bon pipatotha umena, poxoru xote aibi pexaewa yawa bon xua ichaxota pemaichiwa tsane, jeichichi Jesús pijimonae.

¹³ Ichitha Jesús barai pijimonae:

—Paxam paapare pexaewa, jei Jesús.

Jesús jume notatsi pijimonae:

—Saya apara cinco po panbe paxeinan matautano saya ainyoyobe paxeinan duweiyobe. Apara acoibi tsipei pin bicheito. Metha paponan pata comotsinexa icha pexaewa, daxita barapomonae nexa, jei.

¹⁴ Barapo bicheito be cinco mil pebiwi. Nexata Jesús pijimonae barai:

—Pana nantaure xua ichamonae tsana eeniyaena be cincuenta po matabuxuyobe tsiniya, jei.

¹⁵ Bara Jesús pijimonae tatsi exana pocotsiwa xua Jesús paeba. Bapoxonae barapo pin bicheito iratha ena. ¹⁶ Bapoxonae Jesús pan pita cinco po panbe, yawa duwei ainyobe pitano. Jesús itaboco benecoicha, Paxa tsipaeba: “Axa, maisa juntu coyene weiweinan xua pexaewa pata tanecatsiwaxaem”, jei Jesús. Poxonae Jesús epa janaquiya nacobe weta, pijimonae caitoroba xua pecatsibapon-aenexa tsane barapo bicheitho. ¹⁷ Bara daxita nabane, yawa bara daxita jain cowıntarucupatsi. Bapoxonae Jesús pijimonae tatsi doce po cote matabuxuyobe wamba xua bayatha nacopaba pocotsiwa xua bayatha barapo jiwi jopa xaeyo petonsanaexae.

Meje yabara poxonae Pedro namchi Jestustha jeye: “Xam apara Mesías pon Nacom caitorobica”, jei Pedro

(Mt 16.13-19; Mr 8.27-29)

¹⁸ Caentacabitha Jesús Nacom tsipaebawiya, meisa pijimonae baru pona. Bapoxonae Jesús yainyaba pijimonae, jeye:

—¿Eta jiwi neyabara jei po coyene xua xan bapon aparan? jei Jesús.

¹⁹ Barapomonae Jesús jume notatsi, jeye:

—Ichamonae cayabara, jei: ‘Apara bapon Juan pon jiwi Pebautisabin, pon equeicha petupaein asu juina’, jei. Iru ichamonae cayabara, jei: ‘Apara bapon Elías, pon equeicha petupaein asu juina’, jei. Iru ru ichamonae cayabara, jei: ‘Apara bapon jiwana pomonae Nacom peitorobi jume pepaebiwi, pon petupaein equeicha asu juina’, jei, Jesús pijimonae tatsi.

²⁰ Nexata Jesús pijimonae yainyaba, jeye:

—Incane iru paxamdru, ¿eta pana neyabara jumichimdru xua xan eta pondun? jei Jesús.

Pedro jume epa pita:

—Xam apara Mesías, pon Nacom caitorobica, jei Pedro.

Meje yabara poxonaē Jesús nayabara diwesi paeba po coyene xua petupaewa tsane

(Mt 16.20-28; Mr 8.30-9.1)

²¹ Jesús pijimonaē muxu barai, xua pijimonaē jopa peyabara paebinexatsi ichamonaetha baxua. ²² Yawa barai pijimonaē po coyene xua bexa ichamonaē Jesús cana exanaeinchi. Jesús namchi, jeye:

—Xan ponxaein Nacom Tananeitapetsin, jiwi bichocono neperaxa jubina. Matautano pitiri jiwi iruru sacerdotemonaē pia pentacaponae wi tatsi, iruru pomonaē jiwi pecuidubiwi Moisés pia peitorobi coyenewa tatsi, daxita barapomonaē neitawetsina. Matautano barapomonaē nebexubina. Ichitha equeicha asu poponaēin poxonaē acoibi po matakabiyobe tsuxubi tsane, jei Jesús poxonaē nayabara paeba.

²³ Bapoxonaē Jesús barai daxita pijimonaē, jeye:

—Icha pebin ichichipa xua tajiwimonaē jiwana pin penaexanaewa tsane bewa bapon yabara naitematsi pocotsiwa xua bapon ichichipa pia peexanaē coyenewan tatsi. Bapoxonaē jame bapon bewa eexanaponaē daxita matakabi pocotsiwa itoroban bequein bara bapon bexotsi ichamonaē, tajiwimonaē jitonxae. ²⁴ Pon naantobeya nata exana pocotsiwa bapon ichichipa, bapon jopa xeinaeyo peajuntuyapusuwa, po peajuntuyapusuwa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan bapon xeinaena peajuntuyapusuwa, po peajuntuyapusuwa ataya tsiteca xua Nacom pia nacua beicha. ²⁵ Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajuntucoyenesuwa, po peajuntucoyenesuwa ataya tsiteca, bapoxonaē bapon jopa itacupaetsi xua penajuntu coyene capanepaewa xua jopa pewerawera-caewa. ²⁶ Icha ichun neacaura, yawa nejume diwesi acaurano, xan ponxaein Nacom Tananeitapetsin xuya

bapon acauran tsane. Baxua exanaein poxonaē patopaetsicaein be jiwī pia pecanamataxeinaein tatsi yaitupanae susato patopaetsicaein. Taxa pia peitupanaewa tatsi yawa patopeicaein. Matautano Taxa pia matatsunpiwi tatsi nebarū patsicaena, jei Jesús. ²⁷ Bara xaniwaicha paca tsipaebatsi xua pomonaē xote umene abū barapomonaē jopa werapae tsane. Barapomonaē jiwana copiya matha necotsina xua po coyene Nacom waba jiwī xua petanaexanaenexatsi piamonaē pomonaē itorobiya peewatsixae, bapoxonaē barapomonaē werapaena, jei Jesús.

Meje yabara poxonaē Jesús pijimonaē peitūtha pexeinya itupanae coicha tsanaya naexana

(Mt 17.1-8; Mr 9.2-8)

²⁸ Poxonaē ocho po matabibe jopa xua poxonaē Jesús barapo diwesi paeba, bapoxonaē Jesús pona demxuwa beicha petsipaebinexa Nacom. Pedro irū Juan irū Santiago barapo matabuxuyobe barū poinchibe. ²⁹ Poxonaē Jesús cataunxuae Nacom tsipaebauya, bapoxonaē icha itabara tsanaya. Matauta penama xatatsiwano inyapana tsanaya yawa bichocono daedaena tsanaya. ³⁰ Nexata pebinbe yaitupanae be damacu patopabe. Baponbe, irū Jesús, bapoyobe nabarū cueicueijeibe. Ponbe xua Jesús jemeicha tsita patopatsibe, bapon Moisés irū ichun pewun Elías, ponbe xua caena bayatha naxubabe. ³¹ Baponbe yabara barū cueicueijeibe xua Jesús petupaewa tsane xua peraxa jubinchi ichamonaē Jerusalén tomaratha. ³² Bequein Pedrobarū bichocono itamaipana daichitha nacosatumena. Pedrobarū tane xua Jesús yamatawacaicha pexeinya itupanae be damacu tsuncuaetsi. Matautano Pedrobarū tane ponbe Jesús barū uncua, Moisés irū Elías. ³³ Moisés irū Elías, poxonaē baponbe Jesús weya naetababe, bapoxonaē Pedro Jesús baraichichi, jeye:

—Jiwi Necuidubin, maisa wənae xua xote pata ume-naewa. Pacata acabinchi acoibi po boutobe, cae bouto xam nexa, icha bouto Moisés nexa, icha bouto Elías nexa.

Ichitha Pedro beta jopa yaputaeyo xua baxua paeba. ³⁴ Poxonae Pedro cataunxuae barɯ cueicueijei Jesús, bapoxonae daxita pexainya bematawacaicha taruneicatsi tsaquinaebowa. Poxonae barapomonae tsaquinaebowa tututha nataerɯcɯpa bichocono junuwa. ³⁵ Nexata barapomonae tsaquinaebowatha pejume jume tane xua Nacom namchi, jeye: “Bapon apara Taxanto, pon bichocono antobein, pon itapetan. Bapon beta pajume taema pocot-siwa paca tsipaeba”, jei Nacom.

³⁶ Poxonae Nacom najume weta, Pedrobarɯ necobarɯcɯpa xua Jesús beya compa uncuwa. Pedrobarɯ saya moya. Jopa pejumeyo ichamonaetha xua tane.

Meje yabara poxonae Jesús cauri taitaweta xua pewowin xeina

(Mt 17.14-21; Mr 9.14-29)

³⁷ Baya poxonae Jesús barapo acoibi poyobe pijimon-aebe dabe barɯ dunareca Jesús pin bicheito matenta poinchi. ³⁸ Nexata barapo bicheitha jiwana pebin, bapon jume daunwei wawai, jeye:

—Jiwi Necuidubin, incane inta taema taxanto. Bapon taxanto inta compa pebin. ³⁹ Taxanto inta waetabatsi cauri, inta papai exanatsi, yawa inta iratha bebaichi. Matauta inta coibo thamthamei exanatsi poxoru matayaibatsi exanatsi. Inta taxanto cui tatainchi jopa bepu sorobabeibichi barapo cauri. ⁴⁰ Bayatha bequein jinyamonae jume daunweya cui itoroban: ‘Painta taxanto taitawere cauri’, jan. Ichitha jopa itacɯpaetsi xua taxanto inta petaitawetsiwatsi cauri, jei pewowin paxa tatsi.

⁴¹ Jesús barai pin bicheitha, jeye:

—¡Paxam barapomonaе pam pomonaе jopa xapain cataunxuae pana nejume cowuntsim! ¡Paxam barapomonaе pam, peajuntucoyenebe jiwi pam! ¿Eta po weibe nantawenonan xua bewa tapaca baru ecaewa tsainchi xua beya poxonaе tapanа nejume cowuntsiwam tsane? ¿Matautano eta po weibe equeicha nantawenonan xua tapaca cayawenaewatsi tsainchi? jei Jesús.

Nexata Jesús barai pewowin paxa tatsi, jeye:

—¡Nexanto inta carenande! jei Jesús.

⁴² Poxonaе pewowin cataunxuae Jesús itiya poinchi, bapoxonaе equeicha pewowin iratha xotsi cauri. Equeicha pewowin coibo thamthamei exanatsi. Ichitha Jesús taitaweta cauri pewowin. Jesús axaibi exana pewowin. Equeicha Jesús caewa cata. Coxiyан caewa catatsi pexantoxae. ⁴³ Daxita barapo pin bicheito yabara najuntu coyene cabenaeca pocotsiwa pewowin pexeinya coyene taexanatsi Nacom.

Meje yabara poxonaе equeicha Jesús nayabara paeba xua poxonaе tupaena

(Mt 17.22-23; Mr 9.30-32)

Poxonaе awiya cataunxuae yabara najuntu coyene cabenaecompa barapo pin bicheito pocotsiwa Jesús exana, bapoxonaе Jesús pijimonaе barai:

⁴⁴ —Incane beta pajume taema, yawa jopa pana nejume cayabara junte mainaeinde. Xan, ponxaein Nacom Tananeitapetsin jiwi, necaenaetsina ichamonaetha xua tanebexubinexa tsane, jei Jesús.

⁴⁵ Ichitha Jesús pijimonaе jopa xapain jume yaputaetsi xua barai. Barapomonaе jopa tacopatichi Nacom xua Jesús pejume yaputaewa tsainchi. Barapomonaе junuwa xua Jesús yabara peyainyabiwa tsainchi xua Jesús yaputane peexanaenexa xuaunxuae paeba.

Meje yabara poxonae Jesús yabara yainyabatsi pijimonaе po coyene xua pon peainya cui peexanaeinchi

(Mt 18.1-5; Mr 9.33-37)

⁴⁶ Nexata Jesús pijimonaе tatsi caemonaе yabara nayainyaba, najei: “¿Jintam paxantha bichocono peainya cuinda xua beyacaincha ichun?” jei. ⁴⁷ Jesús yaputane baxua pocotsiwa barapomonaе yabara nanta xeina. Nexata Jesús cobe pita pexuyo yawa pexainya cuaranoreca.

⁴⁸ Nexata Jesús barai pijimonaе:

—Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi barapon bara apara nententa weyataeya waba. Xan jopa meisa nententa weyataeya wabiyo apara bara iru matenta weyataeya wabatsi pon tana neitorobixae xua pon bara Nacom. Daxota pon paxam jiwana pam, pon jopa paca tsita ainya cuiyo, bapon jame Nacom tsita ainya cuichi, jei Jesús.

Meje yabara poxonae Jesús barai pijimonaе: “Pon jopa nacata abe exanaeyo, bapon ba apara naca yawena”, jei

(Mr 9.38-40)

⁴⁹ Nexata Juan Jesús baraichi, jeye:

—Ja Tanecuidubim, paxan caein patan pon cawun taiba poxonaе itaweta caurimonaе, xua caurimonaе itawetatsi. Paxan baxua pacui itawetan tsipei jopa naca puna popon-aeyo, jei Juan.

⁵⁰ Ichitha Jesús jume nota, jeye:

—Jopa pacui itawetsinde, tsipei pon jopa nacata abe exanaeyo bapon ba apara naca yawena, jei Jesús.

Meje yabara poxonae Jesús jume itaweta, Santiago iru Juan jume itawetatsibe

⁵¹ Poxonae imoxoyo matabi jopaena, po matabitha Jesús athabe icha tsane, xua Nacom exanaena, bapoxonae Jesús bichocono awiya nantusaba xua peponaewa tsane Jerusalén tomara beya. ⁵² Jesús nawuna jume caitoroba pia jitonbe tatsi. Barapo Jesús pia jitonbe tatsi ponabe Samaria nacia beya. Ponabe xua bo tutu pewucaenexa tsanebe po tomara barapo Samaria nacua eca xua Jesús peecaenexa. ⁵³ Ichitha barapo tomarapiwi xua Samaria nacua jinompa, barapomona aichaxaibi xua Jesús weiweinaya pententa wabiwatsi baxota poxoru barapomona yaputane xua Jesús pona Jerusalén tomara beya. ⁵⁴ Ichitha Santiago iru Juan poxona baxua tanebe, ponbe bequein tawucabe bo tutu Jesús nexa, baponbe Jesús baraichi, jeye:

—Patatanecanamataxeinaem, ¿xam ichichipame xua paxan isoto pawucaein po isoto xua itaboco wetsica xua petautsinexatsi barapomona? jei baponbe.

⁵⁵ Nexata Jesús pijimona napatomeicha necota yawa jume itaweta. ⁵⁶ Nexata equeicha Jesús pijimona baru pona icha tsiqui tomariyo beya.

*Meje yabara poxonae Jesús yabara paeba pomona
ichichipa xua pepuna ponaewatsi*

(Mt 8.19-22)

⁵⁷ Poxonae namtotha enapona, pebin Jesús baraichi, jeye:

—Patatanecanamataxeinaem, ichichipan xua tacapuna ponaewatsi xua ichaxota poname, jei pebin. ⁵⁸ Jesús jume nota, jeye:

—Namomona ba pia muthun xeina ichaxota pemaitathopeibiwa. Iru peyapupunaewi ba coton xeina ichaxota peyamaitathopeibiwa. Nama xan ponxaein Nacom Tananeitapetsin nama jopa daichinyo. Nama jopa xeinaeyo bo xua tabo xua xota nafinacaecan, jei Jesús.

⁵⁹ Jesús barai ichuntha, jeye:

—Nepuna ponde.

Ichitha bapon Jesús jume notatsi, jeye:

—Tanecanamataxeinaem, nepu copare xua taxa matha muthutha xubichi copiya xua bapoxonae tacapuna pon-aenexatsi, jei.

⁶⁰ Jesús jume nota, jeye:

—Bara copare xua petupaewi muthucaeinchi, pomonae xua be pewerapaewi jopa betanejume cowantsiwixae, barapomonae muthucaena. Ichitha xam ponare jinya neyabara tsipaebinexa jiwitha po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae, jei Jesús.

⁶¹ Nexata ichun Jesús baraichi, jeye:

—Tanecanamataxeinaem, ichichipan xua tacapuna ponaewatsi. Ichitha copiya bara necopare xua tana napeyabiwa tsane tamonae, tabopiwi, jei bapon.

⁶² Jesús jume nota:

—Pebinba jopa itacupaetsi xua beta penacuichiwa pabi icha saya napatomeicha necobiya nacuita. Barapocotsi juta coyeneya ichi, icha pebin exana Nacom pia petanacuichiwa tatsi jopa xapain exanaeyo xua peyabara paebiwa po coyene xua Nacom waba jiwi petanaexanaenexatsi pijimonae pomonae itorobiya pecanamataxeinaexae icha bapon saya cayabara nanta xeina pocotsiwa barapo cae pin nacuathe xeina, jei Jesús.

10

Meje yabara poxonae Jesús pijimonae itoroba setenta y dos poyobe pebiwi

¹ Barapoxonae Jesús pon jiwi Pecanamataxeinaeinxae tatsi, bapon itapeta equeicha icha pijimonae tatsi setenta y dos poyobe. Daxita tomarantha Jesús itoroba be dos

poyobe tsiniya, tsica tomaraxithano, pin tomaranthano xua ichaxota Jesús cotacaya ponaena. ² Jesús barai barapomonaexa poxonaxa muxu peitorobi, jeye: “Bara xaniyeya paca tsipaebatsi. Pabitha ba pocotsiwa peubiwan naweta nawita, daichitha ba penacuichiwi pomonaexa jota pinmonaexa aibi. Bara jũta ichi barapo cae pin nacuathe. Jiwi pinmonaexa jinompa pomonaexa nantawenona pejume taenexa Nacom pia pexeinya jume diwesi tatsi. Dai-chitha pomonaexa Nacom Pejume Diwesi cueicueijeji tsurubenanaebiya ichamonaetha barapomonaexa pinmonaexa aibi saya tsiquimonaeyo. Daxota Nacom pawũcare xua pecaitorobinexa tsane ichamonaexa xua petacamuxu tsipaebinexa tsainchi pia pejume diwesi pomonaexa barapo cae pin nacuathe pejinompaewi nexa. ³ Paponde ichaxota paca itorobatsi. Paca itorobatsi pia xainya beya pomonaexa jopa jume cowũntsiyo, pomonaexa itacũpatsi xua abe painya nepaca exanaewa icha oveja ichi xua poxonaxa pona ichaxota neũthũ jinompa xua itacũpatsi xua abe peexanaewatsi. ⁴ Jopa pacaponaeinde cote. Yawa paratixi jopa pacaponaeinde. Yawa jopa pacaponaeinde painya nenataxu xatabiwan. Mataũta jopa ichamonaexa namtotha paewatumeyaeinde xua saya painya netsipaebinexa. ⁵ Poxonaexa bomũxũtha pajojoniyaename, barapo bopiwi pajacobare, pajande: ‘Barabũ Nacom jũntema jinompa paca cana exanaena’, pajande. ⁶ Icha baxota jinompa pomonaexa jũntema jinompa, baxua Nacom taexanaena xua papaebame. Ichitha icha baxota jinompa pomonaexa jopa jũntema jinompaeyo, baxua Nacom jopa taexanaexa tsane xua papaebame. Eque-icha caewa pacata parenaena xua baxua papaebame. ⁷ Barapo botha paenare. Paxaema paapareno pocotsiwa barapomonaexa paca apata. Painya xoba paauram xua paca cata tsipei baraxua xua paca cata painya matoma

painya netanacuichixae Nacom. Jopa ichawa beya paponaeinde bontha, saya bara po botha paenare. ⁸ Poxonae tomaratha papanenebiyam, icha barapomonae paca mantenta weyataeya waba, moya paxaema pocotsiwa barapomonae paca apata. ⁹ Axaibi paexande peatene jiwi, pomonae xua barapo tomaratha ena. Barapomonae pabarande: ‘Anoxuae Nacom waba jiwi xua petanaexanaenexatsi piamonae tatsi pomonae itorobiya peewatsixae’, pajande. ¹⁰⁻¹¹ Ichitha poxonae icha tomaratha papatsiname icha barapo tomarapiwi jopa paca mantenta weyataeya wabiyo, pajande barapomonaetha: ‘¡Po tsorobon panataxu wenunubaban painya tomaratha, apara xua abe paexaname pata xainya berena poxonae pana nejume itawetame! Payaputaema, anoxuae Nacom waba jiwi petanaexanaenexatsi piamonae tatsi pomonae itorobiya peewatsixae ichitha pana nejume itawetame pomonae Nacom pata tana neitorobiwi panxaein’, pajande. ¹² Xaniyeya paca tsipaebatsi matabi patopaena. Barapo matabitha Nacom yabara paebina jiwi xua penatsicuenta xua petsita exanaexaetsi. Barapo matabitha jopa juniya bichocono atene tsane pomonae paca jume itaweta. Ichitha nama pomonae barapo tomaratha jinompa pomonae paca jume itaweta jopa juniya atene tsane, beyacaincha poxonae Sodoma tomarapiwi atene”, jei Jesús.

Meje yabara poxonae Jesús yabara paeba po tomaranpiwi jopa pejume cowantsiwichi

(Mt 11.20-24)

¹³ Jesús equeicha pijimonaetha namchi, pomonae sententa y dos poyobe xua ichamonae yabara paebatsi, jeye: “¡Pai jaibo Corazín tomarapiwi tsobenae! ¡Iru Betsaida tomarapiwi tsobenae! Po tsita itutsi coyenewan exanan Corazín tomaratha yawa Betsaida tomaratha

ichun jopa bapana exanaeyo barapo tsita itutsi coyewewan Tiro tomaratha yawa Sidón tomaratha. Icha barapo tsita itutsi coyewewan exanaetsipa Tiro tomaratha Sidón tomarathano, barapo tomaranbepiwi icha penanta xeinae coyewewatha yabara nanta pentsipa Nacomtha. Barapomonae iratha enaetsipa yawa paparuwan nama xatabichipa xua pocotsiwa be peru mapaton xua axun, yawa ipuna nacaxuebichipa pia pepontha. Barapomonae baxua exanaetsipa xua ichamonae petsita itapeinya xeinaenexa tsainchi xua icha juntu coyenein Nacom petsita xeinaewatsi peuraxae xua abe peexanaexae. ¹⁴ Poxonae barapo matacabi patopeicaena po matacabitha Nacom yabara paebina daxita jiwi xua petsita natsicuentsexiaetsi xua abe petsita exanaexaetsi, Tiro tomarapiwi, Sidón tomarapiwino, daxita barapo tomarabepiwi bichocono peraxa jubebinchi. Ichitha nama paxam pomonae Corazín tomarapiwi pam, iruru Betsaida tomarapiwi pamdu, daxita paxam jopa juniya paca peraxa jubebi tsane, beyacaincha xua peraxa jubebinchi Tiro tomarapiwi iru Sidón tomarapiwi. ¹⁵ ¡Incane iru Capernaum tomarapiwi pamdu! ¿Bara pananta xeiname xua paca capanenebiya tsane peitaboco beicha? Jume, apara paca itorobina petupae coyene cuiru bereca.

¹⁶ “Pon xua paca jume naitawata, barapara nejume naitawataru. Pon xua paca jume itaweta, barapara nejume itaweta xan berena. Pon xua nejume itaweta, barichi Nacom jume itawetatsi pon xua tana neitorobixae”, jei Jesús.

Meje yabara poxonae equeicha caibe parenaena Jesús pijimonae tatsi pomonae setenta y dos poyobe pebiwi

¹⁷ Barapo setenta y dos poyobe juntu coyene weinaya caibe nawibarena, jeye:

—Patatanecanamataxeinaem, caurimonae pana ne-jume cowunta xua paitawetan poxonae paca wun wun taibatsi, jei Jesús pijimonae tatsi.

¹⁸ Jesús jume nota, jeye:

—Aa, bara bayatha cauri pia pentacaponaein tatsi Satanás tan xua jopeica itaboco wetsica icha yamuxu ichi poxonae uncueica. ¹⁹ Paxam paca catatsi taayapuswa painya netaxunaunabaponaewa tsane jomon yawa puttonno, xua jopa painya nepaca capepeichinexa. Po peayapuswa paca catatsi bichocono daunwei, beyacaincha painya nepaca caaitafaetabi jiton, pon cauri pia pentacaponaein pia peayapuswa tatsi xua xota jiwi abe exanatsi. Jiwi dapomonae aibi pomonae abe paca cana exana. ²⁰ Jopa pajuntu coyene weiweinaeinde xua caurimonae pia paca jume jejeixae xua duxpa poxonae paitawetame, saya jame pajuntu coyene weiweinare xua Nacom painya nepaca wun dubixae pia diborotha itabocotheicha.

Meje yabara poxonae Jesús juntu coyene weiweina exanatsi Nacom pia Pejumope tunaxu tatsi

(Mt 11.25-27; 13.16-17)

²¹ Bara caena bapoxonae Jesús juntu coyene weiweina exanatsi Nacom pia Pejumope tunaxu tatsi. Jesús namchi, jeye: “Axa peitaboco Necanamataxeinaem, yawa ira Necanamataxeinaem. Wuna cajaintatsi tsipei jopa tsita itubim pocotsiwa pexainyei coyenewa xan yabara pomonaetha pomonae bichocono penacuidubiwi pomonae be pinyon penatsicotaewi tsipei nanta xeina xua bichocono peyaputaewi daxita. Jame nama tsita itutame barapo pexainyei coyenewa xan yabara pomonaetha pomonae jopa bichocono penacuidubiwi pomonae be pexui penatsicotaewi tsipei jopa nanta xeinaeyo xua bichocono

peyaputae jiwi daxita. Axa baxua exaname necatsita xanepanaexae baxua”, jei Jesús Paxatha.

²² Equeicha Jesús pijimonaē barai pomonaē xua setenta y dos poyobe, jeye: “Taxa daxita necata xua pia peitorobi coyenewa tatsi matautano xua pia peyaputae coyenewan tatsi. Dapon aibi pon xaniwaicha nejuntũ cui coyene yaputane. Jame saya meisa Taxa Nacom, nejuntũ cui coyene yaputane. Dapon ajibi pon Taxa juntũ cui coyene yaputainchi ichũn, saya meisa Taxaxae juntũ cui coyene yaputan. Matauta barichi Taxa meisa juntũ coyene yaputainchi pon saya bara copatan xua bara Taxa pejuntũ cui coyene yaputaewa tsainchi pomonaē ichichipan”, jei Jesús.

²³ Nexata Jesús pijimonaē napatomeicha necota pomonaē xua doce poyobe. Meisa barapomonaebetha barai, jeye: “Juntũ coyene weiweina pomonaē xua tane, pocotsiwan xua pataneme. ²⁴ Poxoru paca tsipaebatsi, xua Nacom pia peitorobi jume pepaebi jiwimonaē irũ nacuan peewatsiwimonaē, pomonaē bayatha napenta barapomonaē bequein betaena pocotsiwa pataneme ichitha jopa taeyo. Matauta barapomonaē bequein bejume taena pocotsiwa pajume taneme ichitha jopa jume taeyo”, jei Jesús.

Meje yabara poxonaē Jesús yabara paeba Samaria nacuaqin, pon wũnaē exana

²⁵ Nexata irũrũ pon jiwi pecuidubin Moisés pia peitorobi coyene tatsi, barapon Jesús piraichi juntũ coyene jũjũtsiya yainyabatsi xua barapon pejume barabotsinexatsi. Barapon Jesús jeichichi:

—Ja Tanecuidubim, ¿eta xua copiya matha exanocuaein xua ajuntũyapusũya tapoponaewa tsane xua ataya tsane? jei.

²⁶ Jesús jume nota, jeye:

—¿Eta xuara xua barapo Moisés pia peitorobi coyene diwesitha tina? ¿Eta xua yabara yorobame barapo diwesitha? jei Jesús.

²⁷ Pon jiwi pecuidubin Moisés pia peitorobi coyene bapon Jesús jume notatsi, jeye:

—Antobeinde jinya Necanamataxeinaein, bapon Nacom, daxita xua nejuntũ coyene wetsina, matautano xua daxita jinya nepoponae coyenewatha, matautano xua nanta xeiname, daxita xua nenanta xeinaewatha nentasi-patha, matautano daxita xua nedaunwei coyenewatham, matautano antobeinde necatsicuarabũ ecaein icha ichim xua naantobem jinya coutha, jei pon jiwi pecuidubin Moisés pia peitorobi coyene.

²⁸ Nexata Jesús jume nota, jeye:

—Bara beta nejume notame. Icha baraxua exanaename peajuntuyapusũwa xeinaename po peajuntuyapusũwa xua ataya tsiteca, jei Jesús.

²⁹ Ichitha pon jiwi pecuidubin Moisés pia peitorobi coyene tatsi, barapon awiya nanta xeina nawita, pia jiwi nanta xeinaetsi xua bapon xeina pexeinya peyainyabiwa. Bapon Jesús yainyabatsi, jeye:

—¿Jintam barũ pomonae tanetsicuarabũ enaewi? jei.

³⁰ Nexata Jesús jume nota, jeye:

—Iruũ pebin Jericó tomara bereca pona, Jerusalén tomara namtotha weya pona. Poxonae awiya namtotha ecapona jemeicha waetabatsi pomonae jiwi pecaibiwi. Barapon daxita wecobe notatsi xua pocotsiwa xeina, yawa bũtsi. Barapomonae aichurubena, tsica cuiyotha copatabatsi. ³¹ Bapoxonae irũ sacerdotemonaepin barapo namto ecapona. Poxonae barapon yasusũinya taebotatsi sacerdotemonaepin tajũ matawacaicha toquetaba. ³² Iruũ levimonaepin baxoyo ecapona, bapon irũ tajũ matawacaicha toquetaba poxonae yasusũinya taebota.

³³ Ichitha Samaria nacuapin baxoyo iru ecapona poxonae yasusũinya taebota, yabara najuntu coyene xeinanareca peyawenaenexa. ³⁴ Nexata Samaria nacuapin imoxoyo caquita uncuataba pon yasusũinya boca. Bapon wan yawubecapona penasiwatha vino merathano. Bapoxonae paparuwatha wan yarabecapona. Bapoxonae burrotha cuaretsica piyũntha. Bomuxu beya capona ichaxota jiwi maiteibathopa. Baxota xanepanaeya bota. ³⁵ Bapoxonae baya poxonae juntucuru Samaria nacuapin ponaenaba, pita ainya paratixi. Bapoxonae cata pontha pon bo pexeinaein. Samaria nacuapin barai pontha pon bo pexeinaein: ‘Barapon beta xanepanaya bore. Icha paratixi seicanaya, equeicha bexa cacatsinchi poxonae caewa denan tsane’, jei Samaria nacuapin, jei Jesús.

³⁶ Equeicha Jesús namchi, jeye: “Barapo acoibi poyobe jiwana, jintam yabara cananta xeiname xua wnae exana xua peantobexaetsi pon waetabatsi pomonae jiwi pecaibiwi, yawa xua butsin?” jei Jesús.

³⁷ Pon jiwi pecuidubin Moisés pia peitorobi coyene tatsi, bapon Jesús jume notatsi, jeye:

—Pon xua yabara najuntu coyene xeinanareca xua peyawenaenexa, jei bapon.

Jesús jume nota, jeye:

—Ponare, icha pocotsi coyeneya Samaria nacuapin ichi barichiya exande, xanepanaya exande ichamonaetha, jei Jesús.

Meje yabara poxonae Jesús, Marta yawa María siwa poinchibe

³⁸ Jesús pijimonaе cataunxuae baru ecapona namtotha Jericó tomara beya baru pona. Pijimonaе baru patopa tsica tomariyotha ichaxota petsiriwa popona powa pewun Marta. Barapowa Jesús matenta weyataeya wabatsi pia

botha. ³⁹ Marta peyapiyo nantauta powa pewun María. Barapowa María Jesús caquita ecatsi xua Jesús pejume taenexatsi pocotsiwa paeba. ⁴⁰ Ichitha Marta enatsi pia penacuichiwa xua Jesús tsiexanatsi pexaewa xuano xua pijimonaе tatsi nexano. Barapowa pona Jesús beya, namchi, jeye:

—Tanecanamataxeinaem, ¿jopa taem xua tayapiyo necopata xua compa nacuitan? Awiya bobena penacuichiwan. Itorobare bu neyawena, jei Marta.

⁴¹ Ichitha Jesús jume nota, jeye:

—Marta, caenauya jinya nenacuichiwan xua pocotsiwa xua ichichipame neexanaewa. ⁴² Saya cae coyene ainya cui xua xam nantawenoname pocotsiwa xua María exana xua barompaya itapeta xua wñnae exana poxonaе nejume tayeca. Jiton dapocotsin aibi xua pon María juntu coyene weaichurubenaе exainchi xua nejume tayeca, jei Jesús.

11

Meje yabara poxonaе Jesús pijimonaе yabara cuiduba xua Nacomtha petsipaеbiwa

(Mt 6.9-15; 7.7-11)

¹ Caentacabi Jesús tsipaebaуa Nacom ichawatha. Jesús najume weta, bapoxonaе pijimonaе tatsi jiwana poyobe xua doce poyobe Jesús baraichi, jei:

—Jesús, Patatanecanamataxeinaem, pana necuidubare xua Nacomtha pata tsipaеbiwa, icha Juan ichi xua pijimonaе cuiduba, jei bapon.

² Jesús barai barapomonaе, jeye:

—Poxonaе Nacom patsipaebame, pajande:
‘Pata Taxam xam ponxaem peitabocotha athabeicha neecaеin.
Barabu daxita jiwі cabaru cui itura jina nejuntu coyene wñnaewa nexenaеxae.

Barabũ jopaena matabi po matabi xua
poxonae xam jiwi itorobiya canamataxeinaename
barapo cae pin nacuathe.

³ Daxita matabin pexaewa pana catsibeibare po
pexaewa daxita matabi pata canantawenonaewa.

⁴ Pana neyabara cui cana jantemainare
xua abe pata catsita exanaewatsi.

Bapoxonae pana neyabara cui cana exanare xua
jopa equeicha pata catsita natsicuentisiwatsi
tsainchi xua abe pata catsita exanaewatsi.

Baraxua painta exande icha paichin ichamonaetha.

Tsipei paxan copiya payabara cui cana exanan
xua ichamonaewa jopa pana netsita natsicuentisiyo
xua abe pata tanetsita exanaewa.

Jopa pana copatsinde xua abe pata exanaewa
tsane poxonae jiwi pana nejũntũ coyene

jũjũta xua abe pata exanaewa tsane',

pajande poxonae Nacomtha patsipaebame, jei Jesús.

⁵⁻⁶ Equeicha Jesús barai, jeye:

—Metha beya tsipae xua caein paxam jiwana bapon
nantautũ pon peyaputaeinchi. Bapon pia peyaputaeinchi
beya pona papaetha. Pia peyaputaeinchi barai: 'Tamo, ca-
cowaetatsi acoibi po panbe, yaitama icha taneyaputaein
patopa pon anoxuae warapa tabo berena. Jopa xeinaeinyo
xua taapatsiwa bapon', jei pebin. ⁷ Metha pon bomũxũ
tututha boca bapon jume notsipa, jei tsipae: 'Jopa ne-
jume fayacotsinde bomũxũ boupa daunwei, tapexui barũ
maituncuan camatha. Jopa benontaponaeinyo xua pan
tacacatsiwa tsane', jei tsipae pon bomũxũ tututha boca.

⁸ Paca tsipaebatsi bequein bapon bomũxũtha jopa benon-
taponaeyo, bequein bara pia peyaputaeinchi, daichitha
cata poxoru jume fayacotatsi pia peyaputaeinchi. Mataũ-
tano cata daxita xua pia peyaputaeinchi nantawenona.

⁹ Daxota paca tsipaebatsi. Matowa pawncare Nacom, bapoxonae paca catsibina pocotsiwa xua pawncame. Baraxua matowa paexande icha paichim poxonae matowa pajeiteibame beya poxonae pataebame, yawa icha paichim poxonae matowa pawawam bomxuxtha beya poxonae ichun paca jume nota. ¹⁰ Tsipei pon matowa wncsa ichun bara catatsi. Tsipei pon matowa necoba, bara taeba. Tsipei pon bomxu pecoibototha matowa wawai bara tacoibo sarana xorenatsi yawa jume notatsino.

¹¹⁻¹² “Paxam pomonae pexui paxeiname paca yainyabatsi. Poxonae painya pexui paca wncsa duwei, xpainya pexui pacatsipame jomo? Jume. Ichacuitha tsipae poxonae painya pexui paca wncsa petobx, xpainya pexui pacatsipame puto? Jume, jopa baxua paraichim tsane.

¹³ Bara bequein peajuntucoyenebe jiwi pam, ichitha paxam payaputaneme xua pewncawwan painya pexui pacatsibeibame. Ichitha nama Nacom painya axa jopa juniya paca catsiyo Nacom pia Pejumope tuncaxu tatsi poxonae pawncame. Nacom paca cata beyacaincha poxonae painya pexui pacatsibeibame poxonae paca wncqueiba”, jei Jesús.

Meje yabara poxonae Jesús baraichi xua pinae xeina Beelzebú pia peayapusu itorobi coyenewa tatsi

(Mt 12.22-30; Mr 3.20-27)

¹⁴ Iruru Jesús taitawetauya cauri xua pebin muxusipana exainchi. Poxonae cauri pebin wepu poinchi, bapoxonae pebin equeicha paeba. Jiwi yabara najuntu coyene cabenaeca poxonae baxua tane. ¹⁵ Ichitha ichamonae namchi: “Bapon caurimonae itawetatsi apara pexeinaexae Beelzebú pia peayapusu itorobi coyenewa tatsi pon caurimonae pia pentacaponaein tatsi”, jei barapomonae.

¹⁶ Ichamonae Jesús wꝛcatsi: “Pana netsita itũre peitũ-panaewa xua peitaboco wetsica jopeicaena”, jei. Barapomonae baxua paeba poxoru ichichipa xua Jesús tsita itũtsina, pia yaputaetsi icha barapon pon yatsicaewa Nacom itoroba. ¹⁷ Ichitha Jesús yaputane xua barapomonae nanta xeina. Jesús barai:

“Icha cae nacuapiwi nawepu tsatabe xua mataũta nababe, bapoxonae jopa xaexaenaecaeyo. Mataũta irũru icha cae bõ matabũxũyomonaebe nababe yawa nawepu tsatajopabe, bapoxonae jopa xaexaenaecaeyo. ¹⁸ Barichi icha Satanás pijimonae tatsi nawepu tsatajopabe mataũtano xua nababe bapoxonae jopa xaexaenaecaeyo. Satanás jopa itacũpaetsi xua itoroba pijimonae tsipei amsiya exana. Baxua paca tsipaebatsi tsipei naerabiya pana baram: ‘Apara bapon cauri itaweta Beelzebú pia peayapusũ itorobi coyenewa tatsi pexeinaexae pon cauri pia pentacaponaein tatsi’, pana neyabara jam. ¹⁹ Icha Beelzebú pia peayapusũ itorobi coyeneya tatsi cauri itawetan pon cauri pia pentacaponaein tatsi, ¿naxata eta po peayapusũ itorobi coyeneya tatsi painyamonae cauri itaweta? ¿Irũru barapomonae cauri itawetatsi Beelzebú pia peayapusũ itorobi coyeneya tatsi? Daxota painyamonae paca yaputane xua apara paxam panaerabame. ²⁰ Ichitha nama xan cauri itawetan Nacom pia Pejumope tũnaxũ tatsi pia peayapusũ itorobi coyenewatha tatsi xua barapo pia pejumope tũnaxũ tatsi tanecatsixae. Baxua apara paca tsipaebatsi painya neyaputaenexa, xua painya xantha patopan ponxaein Nacom Tananeitapetsin.

²¹ “Pebin ba pon bo pexeinaein pon xua maxũ daunwei, bapon nayanaba xua xuan peopi sojeiwan. Daxota pocotsiwan xua xeina pia botha bara xaniwaicha tabobeinchi. ²² Ichitha icha ichũn patopa pon beyacaincha maxũ daunwei, bapon ba nawita yawa caiba barapo peopi sojeiwan

xua xuan ботмху pexeinaein nanta xeina xua barapoc-otsiwantha bara xaniwaicha nayaewata. Poxonae barapo peopi sojeiwan bapon caiba tatsana ichamonae bichocono pematataeuncuaexae.

²³ “Pomonae jopa neyawenaeyo, barapomonae apara inta abe exana. Barapomonae exana xua ichamonae jopa tana nejume cowuntsiwa tsane. Barapomonae jopa neyawenaeyo xua ichamonae nenacaetutsina tajiwiwon-aexae tsane”, jei Jesús.

Meje yabara poxonae Jesús yabara paeba cauri xua caewa nauyata pebintha

(Mt 12.43-45)

²⁴ Equeicha Jesús namchi, jeye: “Poxonae pebin wepu poinchi cauri, bapoxonae cauri pona wexotha ichaxota ira tsewa pepoponaenexa tsane baxota. Ichitha poxonae jopa caxinaeyo xua ichaxota pepoponaenexa bapoxonae bapon nabarai: ‘Tha caibeya ponaetsi pebin beya ichaxota bayatha wepu ponan’, jei cauri. ²⁵ Poxonae caibeya pona cauri caxina, pebin caxinatsi xua xanepanaya popona. ²⁶ Nexata equeicha cauri pona pebin weya. Pira-paeyo bapon baru patopa siete poyobe cauri pomonae bichocono abe, beyacaincha bapon pon copiya. Daxita barapo caurimonae pebin xeina. Anoxuae bapon nama yatsícaya bichocono abe cana exainchi beyacaincha poxonae copiya abe cana exainchi poxonae saya caein”, jei Jesús.

Meje yabara poxonae Jesús yabara paeba po coyene pepa pejuntú coyene weiweinaewa

²⁷ Poxonae Jesús cataunxuae cueicueijei tsuncuae barapo diwesi, baxota pin bicheitha petsiriwa jume daunwei wawai Jestutha, jeye:

—¡Maisa ena juntú coyene weiweina powayo xua bay-atha caexana yawa xua mito caapatano! jei petsiriwa.

²⁸ Ichitha Jesús barai petsiriwa, jeye:

—¡Bequein barichi, jame yatsicaewa jũntũ coyene wei-weina pomonae jume tane xua Nacom paeba xuano xua exana pocotsiwa Nacom itoroba! jei Jesús.

Meje yabara poxonae pomonae peajũntũcoyenebe jiwi Jesús cui itorobatsi xua peexanaewa tsane pexeinya petsita itutsi coyenewa

(Mt 12.38-42; Mr 8.12)

²⁹ Jesús imoxoyo matawacaicha umenatsi pin bicheito. Jesús barai barapo pin bicheito, jeye: “Jiwi pomonae anoxuae jinompa barapomonae peajũntũcoyenebe jiwi. Barapomonae necui itoroba xua bepa pinae tsita exanaein tatsita itutsi coyenewa xua pexeinya coyenewa. Ichitha jopa exanaein tsane icha tatsita itutsi coyenewa xua pexeinya coyenewa, saya meisa exanaein icha bayatha jũta coyene cana ichichi Jonás pon Nacom peitorobi jume pepaebin, pon caena bayatha tũpa. ³⁰ Caena bayatha Nĩnive tomarapiwi Jonás yaputainchi pon Nacom peitorobi jume pepaebin xua po coyene bapon Jonás Nacom peitorobinchi, tsipei Nacom bichocono Jonás ainya cui exanatsi. Xan ponxaein Nacom Tananeitapetsin Nacom ainya cui neexana. Daxita jiwi pomonae anoxuae jinompa barapomonae neyaputane po coyene xua xan Nacom neitorobica peitaboco wetsica. ³¹ Matacabi patopeicaena po matacabitha Nacom yabara paebina jiwi xua penatsicuentsiwa daxita peperaxa exanaenexa xua abe peexanaexae. Barapo mataqueitha tsane petsiriwa powa caena bayatha tũpa, bapowa asiya uncuaena Nacom peitabaratha tatsi. Barapowa pia nacua, nacuapiwayo, po nacua pocotsiwa parowa bereca tajũ bereca eca. Barapowa pia nacuapiwi tatsi itorobiya pia pepa peewatsiwayo. Barapowa yabara cueicueijei tsane pomonae xua anoxuae jinompa poxonae uncuaena Nacom peitabaratha

tatsi. Jei tsane bapowa: ‘Maisa pomonae xua jinompa poxonae Mesías popona po irathe deque, barapomonae abe bichocono peexanaewi tsipei ajuntucoyenefaetabiya jume tane pocotsiwa Mesías cuiduba bequein Mesías bichocono peyaputaein’, jei tsane barapowa. Barapowa baxua paebina poxoru bapowa bayatha tajũ werena pona pesiwa ponaenexatsi Salomón, pon caena bayatha Israel nacuapiwi itorobiya pia pepa peewatsinchi. Bapowa yaputane xua Salomón bichocono peyaputaein xua Nacom peyabara yaputaewatsi. Daxota bapowa ichichipa xua pecuidubinexatsi xua Salomón pecuidubinexa Nacom yabara. Nama xote uncuanje ponxaein taexanaein pocotsiwa pepa peainya cui coyenewa xua tacuidubin daxita jiwitha xua Nacom yabara. Barapocotsi coyenewa toxeinchiya ainya cui coyenewa beyacaincha po cui coyene Salomón exana poxonae cuiduba xua barapowa cuidubatsi xua Nacom yabara. ³² Barichi barapo matabitha Nínive tomarapiwi pomonae caena bayatha jinompa barapomonae abeya paca yabara paebina poxonae umenaena Nacom peitabaratha. Barapomonae baxua exanaena tsipei barapo Nínive tomarapiwi icha jũntũ coyene xeina Nacomtha peuraxae xua abe exana caena bayatha poxonae Jonás muxuwetsiya tsi-paeba barapomonaetha Nacom pia pexeinya jume diwesi tatsi. Ichitha paxam jopa bara paichim, jopa icha jũntũ coyene paxeinaem. Nama apara xote uncuanje ponxaein taexanaein pocotsiwa pepa peainya cui coyenewa xua tacaponaewa Nacom Pejume Diwesi daxita jiwitha. Barapocotsi coyenewa toxeinchiya ainya cui coyenewa beyacaincha Jonás po cui coyene exana poxonae Nacom Pejume Diwesi capona Nínive tomarapiwitha”, jei Jesús.

Meje yabara poxonae Jesús yabara cuiduba jiwi po coyene

xanepanaya peexanaewa pe jũntũ coyene wetsina

(Mt 5.15; 6.22-23)

³³ Jesús namchi jiwitha jeye: “Jiton dapon aibi pon pecoicha cueicha exana xua quirei pebũxũ pana wetsina, yawa xua cueicha matacateta cajatha. Jume, jame, asiya cueicha exanatsi xua pecoicha taenexa pomonae jojoneibarena. ³⁴ Pecoicha ba yonoyonei merawi painya nepaca cayawenaenexa xua beta painya netaewa tsane quireitha. Barichi painya itacuereton painya nepaca cayawenaenexa xua beta painya netaewa tsane. Icha painya itacuereton wũnae bara beta pataneme. Ichitha icha painya itacuereton abe jopa beta pataetsipaem. Barichirũ painya jũntũ coyenewan xua painya nenanta xeinaewan. Icha painya jũntũ coyenewan xanepanaetsipa bara beta Nacom payabara najũntũ coyene xeinaetsipame. Ichitha icha painya jũntũ coyenewan jopa xanepanaetsipae jopa beta Nacom payabara najũntũ coyene xeinaetsipaem. ³⁵ Painya jũntũ coyenewan paca cana exanaetsipa xua bichocono abe paexanaetsipame daxota dota pam. Painya xoba merawi paponame icha jopa paxeinaem xua peyonoyoneiwa poxoru cotacaya panapapeichipame. Barichi pam, painya xoba pajinom-pame icha jopa paxeinaem xua pocotsiwa beta painya neyabara nanta xeinaewa Nacom poxoru cotacaya abe paexanaetsipame. ³⁶ Icha painya jũntũ coyene wũnae, xuano xua jopa paxeinaem peabe coyenewa painya jũntũ coyenewa, bara xaniwaicha Nacom payabara yaputaneme icha poxonae pecoicha paca cana ichi xua beta pataneme”, jei Jesús.

Meje yabara poxonae Jesús muxuweta jiwi fariseomonae irũ pomonae jiwi pecuidubiwi Moisés pia peitorobi coyene tatsi barapomonae pecuiyainwa tatsi

(Mt 23.1-36; Mr 12.38-40; Lc 20.45-47)

³⁷ Poxonae Jesús najume weta, fariseomonae jiwana pin Jesús wabatsi xua petaxaenexa tsainchi pia botha. Jesús joniya yawa ecoundeca pexaethopaewatha.

³⁸ Fariseomonae najuntũ coyene cabenaecaeya necotecataba xua Jesús jopa matha tsiwanaya penacobe quiatsiyoxae poxonae xane icha judiomonae ichi, xua saya pia cui coyene tatsi xua barapomonae nanta xeina icha jopa matha nacobe quiatsiyo Nacomtha natsicuentſipa. ³⁹ Nexata Jesús pon Pecanamataxeinaeinxae jiwi, fariseomonaepin baraichi:

—Paxam fariseomonaepiwi pam, paxam jopa ba juniya paexaneibim poxonae meisa panaperũ iquicame. Dai-chitha bũpana iya painya jũntũ coyenetha pecaibi coyene paxeiname, peuwi coyeneno paxeiname. Be barapocotsi jiwi pam, pocotsimonae coroton saya matawacaicha iquica yawa paratonno, ichitha atutuxuira bichocono. ⁴⁰ Jopa peyaputae jiwi pam. Nacom exana wapepon yawa exana wajũntũ coyenewa. ¡Baxua payaputane-meba! ⁴¹ Xua xoxi paxeineibame matha abũ copiya pajiwana tsabeibare pomonae peacopeibiwi nexa. Bapoxonae xua xoxi nacopabeiba baxua panata copabeibare. Icha bara paichim tsane, bara xaniwaicha pajũntũ coyene xanepaname Nacomtha. Yawa jopa panantawenonaem xua pana nacobe iquiqueibame jiwi peitũtha xua be panatsicotaneme pocotsi pebin pejũntũ coyene wũnaein.

⁴² Equeicha Jesús namchi, jeye: “¡Paxam fariseomonaepiwi pam tsobenae, xua peperaxa perũ jubiwa bexa paxeinaename! Daxita xua painya neũbiwa Nacom pacatsibeibame caewaxi poxonae diez xoyobe paxeineibame. Iru xua tsiwaxino pacatsibeibame. Bequein baxua paexaneibame ichitha Nacom jopa paantobem. Mataũta ichamonae jopa xapain pata exanaem. Bewa paexanaem xua Nacom pacatsibeibame caewaxi poxonae diez xoyobe

paxeiname. Yawano bewa paantobem Nacom. Yawano bewa xainyeya paexanaem jiwitha”, jei Jesús fariseomon-aepintha.

⁴³ Bapoxonae Jesús fariseomonae baraichi, jeye: “¡Paxam fariseomonaepiwi pam tsobenae! Bexa paxeinaename xua peperaxa perũ jũbiwa. Paxam paichichipeibame xua painya nenanta caenebiwa pexeinya peenaewantha judiomonae pia penacaetutsi botha po peenaewan ichaxota enathopeiba pomonae ainya cui penaexanaewi. Matautano paichichipeibame xua jiwi paca wũnae jainteiba poxonae paca jacobanaamtotha, xua jiwi painya nepaca barũ itura jinaenexa”, jei Jesús.

⁴⁴ Equeicha Jesús namchi, jeye: “¡Moisés pia peitorobi coyene tatsi, jiwi pecuidubiwi pam tsobenae! ¡Iru fariseomonae pam tsobenae! Poxonae jiton ba pona namtotha jopa tsaqueinaeyo xua jiton piwa baxoyo bocareca mũthũ deca, xua peayeiwa poxoru jopa wũnaeyo. Paxam bara paichim. Jiwi imoxoyo paca caquita pona jopa tsaqueinaeyo xua pocotsiwa painya jũntũ coyenetha pananta xeiname xua abe xua jopa pecui wũnaewiyo”, jei Jesús.

⁴⁵ Nexata pomonae jiwi pecuidubiwi Moisés pia peitorobi coyene tatsi, barapomonae jiwana caein bapon Jesús baraichi, jeye:

—Jiwi Necuidubin, poxonae baxua paebame, apara irũ pana neyabara jam poxonae catsawiya paebame, jei.

⁴⁶ Nexata Jesús jume nota, jeye:

—¡Iru paxam Moisés pia peitorobi coyene tatsi jiwi pecuidubiwi pam tsobenaem! Tsipei paxam ichamonae paitorobame xua capona pocotsiwa arewe pocotsiwa jiwi bapana jopa itacũpaetsi xua pecaponaewa, ichitha paxam jopa pata yoichaem, mataũta bara cae cobesitiyotha jopa

pata yoichaem. Jiton ba itoroba ichuntha xua pecapon-aenexa pocotsiwa jopa juniya arewiyo, xua pocotsiwa jopa itacupaetsi xua pecaponaewa pon itoroba. Bara paichim paxam ichamonaе pacuidubame xua jopa itacupaetsi xua peexanaenexa baxuan xua pocotsiwa iru xua jopa paca itacupaeyo xua painya neexanaewa baxuan.

⁴⁷ “;Paxam patsobenaem! Paxam petupaewi pomonaе Nacom peitorobi jume pepaеbiwi payamuthu acabame boutixi bequein painya amo susato jiwi juteba barapomonaе. ⁴⁸ Poxonaе baxua paexaname, ichamonaе patsita itapeinya xeiname xua paxam bara iru paichichipameru pocotsiwa xua painya amo susato jiwi juteba xua barapomonaе pomonaе Nacom peitorobi jume pepaеbiwi jutebatsi. Daxota barapo petupaewi payamuthu acabame boutixi.

⁴⁹ “Daxota Nacom peyaputae jumetha namchi: ‘Itorobicaein barapomonaetha taitorobi jume pepaеbiwi iru pomonaе taitorobiwi. Ichamonaе pomonaе taitorobi jume pepaеbiwi jutebinchi. Ichamonaе pomonaе taitorobi jume pepaеbiwi abe exanaeinchi. Ichamonaе, pomonaе taitorobiwi jutebinchi. Ichamonaе, pomonaе taitorobiwi abe exanaeinchi’, jei Nacom peyaputae jumetha”, jei Jesús. ⁵⁰ Equeicha Jesús namchi, jeye: “Pomonaе anoxuae jinompa Nacom cana exanaena xua barapomonaе peraxa jubebinchi petsitaxaetsi xua barapomonaе penatsicuentsiwa xeina, tsipei jiwi juteba xua Nacom peitorobi jume pepaеbiwi jutebatsi caena bayatha xua weya xua poxonaе Nacom aena forota barapo cae pin nacue. ⁵¹ Painya amo susato jiwi jujutebapona xua pomonaе pejuntu coyene xeicaе jiwi jutebatsi. Copiya matha Abel bexotsi beya poxonaе iruru Zacarias bexotsiru. Barapon Zacarias pabexubame Nacom pin pia botha ichaxota xua barapo bo tututha

naitama taeuncuabe xua be pexaethopaewa xua ichaxota duwei tauteiba Nacom nexa iru ichaxota po tutu yatsicaewa Nacom pia tutu. Daxota paca tsipaebatsi Nacom cana exanaena xua daxita paxam pomonae anoxuae pajinompame paca peraxa jubebina tsipei Nacom patsitame xua paxeiname penatsicuentsiwa xua painya amo susato jiwi pejutebixae barapomonae”, jei Jesús.

⁵² Equeicha Jesús namchi, jeye: “¡Paxam jiwi pecuidubiwi pam tsobenaem xua Moisés pia peitorobi coyene tatsi! Paxam ayapube paexaname xua jiwi peyaputaewa Nacom Pejume Diwesi poxoru icha caununaya pacuidubame, xua jopa xapain pocotsiwa Nacom paebiyo. Paxam jopa pajume cowuntsim Nacom matauta jopa pacopatsim xua ichamonae iru pejume cowuntsiwa Nacom”, jei Jesús.

⁵³ Poxonae Jesús baxua paeba poxonae cataunxuae jopa natsixatabiyo, fariseomonae iru pomonae jiwi pecuidubiwi Moisés pia peitorobi coyene, daxita barapomonae Jesús bichocono casebatsi. Barapomonae Jesús muxu fayacotatsi xua yainyabatsi nawita, peamuxuconae exanaenexa tsainchi. ⁵⁴ Barapomonae Jesús piraichi matowa yainyabatsi peyaputaenexa icha Jesús ajumebeya jume bara botsina.

12

Meje yabara poxonae Jesús yabara cueicueijeji jiwitha xua fariseomonae itara beta paeba ichitha jopa xapain exanaeyo

¹ Poxonae cataunxuae Jesús cueicueijeji tsuncuae, bapoxonae ayei jiwi nacaetutapona Jestutha. Jiwi nataxu taxunaunaba. Jesús tamropata pitaba xua cueicueijeji jiwitha. Copiya matha Jesús pijimonae tsi-paeba, jeye: “Dota pam jopa pajume naitawatsinde

fariseomonaē pia pecuidubi coyenewa tatsi xua painya nejume cowantsiyainwa. Barapomonaē itara beta paeba ichitha jopa xapain exanaeyo. ² Daxita diwesiin xua po diwesiin bequein anoxuae jiwi jopa yaputaeyo, bexa yaputaena. Pocotsiwa jiwi abe nameicha exana daichitha ichamonaē bexa yaputaeponaena baxua. ³ Paxam xua po diwesi merawi nameicha pana natsipaebame, barapo diwesi ichamonaē mataqueitha jume taena. Matautano pocotsiwa paxam aisawatha pana namuxu paxapaxeya tsipaebame, barapo diwesi ichamonaē panatha paca jume canawabiya wawai tsane”, jei Jesús.

Meje yabara poxonaē Jesús yabara paeba xua pontha bewa ba jiwi cuitaya cunuwina

(Mt 10.26-31)

⁴ Equeicha Jesús pijimonaē barai, jeye: “Tamonaē paxam paca tsipaebatsi jopa pacuitaya cunuwinde pomonaē xua itacupatsi xua paca necajutebiwa xua meisa painya pepontha. Ichitha barapomonaē jopa itacupaetsi xua equeicha paca jumopein tūnaxū jutebina. ⁵ Ichitha yabara paca tsipaebatsi pontha jame bewa pacuitaya cunuwim, bapon apara jame Nacom. Tsipei bapon itacupatsi xua painya nepaca bebaiwa pin isototha po pin isototha jopa bapana itacounayiyo xua weraweraca painya nepaca exanaenexa painya pepon. Xaniyan paca tsipaebatsi bewa jame pacunuwim bapon Nacom.

⁶ “Jiwi ba caenaeta siri cinco poyobe, saya ainya paratiyobe nantomata. Bequein barapo siri caenaeta jiwi xua jopa matoma nautsiyo, ichitha Nacom jopa yabara jūntemainaeyo siri, matautano caeyono jopa yabara jūntemainaeyo. ⁷ Irū daxita painya nentanan Nacom daxita matapaeicha paca matana ununa. Jopa pajunuwinde tsipei paxam Nacom bichocono patsita ainya cuim bey-acaincha siri”, jei Jesús pijimonaetha.

*Meje yabara poxonae Jesucristo yabara paeba xua pomonae peyabara paebiwichi ichamona peitabaratha tatsi
(Mt 10.32-33; 12.32; 10.19-20)*

⁸ Equeicha Jesús namchi pijimonaetha, jeye: “Yabara paca tsipaebatsi pomonae xua nayopita ichamonaetha, pomonae xua najei: ‘Apara paxan Jesús pijimonaetha tatsi pan’, najei. Barichi xan, ponxaein Nacom Tananeitapetsin xuya jan tsane matatsunpiwitha. Barapomonaetha apara tana nejume cowuntsiwi, jan tsane xuya barapo Nacom pia matatsunpiwi tatsi peitabaratha tatsi. ⁹ Ichitha pomonae xua neyabara jei ichamonaetha: ‘Jopa dapon payaitaeinyo’, jei, xan ponxaein Nacom Tananeitapetsin xuya barapomonaetha yabara jan tsane Nacom pia matatsunpiwi peitabaratha tatsi: ‘Apara barapomonaetha jopa yaitaeinyo’, jan tsane.

¹⁰ “Xan ponxaein Nacom Tananeitapetsin pon abe neyabara paeba Nacom itacupatsi xua bapon peyabara juntemainaewatsi pocotsiwa bapon abe neyabara paeba. Ichitha pon nama Nacom pia Pejumope tunaxu tatsi bichocono abe yabara paebatsi Nacom jopa bapana yabara juntemainaetha bapon.

¹¹ “Paca caponaena judiomonaetha pia penacaetutsi bontha ichaxota nacaetuteiba pentacaponae. Paca caponaena pomonaetha pomonae peyabara paebi jiwu xua penatsicuentiwa xua abe peexanaexae yawa tomara pia pentacaponae peitabaratha tatsi paca caponaena. Poxonaetha baxua paca exanaena, jopa payabara najuntu coyene exabinde pocotsiwa xua painya nejume notsiwa xuano xua painya netsipaebiwa tsane barapomonaetha. ¹² Poxonaetha juntucuru pacaunutsiya paebiname, bapoxonaetha Nacom pia Pejumope tunaxu tatsi paca tsijume dubina pocotsiwa painya netsipaebiwa tsane”, jei Jesús.

Meje yabara poxonaē Jesús pijimonaē yabara tsipaeba pon copei pexeinaein

¹³ Caein pin bicheitotha, bapon Jesús baraichi, jeye:

—Jiwi Necuidubim, taeweicho inta itorobare b̄ necata xua tawa xua taxa pecopiniwa xua xuan taxa bayatha pana nejuntana jeba, jei.

¹⁴ Jesús jume epa pita, jei:

—Maisacai, apara dapon aibi pon necana exana xua xan tapaca yabara paebiwatsi xua painya nenatsicuenta xua abe painya neexanaexae. Matautano apara dapon aibi pon necana exana xua xan be pon tapacata tsabibeiwatsi pocotsiwa painya axa pia pecopiniwan tatsi, xua bayatha paca juntana jebeiba painya axa, jei Jesús.

¹⁵ Yawa Jesús namchi, jeye:

—Dota xua asiwiya paantobem xua xoxi paxeiname. Bequein pebin copei nawita xeinaetha, ichitha barapo pebin jopa yawenaetsi xua beta pepoponaewa, jei Jesús.

¹⁶ Nexata Jesús tsipaeba jiwitha pecayabara j̄ta pepaebi diwesiyo, xua jeye: “Iru matha pebin popona pon copei pexeinaein. Pia pabi tatsi pexaewa tanawetatsi nawita. ¹⁷ Pon copei pexeinaein nexata pia coutha nabarai: ‘¿Eta bichocuaein tsane? ¿Eta xota jebocuaein pocotsiwan pabitha notan?’ jei. ¹⁸ Pia coutha najume nota: ‘Bara yaputan tha xubichi pexaewa matabon. Tha equeicha acabichi po bon bichocono pin bon. Barapo pin bontha daxita pexaewa etsin yawa etsinno daxita pocotsiwa xeinan. ¹⁹ Nexata najunt̄u coyene baran tsane: Bara daxita xeiname ainya wei dapaein nexa. Nafifinacaecare, xaibare, apeibareno, junt̄u coyene weiweineibare’, najei xua najunt̄u coyene barai pon copei pexeinaein. ²⁰ Ichitha pon copei pexeinaein Nacom barai bapon, jeye: ‘Pebin pon jopa xapain nenanta xeinaem, methaunxuae anoxuae merawi t̄paename.

Daxita baxuan xua yabo notame, ¿jintam metha piawa tsane?’ jei Nacom. ²¹ Baxua barichi pon xua saya copei yabara nanta xeina nawita pecaetubinexa. Bapon Nacom copei xeina taetha, Nacom tsitatsi xua bapon apara acopeibi, tsipei bapon pejuntũ coyene tatsi tsocuae xua Nacom jopa pejume cowuntsixaetsi”, jei Jesús.

Meje yabara poxonae Jesús yabara cuiduba po coyene xua Nacom eena pijimonae

(Mt 6.25-34)

²² Bapoxonae Jesús pijimonae tsipaeba, jeye: “Paca tsipaebatsi, jopa bichocono payabara najuntũ coyene ex-abinde pexaewa xua painya neuna jinompaewa tsane. Barichi jopa bichocono payabara najuntũ coyene ex-abinde parabũrũ xua painya pepon nexa. ²³ Pocotsi asũ pejinompaewa xua Nacom naca cata jame baxua ainya cui, beyacaincha pexaewa xua peuna jinompaewa. Pepon ainya cui irũ, beyacaincha parabũrũ xua pepon nexa. ²⁴ Uni payabara yaputaema. Bapomonae jopa ũbiyo pabitha. Mataũtano jopa jotsiyo pocotsiwa penawet-siwa. Jopa xeinaeyo bomũxũn xua pejebinexa pexaewa. Ichitha Nacom, uni apatatsi pexaewa. Paxam nama bichocono Nacom patsita ainya cuim jame, beyacaincha peyapupunaewi xua Nacom tsita ainya cuichi. ²⁵ Dapon aibi pon paxam jiwana pon itacũpatsi xua xeinaena icha matabi xua po matabitha pepoponaewa tsane poxonae tũpaena. Bequein bapon nayabara nantũ ex-aba nawita baxua, ichitha jopa itacũpaetsi xua xeinaena caentacabi equeicha. ²⁶ Icha jopa paca itacũpaeyo xua paexaname xua be conotha xua caentacabi nexa, ¿eta xua metha equeicha yabara panantũ exabame ichawan xua daunwei bichocono?

²⁷ “Jame pacayabara nanta xeinare pentonon xua xuwa, xua matono itũpana. Pentonon jopa nacuichiyo yawa

jopa natsiexanaeyo papaburu penamaxatabinexa. Ichitha paca tsipaebatsi xua pentonon matono itupana bichocono beyacaincha pocotsi paparuwa Salomón nama xatata xua pexeinya paparuwa. Bapon Salomón pon caena bayatha judiomonae itorobiya pia pepa peewatsinchi pon bayatha tupa. ²⁸ Pentonon, po matonon wexotha anoxuae xuwa, Nacom cana exana xua matono itupana. Ichitha pebiwi baya matono tautsina ichaxota pocotsiwatha pan seba, tsipei saya pentono. Nacom cana exana xua pentonon bichocono wuna baraquein saya pentonon. Barichi Nacom itacupatsi xua beta paca neca-eenaewa xua beta painya nejinompaenexa. Matautano Nacom paca catsina paparuwan. ¡Maisa pebiwi pam tsobenae be conotha pajume cowuntame Nacom! ²⁹ Jopa payabara najuntu coyene exabinde pexaewa xuano xua painya neapaewan yabara. Jopa panthuthu deideijeya jinompaende xua ichawa pacayabara nanta xeiname. ³⁰ Tsipei barapo cae pin nacuathe jiwi, saya i baxua pecayabara najuntu coyene exabi pocotsiwa nantawenona. Ichitha nama paxam painya Axa Nacom panantautame pon yaputane daxita pocotsiwa xua xoxi panantawenoname. ³¹ Meisa saya bichocono pacayabara nanta xeinare xua painya neexanaewa xua Nacom ichichipa waba jiwi xua jiwi wabatsi xua petanaexanaenexatsi pijimonae pomonae itorobiya pecanamataxeinaexae. Icha baxua paexanaename nexata Nacom paca catsibina xua daxita pocotsiwa panantawenoname”, jei Jesús.

Meje yabara poxonae Jesús yabara cuiduba xua pocotsiwa Nacom jiwi pejuntana jebiwatsi pia nacuatheicha (Mt 6.19-21)

³² Equeicha Jesús namchi, jeye: “Tamona pomonae be ovejamonae pam, painya nejunuwi jiwi pamxaem. Jopa pajunuwinde bequein bara tsiquimonaeyo pam. Painya

Axa Nacom pia coya peichichipaexae pia coya paca cana exanaena pijimonaē tatsi jiwana pam pomonaē pejume cowuntsiwichi pomonaē itorobiya pecanamataxeinaexae. ³³ Pacaenaere xua paxeiname. Barapo paratixi pomonaē acopeibiwi pacatsibare. Poxonaē baxua paexaname, bapoxonaē xuya Nacom athabeicha paca catsibina pocotsiwa xua painya nepaca jūntana jebīwa pocotsiwa xua jopa naxubiyo. Athabeicha pecaibin jopa patopaeyo painya nepaca caibinexa pocotsiwa pajebame bara xoteicha. Matautano ofo jopa xaeyo pocotsiwa xua pajebame bara xoteicha. ³⁴ Ichaxota ba pajebame xua painya neichichipaewan baxota ba payabara nanta xeiname nawita”, jei Jesús.

Meje yabara poxonaē Jesús yabara paeba xua pinae bewa nacui wūnaetichi

³⁵⁻³⁶ Equeicha Jesús namchi, jeye: “Pana najūntū coyene cui wūnaere xua tapatopaewa tsane. Barapocotsi jūta coyeneya paichinde, icha pomonaē petanacuichiwi ichi xua nacui wūnaeta, xua pon bo pexeinaein imoxoyo pepatopaexae. Bapon pon bo pexeinaein nasiwa pona ichaxota jiwī nacaetuta xua pexaenexa pexaewa poxonaē pebin piowa pita. Bapon nawirena bara werena, pomonaē pia petanacuichiwichixaetsi nainya tayausanaxorenatsi pecoiboto poxonaē bapon patopa pia botha. Barapocotsi jūta coyeneya paichinde. Paxam panacui wūnaetsiya jinompare xua tapatopeicaewa tsane. ³⁷ Poxonaē bo pexeinaein patopa icha bapon tane xua pomonaē pia petanacuichiwichixaetsi jopa maichiyo bapoxonaē barapomonaē jūntū coyene weiweina. Bara xaniwaicha paca tsipaebatsi bapon pon bo pexeinaeinxae pia petanacuichiwichi cuireba pexaethopaewatha, bapoxonaē apatsina pexaewa. ³⁸ Pon bo pexeinaein, bara bequein papaetha patopaetha tsipae, ichacuitha bara

bequein metha patopaetha tsipae mataquei wunaeyo, ichitha barapomonaе pomonaе petanacuichiwi juntu coyene weiweinaetsipa poxonaе bo pexeinaein tane xua jopa maichiyo barapomonaе. ³⁹ Barichi payaputaema, icha bo pexeinaein yaputaetsipa xua poxonaе patopaena pon jiwi pecaibin jopa maitecaetsipae. Matauta bapon jopa copatsipae xua pon pecaibin petajondenaewatsi pia botha. ⁴⁰ Bara paichinde. Tawanaetha pana nacui wunaere tsipei xan ponxaein Nacom Tananeitapetsin patopeicaein poxonaе jopa tsaca payabara jinompam tsane poxonaе jopa payabara nanta xeinaem tsane xua tapatopaewa tsane”, jei Jesús

Meje yabara poxonaе Jesús yabara diwesi paeba ponbe xua bo peyapucaeaeinbe pon xua beta peexanaein, iru xua pon jopa beta peexanaein

(Mt 24.45-51)

⁴¹ Nexata Pedro Jesús yainyabatsi:

—Jesús, pata Tanecanamataxeinaem, po diwesi xuaunxuae pana tsipaebame, xua pecayabara juta pepaebi diwesiyo, ¿saya meisa paxan nexa? ¿Iru ichamonae nexano? jei Pedro.

⁴² Jesús pon Pecanamataxeinaeinxae jiwi, Pedro jume notatsi pecayabara juta pepaebi diwesiyotha pepatopaewa tsane yabara, jeye: “Yabara catsipaebatsi pon matacapopona pomonaе bo pexeinaein tanacuitatsi. Barapon xanepanaya yaputaeya matacapopona. Poxonaе bo pexeinaein wepu warapa barapomonaе, pon bo pexeinaein itoroba pontha pon bo petayapucaeaeinchi, jeye: ‘Inta beta matacapoponde, yawa inta beta pexaewa apare daxita matabi pomonaе xua inta nacuita’, jei bo pexeinaein. ⁴³ Pon bo petayapucaeaein bara juntu coyene weiweinaena poxonaе patopaena pon bo pexeinaein, petaexaetsi xua bara beta tayapucaeaca

bo, xuano bara beta peexanaexae xua bo pexeinaein itoroba. ⁴⁴ Xaniwaicha paca tsipaebatsi. Bo pexeinaein itorobina, xua pon petayapucaecaexaetsi bo, bapon cana exanaeinchi xua equeicha daxita piawa beta petayapu enaewatsi xua xuan xeina pon bo pexeinaein. ⁴⁵⁻⁴⁶ Ichitha ichacuitha pon yapucaeca bo bapon peantucuiyapubein tsipae. Bapon pia coutha nanta xeinaetsipa, najei tsipae: ‘Metha bo pexeinaein jopa cuinaya patopae tsane’, najei tsipae. Bapoxonae bapon cueinta pomonae pon bo pexeinaein tanacuitatsi, pebiwi yawa petsiriwaxi. Matautano bapon nanabanaetsipa nawita ichamonae yawa cupatsi nanaexanaetsipano. Bapoxonae bo pexeinaein jemeicha patopaena poxonae pon bo petayapucaecaein jopa wanae tsaqueinaeyo. Poxonae barapo hora tsuxubi jopa yaputaeyo yawa poxonae barapo matabi tsuxubi jopa yaputaeyo. Pon bo pexeinaein itorobina ichamonaetha xua pebenexatsi yawa peperaxa exabinexa tsainchi pon bo petayapucaecaein icha cana ichichi pomonae jopa pejume cowantsiwi.

⁴⁷ “Pon bo yapucaeca, bapon bequein yaputane pocotsiwa pon bo pexeinaein itoroba xua ichichipa, ichitha jopa exanaeyo pocotsiwa itorobatsi, xua bo pexeinaein itoroba. Barapon bichocono peraxa jubinchi xua jopa peexanaexae pocotsiwa itorobatsi. ⁴⁸ Ichitha ichan pon bo yapucaeca jopa cono yaputaeyo pocotsiwa bo pexeinaein itoroba yawa itatemaya abe exana. Bequein jopa cono yaputaeyo yawa itatemaya abe exana, ichitha nantawenona xua peperaxa exanaewatsi be conotha, tsipei abe exana be conotha. Pon ba be conotha Nacom yabara yaputaeinchi, Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowantsiwa tsainchi. Pon ba

jopa ichipaeyo xua Nacom peyabara yaputaewatsi Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

Meje yabara poxonae Jesús yabara paeba xua jiwi ainya bicheiton naexanaena xua Jesús pejume cowuntsixaetsi xua ichamonae jopa pejume cowuntsixae

(Mt 10.34-36)

⁴⁹ Equeicha Jesús namchi, jeye: “Patopan barapo cae pin nacuathe Nacom tana neitorobixae xua jiwi aperaxatane taexanaenexa abe peexanaexae barapo jiwi. Tapatopaewaxae jiwi atene tsane icha be ichi poxonae barapo jiwi tautatsi isototha. ¡Maisa metha bayatha bena baxua exanocuaein barapo isoto! ⁵⁰ Xan barichin tsane daxita matapaeicha aperaxatanein tsane poxonae tupaen. Awiya bichocono anthuthurewein xua beya baxua inta exanaena. ⁵¹ ¿Pananta xeiname xua xan apara patopan xua jiwi jüntema pejinompaewa tsane? Apara aibi, jopa baxua tsipatopaeinyo. Apara jame patopeican taexanaenexa po coyene jiwi naba exanatsi xua daxota ainya bicheiton penaexanaewa tsane. ⁵² Anoxuae, yawa bexa tsane cinco poyobe cae matabuxuyo xua bomuxutha jinompa barapomonae nawepu tsatajopaenabe. Tres poyobe ita aenae-aenei tsane xua dos poyobe ita aenae-aenei tsainchibe. Nantiya barapo matabuxuyobe naita aenae-aenei tsanebe. Baxua exanaena xua ichamonae tana nejume cowuntsi jiwixae xua iru ichamonae jopa tana nejume cowuntsixae. ⁵³ Coxiyan pexanto ita aenae-aenei tsane. Coxiyan xuya pexanto ita aenae-aenei tsainchi. Coxiwa pexantiyo ita aenae-aenei tsane. Coxiwa xuya pexantiyo ita aenae-aenei tsainchi. Iruru pamiyobe naita aenae-aenei tsanebe. Pecopeinyobe naita aenae-aenei tsanebe”, jei Jesús.

Meje yabara poxonae Jesús diwesi paeba xua jiwi itaboco tane peitaboco yaputaenexa

(Mt 16.1-4; Mr 8.11-13)

⁵⁴ Yawa Jesús barai jiwitha, jeye: “Poxonae tsaquinaebowa pataneme xua pocotsiwe wejopeine: ‘Ema dawa jopeina’, pajam. Jopa jume bara duneica. ⁵⁵ Poxonae joibo jopa: ‘Wei imoxoyo’, pajam. Jopa jume bara coicha jopa. ⁵⁶ Itara mexeya pexeinya jüntü coyene paxeiname ichitha peajüntücoyenebe jiwi pam. Itaboco yawa irano panaita caewatame painya yaputaetsi icha ema yawa xua icha pexeinya matacabi. Ichitha jopa payabara yaputaem xua bequein peitüpanaewan exanan, ichitha cataunxuae came awiya jopa payabara yaputaem po coyene xua baxua Nacom taneitorobiwa”, jei Jesús.

Meje yabara poxonae Jesús paeba xua ichün jüntü cui xanepanaya jüntema popona cana exana xua pon peitafaetabixaetsi

(Mt 5.25-26)

⁵⁷ Equeicha Jesús namchi jiwitha, jeye: “¿Eta xua metha painya coutha beta jopa pana nayabara nanta xeinaem xua icha metha wünae painya neexanaewa? ⁵⁸ Icha ichün bepaca itoroba paca necaponaenexa pontha pon jiwi peyabara paebin xua penatsicuentsiwa xua abe peexanaexae nexata bapon patsipaebare poxonae cataunxuae namtotha paca barü ecapona xua painya nenaita coxone exanaenexa. Xain bapoxonae bapon jopa paca caponae tsane pontha pon jiwi peyabara paebin xua penatsicuentsiwa xua abe peexanaexae. Tsipei icha bapon bara beya paca caponaetsipa, bapoxonae pon jiwi peyabara paebin xua penatsicuentsiwa xua abe peexanaexae equeicha dabeya policiamonae beya paca itorobichipa. Bapoxonae nama policiamonae jiwi pecübi bo

beya paca itorobichipa. ⁵⁹ Bara xaniyeya paca tsipae-batsi. Paxam jopa paca pu copabi tsane jiwi pecubi bo weya, beya abũ poxonaē panatsipu matomacaename daxita paratixi cuntha po paratixi xua paxeiname”, jei Jesús.

13

Meje yabara poxonaē Jesús yabara paeba xua ainya cui xua icha juntu coyene pexeinaewa Nacomtha

¹ Barapoxonaē ichamonae pata. Jesús tsipae-batsi, jeye:

—Galilea nacuapiwi Jerusalén tomaratha capata duweimonae, Nacom pin pia botha xua barapo duweimonae pejutebinexa petautsinexa xua petuxusi exanaenexa Nacom nexa. Ichitha poxonaē cataunxuae baxua exanompa Galilea nacuapiwi pon Galilea nacuapiwi peyanacua ewatsinchi, pon pewun Pilato poxonaē bapon baxua jume taeba, xua Galilea nacuapiwi exanompa Nacom pin pia botha, bapoxonaē bapon pia soldadomonae itoroba Nacom pin pia bo beya xua pejutebinexatsi Galilea nacuapiwi. Daxita duwei jana, yawa Galilea nacuamonae jiwi jana cae jana naexananaya, jei barapomonae.

² Jesús jume nota, jeye: “¿Eta xua metha pananta xeiname? ¿Barapo pebiwi jutebatsi bichocono yatsicaya abe peexanaewixae beyacaincha pomonae abe peexanaewi pomonae jinompa Galilea nacuatha? ³ Apará aibi. Icha jopa Nacom patsita xeinaem icha juntu coyene, bara paichipaem, paca weraweraca exanaetsipa. ⁴ Ichacuitha metha pacui cananta xeiname pomonae dieciocho poyobe, pomonae bayatha bomuxutha mata perababatsi xua po botha bichocono taicha po bo pewun Siloé. ¿Barapomonae mata tsapababatsi bichocono abe peexanaexae beyacaincha pomonae jinompa Jerusalén tomaratha?

⁵ Apará aibi. Icha Nacom jopa patsita xeinaem icha

juntũ coyene, paxam bara paichipaem paca weraweraca exanaetsipa”, jei Jesús.

Meje yabara poxonae Jesús yabara paeba higuera nae xua po diwesi pecayabara jũta pepaebi diwesiyo

⁶ Nexata Jesús tsipaeba pecayabara jũta pepaebi diwesiyo. Bapon namchi, jeye: “Matha irurũ pebin higuera nae xeina po nae ubanota pia pabitha. Barapo pebin pia pabitha pona pia taetsi icha yacuei dubena. Ichitha poxonae tane jopa yacuei dubenaeyo. ⁷ Nexata pon pabi pexeinaein tsipaeba pontha pon pabi petayapu eenaeinchi, namchi, jeye: “Taema acobi po weibe pabitha poneiban tha bequein taibichi pethei ichitha jopa yacuei dubeneibiyo. Uncataxore. Jopa ichichipaeinyo xua came barapo nae saya uncua ichaxota ubanotinchi icha nae, po nae penacoichi nae’, jei pon pabi pexeinaein poxonae tsipaeba pon pabi petayapu eenaeinchi. ⁸ Ichitha pon pabi petayapu eenaein jume nota: “Tanentacaponam, abũ barapo nae uncuaena barapo weithe. Tha yaira tabaca nacuenacuena exanaetsi paraparatotha, bapoxonae duwei petasin jebarecaetsi petabaca deca. ⁹ Metha bapoxonae matono dubenaetsipa icha weitha. Icha jopa matono dubenae tsane icha weitha nexata moya beuncataxotsi’, jei pon pabi petayapu eenaein”, jei Jesús.

Meje yabara poxonae Jesús axaibi exana yabũyo pentaquei seicae matabitha powayo naepasi xurutsiya pona

¹⁰ Caentacabitha judiomonaе barompaya pia pentaquei seicae matabitha tatsi Jesús cuidubauya Nacom Pejume Diwesi judiomonaе pia penacetutsi botha tatsi. ¹¹ Barapo botha yabũyo eca, powa caena bayatha atene dieciocho po weiyobe. Barapowa naepasi xurutsiya pona. Barapowa

xua juntucuru epasi boipana ajibi. ¹² Poxonae barapowa Jesús tane, Jesús waba barai, jeye:

—Yabũyo anoxuae jopa neraichiwa, bayatha wũnaem, jei Jesús.

¹³ Nexata barapowa Jesús pecobetha jayaba. Bapoxonae yabũyo epasi naroitaba yawa barapowa wũnae jainta, Nacom wũnae jaintatsi. ¹⁴ Ichitha pon pecanamataxeinaein judiomonae pia penacaetutsi bo tatsi, bapon Jesús casebatsi xua axaibi peexanaexae pentaquei seicae matabitha. Bapon barai jiwitha, jeye:

—Bara irũ seis po matabibibe xua be cae semanatha tsoponeibi xua barapo matabintha benacuitatsi. Jame barapo seis matabintha moya papare xua axaibi painya nepaca exanaewa tsane. Nama jopa papatsinde pentaquei seicae matabitha, jei bapon pon pecanamataxeinaein judiomonae pia penacaetutsi bo tatsi.

¹⁵ Bapoxonae Jesús jume nota, jeye:

—Itara mexeya pexeinya jũntũ coyene painya nex-einaewi ichitha peajũntũcoyenebe jiwi pam. Ichitha paxam irũ panacuitame pentaquei seicae matabitha. Burro ba payama isanaxubame, bueyno ba payama isanaxubame painya apatsinexa mera pepa mene beya barapo pentaquei seicae matabitha. ¹⁶ Barapowa powayo Abraham pia pemomoxi susatopiwi jiwawayo tatsi. Barapowa caena bayatha atene exanatsi. Satanás atene exana dieciocho po weyobetha. Daxota irũrũ barapowa xan axaibi exanan pentaquei seicae matabitha, jei Jesús.

¹⁷ Poxonae Jesús baxua caunuta, bapoxonae pomonae Jesús pia peaitafaetabiwichi aura tsumenae. Ichitha daxita jiwi jũntũ coyene weiweina petaxae xua Jesús pexeinya pewũnaewa exana.

Meje yabara poxonae Jesús cuiduba pecayabara jũta
pepaebi diwesiyo po peabi xutiyo pewan mostaza xutiyo
(Mt 13.31-32; Mr 4.30-32)

¹⁸ Equeicha Jesús namchi, jeye: “Poxonae Nacom waba jiwi petanaexanaenexatsi pijimonaе tatsi, pomonaе itorobiya peewatsixae, ¿eta po coyene nacoyene jũpabe? ¿Eta xua paca cuidubinchi xua baxua yabara? ¹⁹ Baraxua apara icha be mostaza xutiyo ichi po mostaza xuto pebin uba pia pabitha. Xuwa beya pin nae tsoponae. Pepinnaexae daxota siri exana coton pemaxuranantha. Icha mostaza xutiyo ichi xua beya pin nae tsoponae, bara jũta ichi Nacom pejume cowantsiwi. Bequein anoxuae tsica bicheitiyo, bexa tsane beya pin bicheito tsoponae tsane”, jei Jesús.

Meje yabara poxonae Jesús cuiduba pecayabara jũta
pepaebi diwesiyo xua levadura yabara xua pan cotowa exana
(Mt 13.33)

²⁰ Barichi Jesús namchi, jeye: “Poxonae Nacom waba jiwi petanaexanaenexatsi pijimonaе tatsi pomonaе itorobiya peewatsixae barapomonaе pin bicheitomonaе naenaexanapona. ¿Eta po coyene nacoyene jũpabe? ²¹ Barapo coyene bara jũta ichi icha levadura matawun ichi, pocotsiwa cotowa exana poxonaе pan exana. Petsiriwa tres po tsoropabe trigo xu beno muxuna cauyentaba levadura matawun pocotsiwa xua cotowa exana pan. Bapoxonaе pentubu naexananaya, cocotowapona tsipei levadura matawun muxunaxuba”, jei Jesús.

Meje yabara poxonae Jesús yabara cuiduba po boupayo
tsica boupayo dena
(Mt 7.13-14, 21-23)

²² Poxonae Jesús Jerusalén namto beya pona, cuiduba tsiniya Nacom Pejume Diwesi po bon epatotha bobena yawa tomaranthano. ²³ Pomonae Jesús cuiduba barapomonae caein jiwana Jesús yainyabatsi, jeichichi:

—Patatanecanamataxeinaem, ¿saya tsiquimonaeyo pomonae capanenebiyatsi? jeichichi Jesús.

Nexata Jesús namchi jiwitha, jeye:

²⁴ —Bequein bichocono ayapube xua naexana Nacom pijimonae pomonae Nacom itorobiya ewata, ichitha bichocono pajǰure xua panaexaname Nacom pijimonae tatsi. Baraxua be poxonae pin bicheitomonae ichichipa xua pejojondenaewa tsica boupayo dena. Bichocono ayapube. Bequein barapomonae ichichipaena xua pejojondenaewa tsane ichitha jopa itacǰrae tsainchi. ²⁵ Barapoxonae matabi jopaena po matabitha poxonae pon bo pexeinaein pecoiboto daunwei exanaena. Paxam pomonae aisowatha paumename pecoiboto padacadacatsiname, pajam tsane: ‘Patatanecanamataxeinaem, painta coibo saranaxorena bomǰǰ’, pajam tsane. Ichitha bapon paca jume notsina. Jei tsane: ‘Bǰ canta jopa paca yaitaetsi xua jopa paca yaputaetsi xua ichaxota werena painya neponaewi’, jei tsane. ²⁶ Paxam pajam tsane: ‘Bara cain bayatha paca barǰ xainchiba yawa paca barǰ apatsiba, yawa bayatha jiwi cuidubameba namtotha pata tomaratha’, pajam tsane. ²⁷ Ichitha Nacom pon painya Nepacacanamataxeinaein paca jume notsina: ‘Aunxuae bayatha paca baraichiba: Bǰ canta jopa paca yaitaetsi. Jopa paca yaputaetsi xua ichaxota werena painya neponaewi’, jan. ‘Taxainya weya panatsixibarǰǰpare. Apra paxam peajǰntǰcoyenebe jiwi pam, xua abe painya neexanaewi’, paca jei tsane. ²⁸ Barapoxonae pataename xua Abraham, irǰ Isaac, irǰ Jacob, irǰ daxita

Nacom peitorobi jume pepaebiwi xua ena Nacom pia peitorobi nacuatheicha. Ichitha paxam baxoteicha jopa pana naenaem tsane poxoru paca bebai tsane Nacom pia peitorobi nacua weya. Daxota pawecoyam tsane anaya nantanuweya pana nawano tsaquibasinaename poxoru paca bebai tsane Nacom pia peitorobi nacua weya. ²⁹ Poxoru pinmonae patsina, Nacom pia peitorobi nacuatha penabanaenexa tsane. Ichamonae pomonae ichaxota xometo ecoina, barapomonaepiwi patsinano. Ichamonae pomonae ichaxota xometo jopeica, barapomonaepiwi patsinano. Ichamonae pomonae ena pocotsiwa bereca, barapomonaepiwi patsinano. Ichamonae pomonae pocotsiwa beweyabeicha ena, barapomonaepiwi patsinano. ³⁰ Pomonae xua anoxuae pepawi naexana pomonae jiwi jopa petsita ainya cui jiwichi po cae pin nacuathe barapomona Nacom pia peitorobi nacuatheicha peainya cui jiwi tsane. Pomonae xua anoxuae, pomonae jiwi petsita ainya cui jiwichi po cae pin nacuathe, barapomona bexa Nacom pia peitorobi nacuatheicha jopa peainya cui jiwi tsane, jei Jesús.

Meje yabara poxona Jesús Jerusalén tomarapiwi siwa wecyeichi

(Mt 23.37-39)

³¹ Barapoxona fariseo jiwana monae pata. Jesús tsipae-batsi. Jeichichi:

—Bewa warapaetsipame barapo tomara weya. Dota bepa Herodes cabexubei, jei.

³² Ichitha Jesús jume nota, jeye:

—Paponare painya netsipaebinexa pon jiwi pemux-ujainyabin, bapon Herodes. Pana nejume yopire pajande: ‘Taema anoxuae yawa baya tsane itawetsin caurimonae jiwi weya yawa axaibi exanaein peatenewi.

Popobaya tsane wetsin', jei pajande. ³³ Ichitha anoxuae yawa baya tsane nantawenonan xua bara beya Jerusalén tomara beya ponaein namtotha. Barapoxonae popobaya patopiyaein Jerusalén tomaratha. Jopa tana neitacupaexae xua tatupaewa taju Jerusalén tomara pepuya beya ponxaein Nacom peitorobi jume tapaebin. Bewa tupaein Jerusalén tomaratha, jei Jesús fariseomonaetha.

³⁴ Bapoxonae Jesús yabara unthuthu wecoyeyi Jerusalén tomarapiwi. Jesús wecoyeya namchi, jeye: “¡Maisa Jerusalén tomarapiwi pam, pajutebeibame pomonae Nacom pia peitorobi jume pepaebiwi! ¡Matautano paxam pajutebeibame ibotontha pomonae Nacom pacata itoroba! ¡Maisa bepaca caetucaetuteibinchi, tapaca cayawenaewa tsainchi, icha wacara ichi poxonae nacoxi caetucaetuteta pecuarafetha! ¡Maisa bebarichocuaein tsane daichitha jopa paichichipaem! ³⁵ Incane pataema Nacom nacui baraxuba xua jopa painya nepaca caewatsiwa tsane. Daxota Nacom jopa poponaeyo pia pin pia botha tatsi painya tomaratha. Paca tsipaebatsi xua equeicha jopa pana netaem tsane, beya abu poxonae pana neyabara jam tsane: ‘¡Maisa bapon jiwi juntu coyene weiweina cana exanatsi, pon patopa Nacom peitorobixae, po Nacom jiwi Pecanamataxeinaeinchi!’ pana neyabara jam tsane”, jei Jesús fariseomonaetha.

14

Meje yabara poxonae Jesús axaibi exana pon peru putsuna

¹ Caentacabi pentaquei seicae matabitha Jesús pona fariseomonae pia pentacaponae tatsi jiwanaein pia botha tatsi penanabanaenexa. Baxota fariseomonae ichamonae Jesús amanayabiya tainchi pecui yaputaenexa tsainchi xua exana. ² Iru baxota pebin patopa ichaxota Jesús naeca. Barapo pebin pon peru putsuna. ³ Nexata

Jesús yainyaba pomonae jiwi pecuidubiwi Moisés pia peitorobi coyene, yainyabano fariseomonae, jeye:

—¿Bara Moisés pia peitorobi coyene jumewatha yabara copata jampa xua pon atene bara axaibi peexanaewatsi pentaquei seicae matabitha jampa? ¿Ichacuiitha metha jopa yabara copatsiyo jampa? jei Jesús.

⁴ Ichitha barapomonae moya umena. Bara Jesús jayaba pecobetha pontha pon atene, yawa axaibi exana, tsipaebano xua bara peponaenexa. ⁵ Jesús tsipaeba, barapo fariseomonaetha, jeye:

—Paxam panantawenoname xua panacuitame pentaquei seicae mataqueitha xua poxonae pajutsiname painya nexanto xua poxonae butecatsi iruba bueyno bara bequein pentaquei seicae matabi, jei Jesús.

⁶ Barapomonae jopa itacupaetsi xua Jesús pejume notsiwatsi.

Meje yabara poxonae Jesús yabara paeba pomonae pexaewa petsiwabiwichi penabanaenexa poxonae pebin piowa pita

⁷ Nexata Jesús tsipaeba barapomonae pecayabara jata pepaebi diwesiyo pomonaetha pomonae xua pata penabanaenexa. Baxua tsipaeba poxonae tane xua barapomonae nanta caeniya, copiya penabanaenexa. Jesús namchi barapomonaetha, jeye:

⁸ —Poxonae ichun cawaba jinya nenabanaenexa tsane, jopa nantacaecaeinde ichaxota enothopeiba pomonae peainya cui jiwi. Poxoru metha iruru patopaetsipa pon bichocono jiwi tsita ainya cuichi pon beyacaincha xam. ⁹ Pon xua cawaba, iru xua wabatsi pon jiwi tsita ainya cui naexanatsi, bapon cabarai tsipae: ‘Incane nontaponde icha muxunenetha ecare. Cotacaya xaema. Ichaxota ecame, baxota ecaena pon jiwi tsita ainya cui naexanatsi’,

jei tsipae pon xua paca mata canabane. Nexata icha muxunenetha uranaya ecoundecaetsipame. ¹⁰ Daxota poxonae cawaba nenabanaenexa, cotacaya ecareinca necajeinexa poxonae patopa pon paca mata canabane: ‘Tajiton, icha muxunenetha ecare ichaxota xaiba pomonae jiwi tsita ainya cui naexanatsi’, jei. Bapoxonae pomonae pata xua penabanaenexa barapomonae cayaitaena xua xam pon jiwi tsita ainya cui naexaname. ¹¹ Pon pia coutha peainya cui jiton naexana pejuntũ coyenetha, Nacom exanaena xua bapon pecui pawijiton naexanaena. Ichitha pon xua pepawi naexana pejuntũ coyenetha Nacom exanaena xua bapon peainya cui jiton naexanaena, jei Jesús.

¹² Yawano Jesús barai pontha pon pexaewa petsiwabix-aetsi, jeye:

—Poxonae pexaewa tsiexaname yawano ichacuitha xua poxonae pin penabanaewa tsiexaname, jopa wabinde jinya jiwimonae penabanaenexa. Irũ jopa wabinde eweichomonae irũ jinyamonae irũ pomonae copei pex-einaewi. Poxoru barapomonae pentoma exanaetsipa xua xuya catsi wabichipa penabanaewa. ¹³ Jame maisa poxonae jiwi pexaewa tsiexaname yawano ichacuitha pin penabanaewa tsiexaname, wabare pomonae peacopeibi jiwi. Yawa wabare pomonae jopa peainya cui jiwi, irũ pejayujayujei jiwino, irũ pomonae peitata nacatsi jiwino. ¹⁴ Bapoxonae jũntũ coyene weiweinaename. Barapomonae jopa itacũpaetsi xua xuya necatsi wabiwa penabanaewa xua pentoma nexa. Ichitha Nacom cata exanaena pentoma poxonae jiwi asũ exanaeinchi pomonae pejuntũ coyene wũnae jiwi, xuano xua exana pocotsiwa Nacom itoroba, jei Jesús.

Meje yabara poxonae Jesús cuiduba pecayabara jũta pepaebi diwesiyo xua pin penabanaewa peexanaewa

tsane

(Mt 22.1-10)

¹⁵ Poxonae baxua jume tane, pomonae xua xayena, barapomonae caein jiwana Jesús baraichichi, jeichichi:

—¡Pon xua nanabane Nacom pia peitorobi nacuathe-
icha tatsi, bapon bichocono jünta coyene weiweina! je-
ichichi Jesús bapon.

¹⁶ Nexata Jesús jume nota, jeye:

—Pebin pin penabanaewa tsiexana jiwi. Barapo pebin
itoroba ichun, xua pewabinexa ayei bicheito. ¹⁷ Poxonae
barapo hora tsuxubi poxonae pexaewa nacui wunaeta,
bapon itoroba pia petanacuichinchi xua pewabinexatsi
pomona bayatha wabatsi. Barapon namchi: ‘Pajande
jiwi: Antha pajojondena jei. Pexaewa weta jei, pajande’,
jei pon mata canabane. ¹⁸ Ichitha daxita barapomonae
paeba xua pinae enatsi xua peexanaewa. Ichun namchi:
‘Bayatha pabi comotan, tha canta matha taetsi. Nexata
nejume yopire pinae jopa casebinde yaitama pinae jopa
patopae tsane, jande’, jei. ¹⁹ Ichun namchi: ‘Canta
diez poyobe comotan buey. Tha canta matha taetsi.
Nexata nejume yopire pinae jopa casebinde yaitama
pinae jopa patopae tsane, jande’, jei. ²⁰ Ichun nam-
chi: ‘Canta anoxuaetha taseuri pitan. Nexata nejume
yopire pinae jopa itacupaetsi xua pepatopaewa tsane,
jande’, jei. ²¹ Poxonae caibe nawiya pon penajume
caitorobinchi bapon daxita baxua tsipaeba pia pecana-
mataxeinaeinchitha. Nexata pon pecanamataxeinaein
caseba pomonaetha pomonae bequein pewabixae, xua
jopa pepatsixae. Bapon barai pia petanacuichinchi, jeye:
‘Nainya ponde tomara namtontha, yawa tsiqui nam-
toxitha tomara cuariya. Berene peacopeibiwi caponde,
penabenaewi caponde, pejayujayujeimonae caponde,
pomona peitata nacutsi jiwi berene caponde’, jei pon

pecanamataxeinaein. ²² Pon petanacuichin pia pecanamataxeinaeinxaetsi, bapon pia pecanamataxeinaeinxaetsi barai: ‘Tanecanamataxeinaem, xua neitorobame bayatha exanan, ichitha bomaxu jopa tutu canaapaxubiyo, jiwi yayatha’, jei. ²³ Nexata bapon jume notatsi pia pecanamataxeinaeinchi: ‘Equeicha nainya ponde tomara cuariya beya po namton pin namtontha, yawa tsiqui namtoxithano tomara cuariya. Baxota jume daunweya itorobare pomonae xua taneme xua pepatsinexa tabotha petutu canaapaxubinexa tsane. ²⁴ Catsipaebatsi, pomonae bequein waban ichitha jopa patsiyo, barapomonae jopa nabanae tsane tabotha’, jei pon pecanamataxeinaein, jei Jesús.

Meje yabara poxonae Jesús paeba xua pinae bewa matha nacui barapentsi pia peexanaewan poxonae Jesús pepuna jinnompaewa tsainchi

(Mt 10.37-38)

²⁵ Pin bicheitomonae Jesús puna poinchi. Jesús napatomeicha necota, namchi barapomonaetha, jeye: ²⁶ “Icha pebin ichichipa xua tajiwiwimonae jiwanapin penaexanaewa tsane, bapon bewa yabara naitematsi pia peexanaewa. Bapon jame bewa neantobe tsane beyacaincha xua paxatha, beyacaincha xua penatha, beyacaincha xua piowatha, beyacaincha xua pia pexuitha, beyacaincha xua peweichowitha, beyacaincha xua pamchoxitha, yawano xua beyacaincha naantobe pia coutha, nexata bapon bara tajiwiwimonaepin. Ichitha icha jopa baxua exanaeyo xua bichocono nama tana neantobewa, bapon jopa tajiwiwimonaeyo. ²⁷ Matautano pon jopa awiya exana ducuaenaebiyaeyo pocotsiwa itoroban, tsipei jopa beperaxa exanaetsi icha be xua poxonae neichi nexata bapon jopa tajiwiwimonaepinyo. ²⁸ Poxonae pebin imoxoyo bo exana, po bo, pin bo, copiya matha nanta xeina

xua bo yabara, copiya coichaxu ununa, icha j̄p̄ra xua pec̄ubaponaenexa pomonae nacuita bo. ²⁹ Ichacuithar̄u saya naewa wetanota, poxoru coichaxu axu weraweraca. Daxota jopa yaputaeyo xua pewetsiwa. Ichamonae pata, barapomonae bo taenota. Poxonae tane barapomonae cui capona, bapon cui caponatsi. ³⁰ Barapomonae namchi tsane, jei tsane: ‘Barapon tamropata pitaba bo xua acaba, ichitha jopa itac̄paetsi xua pewetsiwa’, jei tsane”, jei Jesús. ³¹ Equeicha Jesús namchi: “Ir̄r̄u pon jiwi itorobiya pia pepa peewatsinchi ichichipa xua jiwi naba exana ich̄n beya pontha pon ir̄u jiwi itorobiya pepa peewatsin. Poxonae bapon baxua exana, copiya nanta xeina, najei tsane: ‘Jamaisa, saya beisa diez mil po soldadomonae bicheitobe neyaewatacua, bapon netsi veinte mil po soldadomonae bicheitobe yaewatatsi. Metha tamonae jopa inta itac̄paetsi xua peamanayabiwa barapo veinte mil bicheitha xua taxainya berena ponaena’, najei tsane. ³² Icha barapon jopa itac̄paetsi xua peamanayabiwa, bapon najume caitorobina ich̄ntha, poxonae cataunx-uae taj̄ eca, ich̄n pon icha nacuapiwi itorobiya pia pepa peewatsinchi xua petapaebinexa tsainchi xua jopa penabiwa tsane yabara, xua equeicha j̄ntema pejinom-paenexa. ³³ Icha bapon ichi pon jiwi itorobiya pia pepa peewatsinchi xua baraxuba xua nanta xeina, xua penabiwa tsane, barichi icha paxam jopa pabarapentsim daxita pocotsiwa paxeiname, jopa paca itac̄paeyo xua tajiwimonae painya nenaexanaewam”, jei Jesús.

*Meje yabara poxonae Jesús diwesi yabara paeba xua be-
quein sare xoya pexaewatha ichitha awiixa axaibi*

(Mt 5.13; Mr 9.50)

³⁴ Equeicha Jesús jeye: “Sare beno, bara beno w̄nae. Ichitha icha barapo sare beno jopa abenataeyo, bapox-

onae jopa peitacupaewatsi xua equeicha peabenataewa. ³⁵ Barapo sare jopa ira nexiyo tsipei naein jopa beta xuwa exanaetsi. Daxota barapo sare jiwi bewa xubi. Icha pamuxu dubename moya pana nejume naitaeware pocotsiwa tapaca tsipaebiwatsi”, jei Jesús.

15

Meje yabara poxonae Jesús paeba pecayabara juta pepaebi diwesiyo xua oveja pe-eenaein yabara xua poxonae pia oveja taeba

(Mt 18.10-14)

¹ Pomonae paratixi pentoma noteibiwi, po paratixi jiwi bewa catsibina pon romanomonaе itorobiya pia pepa peewatsinchi nexa, iru pomonaе abe peexanae cuiru coyene peexaneibiwi daxita barapomonaе Jesús imoxoyo caquita umenarucupatsi xua Jesús pejume taenexatsi. ² Daxota fariseomonaе iruru pomonaе jiwi pecuidubiwi Moisés pia peitorobi coyene tatsi daxita barapomonaе Jesús abe yabara paebatsi. Barapomonaе namchi, jeye:

—Barapo pebin napona pomonaetha pomonaе abe peexanae cuiru coyene peexanaewi, yawa barapomonaetha nanabane, jei.

³ Tsipei Jesús yabara paebatsi barapomonaе, daxota nexata Jesús tsipaeba pecayabara juta pepaebi diwesiyo jeye: ⁴ “Jiton ba xeina oveja cien poyobe, caein tanapuxantsi. Jiton wexotha cuenta pona noventa y nueve poyobe oveja pewenaweneinexa oveja pon beya matapainya taeba. ⁵ Poxonaе jiton oveja taeba pon aichurucuae, juntu coyene weiweinaya bota peutucuratha. ⁶ Poxonaе jiton oveja capatopa botha bapoxonaе piamonaе waba pomonaе petaenaewichi pia botha, pia jiwi wabano, wabano pomonaе petsicuarabu enaewichi. Jiton daxita barapomonaetha barai, jeye: ‘Panebaru juntu coyene

weiweinare tsipei oveja bayatha taeban pon bayatha inta aichurucuae', jei bapon piamonaetha. ⁷ Xaniyan paca tsipaebatsi. Icha jiton ichi poxonaе jũntũ coyene weiweina petaebixae oveja, barichi pomonaе peitaboco beicha ena. Bapomonaе bichocono jũntũ coyene weiweina poxonaе ichũn Nacom tsita xeinatsi icha jũntũ coyene pon copiya penacui matacaetsin xua abe peexanae cuiru coyene exana. Barapomonaе bapon yabara toxeinchiya jũntũ coyene weiweinatsi beyacaincha poxonaе yabara jũntũ coyene weiweinatsi pomonaе xua noventa y nueve poyobe jiwi pomonaе xanepanaya peexanaewi, pomonaе jopa Nacom pentichi", jei Jesús.

Meje yabara poxonaе Jesús paeba pecayabara jũta pepaebi diwesiyo xua yabũyo yabara xua poxonaе taeba paratiyo

⁸ Equeicha Jesús paeba pecayabara jũta pepaebi diwesiyo, jeye: "Petsiriwa diez po paratiyobe xeina xua pecacomocae paratixi. Cae paratiyo taaichurucuaetsi, daxota pecoicha coicha exana. Bo tutu camona bewayo, beya matapainya taeba. ⁹ Poxonaе barapowa paratiyo taeba bapoxonaе pia jitowaxi waba, wabano powaxi pet-sicuarabũ enaewaxichi. Barapowa namchi barapowaxitha: 'Pana nebarũ jũntũ coyene weiweinare poxoru bayatha taeban paratiyo, po paratiyo bayatha inta aichurucuae', jei. ¹⁰ Paca tsipaebatsi barichi peitabocotheicha Nacom pia matatsunpiwimonaе tatsi bichocono jũntũ coyene weiweina poxonaе ichũn Nacom tsita xeinatsi icha jũntũ coyene pon copiya penacui matacaetsin xua abe peexanae cuiru coyene peexanaein", jei Jesús.

Meje yabara poxonaе Jesús paeba pecayabara jũta pepaebi diwesiyo xua pebin yabara pon pexanto cayabara cui jũntemaina xua abe exana

¹¹ Barichi equeicha Jesús paeba icha pecayabara juta pepaebi diwesiyo, jeye: “Jiton xeina pexantobe. ¹² Pon xuyapin paxa barai: ‘Axa, necare xua necopiniwa tsane pocotsiwa xua pana nejuntana jebame bequein cataunx-uae poponame’, jei xuyapin. Nexata barapo jumetha coxiyan pexantobe tsata catabe. ¹³ Pirapaeyo xuyapin piawa caenaeta xua paxa catatsi. Barapo paratixi cuntha tajũ beya pona icha nacua beya. Icha nacuatha abe exana. Barapo paratixi cobe caewitatsi xua nasi cui matacaeta yabũxitha. ¹⁴ Poxonae bapon daxita paratixi wetaxuba, irũrũ mayayo tsuxubirũ barapo nacuatha, barapon muxu piyain petũpae. ¹⁵ Nexata bapon jeita penacuichiwa ichũntha xua barapo nacuatha. Bara barapon itorobatsi xua petayapu eenaenexa marranomona. ¹⁶ Bapon piyain ichichipa xane marranomona pexunenowa xua petsebocoton, tsipei bapon jopa catichi pexaewa. ¹⁷ Nexata bapon pia coutha nanta xeinanaya najei: ‘¡Maisa taxa pia petanacuichiwichi tatsi pexaewa ajainbe, tonsana nawita! Nama xota ecanje tain muxu tatũpae. ¹⁸ Tha tacoyo beya nawiyaetsi ichaxota taxa popona. Metha jan tsane: Axa, Nacom tsita abe exanan, yawa catsita abe exanatsino. ¹⁹ Daxota equeicha jopa be taxanto, nejã. Nenatsicotaema be jinya necata nacuichiwi jiwanan, jan tsane’, najei barapo xuyapin. ²⁰ Nexata bapon paxa beya caibe nawiya.

“Poxonae cataunxuae tajũ jiniya, paxa taebiyatsi, coxiyan pexanto yabara nantanuweya cui nanta xeina. Coxian pexanto matenta cuinaepoinya. Nexata pexanto cobe jayaba. Jũntũ coyene weiweinaya pexanto naisa cateita waetaba peantobexae. ²¹ Nexata barapo xuyapinxae paxa barai: ‘Axa, Nacom abe tsita exanan, yawa abe catsita exanatsino. Daxota equeicha jopa be taxanto nejã. Nenatsicotaema be jinya necata nacuichiwi jiwanan’,

jei barapo xuyapin. ²² Ichitha coxiyan barapo jumetha barai pia petanacuichiwichi: ‘Nainya papire pexeinya paparuwa pamaxatare taxanto. Yawa anillo pacobesi xatare. Yawa pataxu xatare xua penataxu xatatsiwa. ²³ Vacayo pebtiyo poyo nasiteca pacarenande. Pabexore. ¡B̄x̄ xainchi! ²⁴ Poxoru barapo taxanto mexeya nacata t̄p̄awejan, ichitha anoxuae as̄. Bayatha nacata aichawiya, anoxuae matapainya netsita patopa’, jei coxiyan. Nexata bapoxonae tamropata notar̄c̄p̄a xua weiweina poxonae xane”, jei Jesús.

²⁵ Equeicha Jesús namchi, jeye: “Ir̄r̄ pin penabanaewa exanomp̄a, ir̄r̄ matapin pabitha popona. Poxonae bo benawirena busi taeba xua busi tanbaba yawa jume tane xua juinya nawiraba. ²⁶ Nexata barapon pon matapinxae waba caein pomonae penacuichiwi. Yainyaba, jeye: ‘¿Eta xua juinya busi exanomp̄a?’ jei. ²⁷ Nexata barapon pon penacuichiwi jiwana jume nota. Jeye: ‘Apara poxoru neyapin patopa. Axa pana itoroba bepa pinae pabexubin vaca pebtiyo poyo nasiteca, poxoru pinae neyapin xanepanaya as̄ya pepatopaexae’, jei. ²⁸ Ichitha barapon pon matapinxae barapo jumetha anaepana. Jopa bejoniyaeyo botha. Coxian pesato bejoniya, pexanto jume daunweya waba: ‘Owae, antha, antha jonarena’, jei coxiyan. ²⁹ Nexata barapo coxiyan pexanto jume notatsi: ‘Bara xam caena bayatha yaputaneme xua ainya wei cata nacuitatsi yawa jopa cajumefebichi. Ichitha bapana jopa necatsim peweinyo cabritiyo, tajiwimonae tabar̄ nabanaenexa. ³⁰ Ichitha barapo nexanto anoxuae cata patopa, xua jinya paratixi caewitaxuba xua penasi cui matacaetsiwa yab̄x̄itha. Xam penacuichiwi itorobame xua vacayo pebtiyo bexubina poyo nasiteca tayapin nexa’, jei barapon pon matapinxae.

³¹ “Nexata coxiyan jume nota pexanto: ‘Owae, apara

xam cabarũ poponeibatsi. Daxita pocotsiwan xeinan, apra bara jinyawa. ³² Ichitha anoxuae wãnae nawita xua pin penabanaewa, yawa jũntũ coyene weiweinaeinchi poxoru barapo neyapin, pon xua mexeya nacata tũpawejan, anoxuae asũ popona. Caena bayatha nacata aichurucuae, yawa anoxuae matapainya naca tsita patopa', jei coxiyan poxonae pexanto tsipaeba", jei Jesús.

16

Meje yabara poxonae Jesús paeba pecayabara jũta pepaebi diwesiyo xua pebin yabara pon jopa xanepanaya peyapucaecaein bo

¹ Equeicha Jesús tsipaeba pijimonae pecayabara jũta pepaebi diwesiyo. Jesús jeye: "Matha irũ pebin popona pon copei pexeinaein. Bapon xaina pon bo petayapucaecaeinchi. Bapon pon copei pexeinaein tsipaebatsi ichamonae xua pinae pon bo petayapucaecaeinxatsi jopa pinae xapain exanaeyo, saya pinae abe exana, jei ichamonae. ² Nexata bo pexeinaein pon copei pexeinainxae, bapon waba pia petayapucaecaeinchi bo. Bapon barai pontha pon bo petayapucaecaeinchi, jeye: '¿Jame ichamonae jume tan xua pinae inta abe exaname xua tawan? Incane tha taetsi xua po paperantha tinadubame pocotsiwa inta caenaetame, xuano xua inta comocame. Tsipei jopa becaexanaetsi equeicha xua inta yapucaecame daxita tawan', jei. ³ Nexata pon bo peyapucaecaeinxae nacui yabara nanta xaina pia coutha, nabarai: '¿Eta pocotsiwa exanocuaein anoxuae tsipei nama pon tanecanamataxeinaein imoxoyo necopata xua bapoxonae jopa taxainaewa tsane pocotsiwa taexanaewa? Jopa nebusi coxonaeyo xua naein taũncatsiwa pabitha. Auran tsipae xua saya amanaya i tawũqueibiwa paratixi. ⁴ Jaina, bara

yaputan xua po coyeneya exanaein poxonae tanecanamataxeinaein necopatsina, xua poxonae jopa xeinaein tsane tanacuichiwa xua ichamonae tanententa wabeibinexa pia botha', jei. ⁵ Nexata bapon pon bo petayapucaeaein daxita tamropatsiya wawabapona pomonae pia pecanamataxeinaeinchi petantoma amanayabixaetsi. Bapon matha yainyaba pontha pon copiya patopa jeye: '¿Eta xoyobe matoma amanayabame xua jopa cataunxuae catsim pontha pon tanecanamataxeinaein?' jei. ⁶ Bapon jume nota, pon bo peyapucaeaein, jume notatsi, jeye: 'Cien po penasi mera bosibube xua pin bosixibun tha baxua catichi, ichitha cataunxuae jopa baxota matomatsinyo barapo penasi mera bosibun', jei. Pon bo petayapucaeaein xuya jume nota: 'Taema xote xeinanje jinya papera xua tinadutame, cien po nasi bosixibun, jam, xua bexa matomatsiname. Xote nainya ecoundeinque barapo netinadutsiwa, iquinaxore. Icha itaneto dure xua saya cincuenta po penasi mera bosixibube, jande', jei pon bo petayapucaeaein. ⁷ Bapoxonae equeicha ichuntha yainyaba: 'Incane iru xamdu, ¿eta xoyobe tanecanamataxeinaein taacoibichi xua catsiname bapon?' jei. Bapon jume nota, pon bo petayapucaeaein jume notatsi, jeye: 'Tha catichi cien po sacube aro sacun', jei bapon. Nexata pon bo petayapucaeaein xuya jume nota: 'Taema xote xeinanje jinya papera xua bayatha tinadutame xua cien po sacube, jam, xua bexa matomatsiname pontha pon tanecanamataxeinaeintha. Xote nainya ecoundeinque barapo itaneto tsitsinaxore, icha pena netinadutsiwa tinadure xua saya ochenta po sacube, jande', jei pon bo petayapucaeaein. ⁸ Ichitha bo pexeinaein yabara paeba pon bo petayapucaeaeinchi xua pinae bequein bara bapon abe taexana ichitha yaputane xua pocotsiwa pia coutha nayawena xua poxonae pia ji-

wimonaē peexanaewa. Daxota paca tsipaebatsi pomonaē anoxuae jinompa barapo cae pin nacuathe, pomonaē jopa penejume cowuntsiwi nama barichi. Barapomonaē yabara najuntū coyene wūnaeta xua po coyene cae jiwimonaē penaexanaewa xua daxota cae jiwimonaē nantiya penayaweneibinexa. Baxua barapomonaē exana beyacaincha pomonaē Nacom pejume cowuntsiwi.

⁹ “Paca tsipaebatsi ichamonaē pacatsibeibare paratixi xua painya jiwi painya neexaneibinexa po paratixi xeina pomonaē barapo cae pin nacuathepiwi pomonaē abe peexanaewi. Bapoxonaē poxonaē jopa paxeinaem tsane paratixi pomonaē bayatha payawename barapomonaē paca matenta weiweinaya wabina po bontha xua ataya tsitecaeya pajinompaename.

¹⁰ “Pon xua xanepanaya yapucaeca xua poxonaē peya penacuichiwiyo, barichi beta yapucaeca xua poxonaē pin penacuichiwa. Pon naerabiya exana poxonaē peya penacuichiwiyo, barichi naerabiya exanaena xua poxonaē pin penacuichiwa. ¹¹ Icha paxam jopa xanepanaya patayapuentaem xua paratixi xua barapo cae pin nacuathe nexa, Nacom jopa paca itorobiyo xua patayapuentaename xua bapon pia pexeinya pexeinaewa tatsi. ¹² Icha jopa xanepanaya payapucaecaem ichun piawa, metha nexata jopa paca catsipae xua painyawa nexa tsane painya neyapucaenaewamxae.

¹³ “Jiton dapon aibi pon xeina ainya pia pecanamataxeinaeinchibe tatsi xua pon beta tanacuita barapo pia ainya pecanamataxeinaeinchibe tatsi. Tsipei barapo petanacuichin meisa antobeya taexana caeintha pon pia pecanamataxeinaeinchi poxonaē itorobatsi. Icha pia pecanamataxeinaeinchi jopa taraichiyo. Cae pia pecanamataxeinaeinchi xanepanaya taexana. Icha pia pecanamataxeinaeinchi abeya taexana. Barichi jiton pon bi-

chocono antobe Nacom, jopa itacupaetsi xua bichocono peantobewa paratixi poxonae yawa bichocono antobetsi Nacom”, jei Jesús.

¹⁴ Ichitha fariseomonaе pomonaе xua bichocono antobe nawita paratixi, barapomonaе baraxua Jesús jume tayenatsi, yawa Jesús cui caponatsi. ¹⁵ Nexata Jesús fariseomonaе baraichi, jeye: “Paxam barapomonaе pam, xua ichamonaе paca yabara nanta xeina xua pejuntũ coyene xanepanaе jiwi pam. Ichitha Nacom paca jũntũ coyene yaputane xua peajũntũcoyenebe jiwi pam. Xua pocotsiwan jiwi bichocono tsita ainya cuichi, baxuan Nacom bichocono tsita abetsi”, jei Jesús.

Meje yabara poxonaе Jesús diwesi yabara paeba Moisés pia peitorobi coyene tatsi, yawa po coyene Nacom waba jiwi petanaexanaenexatsi pijimonaе pomonaе itorobiya pecanamataxeinaexae

¹⁶ Equeicha Jesús namchi, jeye: “Caena bayatha jiwi xeina Moisés pia peitorobi coyenewa tatsi, yawano xua pomonaе Nacom peitorobi jume pepaebiwi pia pecuidubiwa tatsi, beya Juan patopa. Barapoxonaе caena poxonaе Juan popona pon jiwi Pebautisabin, jiwi paebinouta po coyene Nacom xua waba jiwi petanaexanaenexatsi pijimonaе tatsi pomonaе itorobiya peewatsixae. Jiwi bewa yabara najũntũ coyene sũbi awiya xua pepatsinexa Nacom pia peitorobi nacia beicha tatsi.

¹⁷ “Yapu xanepana xua itaboco yawa ira peweraweracaewa. Nama Nacom peitorobi jume ajumeyapusũ bapana jopa peweraweracaewa bequein bara cae peitorobi coyene”, jei Jesús.

Meje yabara poxonaе Jesús cuiduba xua jiwi piseurixi pepuna penteibiyainwa

(Mt 19.1-12; Mr 10.1-12)

¹⁸ Equeicha Jesús namchi, jeye: “Pon punaxuba piowa yawa ichowa pichapa, bapon abe exana piseuritha yawa Nacom peitútha tatsi, tsipei Nacom tsitatsi xua powa copiya barú popona apara bara piowa tatsi. Barichi pon pita petsiriwa powa pepunaxubixae piseuri, bapon barichi pia coutha abe natsiexana, tsipei Nacom ichowa yabara nanta xeina xua bapowa cataunxuae pia pebin xeina bequein bara punaxuba”, jei Jesús.

Meje yabara poxonae Jesús diwesi yabara paeba xua pon copei pexeinaein irú ichún pon Lázaro

¹⁹ Equeicha Jesús tsipaeba icha diwesi, jeye: “Matha irúru barichi pebin pon copei pexeinaein. Pexeinya paparuwan xua pena paparuwa nama xatabapona. Mataúta daxita matacabi peitupanae nabanaewa exaneiba. ²⁰ Irúru ichún pebin popona, pon pewún Lázaro pon peacopeibin. Bapon Lázaro wan nawita xeina peparútotha. Bapon iratha eca pon copei pexeinaein pia bo boupatha weya tatsi. ²¹ Xua pon copei pexeinaein pia pexaethopaewatha taothopeicatsi pexaewa pepúruwan, baraxua Lázaro ichichipa xaiba. Yawa aurimonae pata xua Lázaro pewan daebinexatsi. ²² Icha matacabitha Lázaro túpa. Matatsunpiwi Lázaro jumope pitatsi. Jumope capoinchi ichaxota Abraham popona athabeicha. Irúru pon copei pexeinaein túpa, yawa múthútha xotsi.

²³ “Pon copei pexeinaein patopa ichaxota pateiba pomonae pewerapeibiwi barapo petúpae cuiru coyene nacuatha. Bapon bichocono atene. Bapon athabeicha necoicha. Bapoxonae Abraham tajú taebiyatsi asiyeicha, yawa xua Lázaro barú equiyatsi. ²⁴ Pon copei pexeinaein wawai: ‘Tamo susato jiwanam, Abraham, necui yabara nanta xeinare. Inta Lázaro itorobinca taneebato memeyatsinexa meratha poxoru bichocono

SAN LUCAS 16:25 127 SAN LUCAS 16:31

netaxua po isotothe uncuan', jei. ²⁵ Ichitha Abraham jume nota: 'Tamonae susato jiwana, nanta xeinatabare xua caena bayatha poxonae cataunxuae asu poponame, xeiname xua acabem xua pocotsiwan ichichipame xua nexainaewa. Xanepanaya poponame. Ichitha nama Lázaro jopa daichiyo poxonae cataunxuae asu popona. Jopa xanepanaya poponaeyo. Xote bapon wuna yabara nantanuweya cananta xeinatsi xua peyawenaenexatsi. Ichitha nama xam jopa caraichiyo. Bichocono caperu weyawa. ²⁶ Yawa pin pitapatororo naca yacaincha ducua. Daxota pomonae ichichipa bara bedunareca taxainya wereca jopa itacupaetsi xua bara beparecaena nexainya bereca. Iru pomonae nexainya weruneina jopa itacupaetsi xua taxainya betsina pepatsinaenexa', jei.

²⁷ "Nexata pon copei pexeinaein jume nota: 'Nexata tamo susatopim cawucatsi inta Lázaro itorobare taxa pia bo beya. ²⁸ Baxota xeinan cinco poyobe tayapin jiwi. Abraham Lázarotha najume carure xua bu tayapin jiwi jopa pepatsinexaru tsane ichaxota uncuan xua bichocono atenein', jei. ²⁹ Ichitha Abraham jume nota: 'Apara neyapin jiwi xeina Moisés pia peitorobi coyene tatsi, yawa Nacom peitorobi jume pepaebiwi pia penacuidubiwan tatsi. Bu barapomonae exana pocotsiwa baraxua pejume coya', jei Abraham. ³⁰ Pon copei pexeinaein jume nota: 'Aa, tamo susato jitom, Abraham, ichitha icha petupaewi jiwana caein siwa ponaena barapomonae beya, barapomonae jume cowuntsina yawa icha juntu coyene pexeinaenexa tsane Nacomtha', jei. ³¹ Ichitha Abraham jume nota: 'Icha barapomonae jopa exanaeyo xua pexanaewa pocotsiwa Moisés pia peitorobi coyene tatsi itoroba, xuano xua Nacom peitorobi jume pepaebiwi pia pecuidubiwan tatsi, barapomonae jopa jume cowuntsipae bara bequein Nacom taitorobichipa xua jiwana caein

pomonaē petupaewi’, jei Abraham”, jei Jesús.

17

Meje yabara poxonae Jesús paeba xua jiton jopa bewa cana exanae ichuntha xua iru abe peexanaewa tsane

(Mt 18.6-7, 21-22; Mr 9.42)

¹ Jesús namchi pijimonaetha, jeye: “Barapo nacuathep-iwi ataya xeineiba po jiwi pecana exanaexaetsi xua ichamonae cana exana xua barapo jiwi abe peexanae cuiru coyene peexaneibinexa xua daxota jopa nejume cowunteibiyo. Ichitha pebin tsocuae xua bapon cana exana, xua ichun cana exanatsi, xua ichun abe peexanaewa tsane.

² Metha jame wunae tsipae xua barapo pebin pin iboto wisi cutsipatsi pin mar mentha barapo iboto cayawa cabutabachipatsino. Tsipei jopa wunae tsipae xua bapon cana exana xua ichamonae abe peexanae xuiru coyene exana pomonaē cataunxuae aena nejume cowanta. ³ ¡Dota pam, xua jopa bara paichim tsane!

“Icha ichun pon iru pejume cowuntsindu, icha bapon pacata abe exana, bapon baxua yabara patsipaebare. Icha icha juntu coyene paca tsita xeinaena peauraxae xua pacata exana, bapoxonae pacui yabara juntemainare pocotsiwa bapon pacata exana. ⁴ Bequein bara bapon abe pacata exana, siete po cuiyobe xua cae matabitha, yawa paca tsipaeba siete po jumeyobe, bapon jeye: ‘Maisa auran tsocuae xua abe pacata exanatsi, equeicha jopa pacata abe exanae tsainchi’, jei pon abe exana. Daxota paca jeichi xua nantawenona peyabara juntemainaewa baxua xua po coyene bapon pacata abe exana”, jei Jesús.

Meje yabara poxonae Jesús yabara paeba xua pin pejume cowuntsi coyenewa

⁵ Jesús pon Pecanamataxeinaein jiwi, equeicha pia peitorobiwi baraichi, jeye:

—Pana cana exande xua bichocono pata jume cowuntsiwa beyacaincha xua anoxuae, jei barapomonaē.

⁶ Nexata Jesús pia peitorobiwi jume nota, jeye:

—Icha paxeinaetsipame xua be peya pejume cowuntsi coyenewiyo xua bequein icha mostaza xutiyo j̄ta ichi xua tsica xutiyo ichitha bara paca itac̄pa xua naewatha painya nejeiwa: ‘Ee, naewa jinya coutha natab̄a jonde yawa pin mar mene beya equeicha uncuare’, painya nejeiwa. Bapoxonaē barapo nae jopa bayatha tsipae poxonaē pajam tsipae baxua, jei Jesús.

Meje yabara poxonaē Jesús paeba xua pocotsiwa jiwi bewa exanaē pocotsiwa pentacaponaein itoroba

⁷ Equeicha Jesús namchi, jeye: “Metha ba paxam jiwana caein xeina pia petanacuichinchi pon penacuichin bapon ira cacobauya, matauta vaca yapu capopona. Bapoxonaē bapon pon penacuichin wexua wenawirena, bo benawirena. Pon paxam jiwana caein metha bapon jopa jei tsipae: ‘Anetha, jondena matha xaema’, jopa jei tsipae bapon. ⁸ Jame bapon jei tsipae: ‘Pexaewa netsīp̄ain exanare. Inta carena tsaibinde pexaewa pexaethopaewatha poxonaē xunaecan. Bapoxonaē cotacaya bexa nabanare’, jei tsipae pon paxam jiwana. ⁹ Pon penacuichin jopa jei tsipaetsi: ‘Jaco xua taneyawenaewam’, jopa jei tsipae pon paxam jiwana. Tsipei saya taexanatsi xua bapon peitorobixae. ¹⁰ Icha pon petanacuichin ichi xua taexana peitorobixaetsi pia pentacaponaein, paxam bara j̄ta paichinde. Poxonaē pawetame pocotsiwa Nacom paca itoroba, pajande: ‘Paxan pata nebusi cui tataewimonae pan xuano pata pecui paw̄i pan, tsipei saya paexanan xua pocotsiwa bewa paexanaein’, pajande”, jei Jesús.

Meje yabara poxonaē Jesús axaibi exana diez poyobe pebiwi, pomonaē peper̄u sawichimonaē

¹¹ Poxonae Jesús cataunxuae ecapona Jerusalén tomara beya nexa, Samaria nacua iya pona yawa Galilea nacua iya pona. ¹² Poxonae Jesús tsica tomariyotha patopa, diez poyobe pebiwi pata Jesús pia xantha tatsi. Barapo diez poyobe peperu sawichimonae, ichitha barapomonae Jesús tajū wetaeumendenatsi. ¹³ Barapomonae wawai, jeye:

—Jesús, pon Patatanecuidubim, pana neyabara najuntu coyene xeinare jinya pata tana neyawenaenexam, jei barapo peperu sawichimonae.

¹⁴ Poxonae Jesús tane barapomonae, Jesús barai, jeye:

—Paponare sacerdotemonaetha painya nepaca cataenexa, jei Jesús.

Poxonae cataunxuae namtotha enapona, bapoxonae barapomonae peru jume tsurucupaе xua peperu sawiwatsi barapomonae. ¹⁵ Barapo diez poyobe jiwana caein, poxonae bapon taeba xua axaibi tsurucupaе, bapoxonae Jesús beya pona, xua caibeya pona, yawa jume daunweya Nacom wūnae jaintatsi. ¹⁶ Barapon pentabocototha uncua Jesús peitabaratha tatsi. Yawa irabe taeuncuareca xua Jesús pejacobinexatsi. Barapo pebin apara pon seicaya Samaria nacuapin. ¹⁷ Nexata Jesús namchi, jeye:

—¿Diez poyobe itara axaibi exanan? ¿Incane dapo nueve poyobe jane? ¹⁸ Bapon apara penanapaincha jinompaewi jiwapanin. Yawa cou compa caiberena pia wūnae jainchichi Nacom, jei Jesús.

¹⁹ Nexata Jesús equeicha pebin baraichi, jeye:

—Nontaponde pondeno, bayatha axaibim tana neyabara jume cowantsixaemxae xua bara tana neitacupaewa xua axaibi tacaexanaewatsi, jei Jesús.

Meje yabara poxonae Jesús yabara paeba po coyene xua poxonae Nacom itorobiya ewatsina jiw

(Mt 24.23-28, 36-41)

²⁰ Fariseomonaē Jesús yainyabatsi namchi, jeye:

—¿Eta poxonaē Nacom itorobina pon peitapetsinxae pata tanecapanenebiwa exanaenexa, xuano xua itorobiya pata taneewatsiwa? jeichichi barapomonaē Jesús.

Jesús jume nota, jeye:

—Poxonaē Nacom itorobiya ewatsina jiwi, barapo coyene jiwi jopa itacupaetsi xua petaewa baxua. ²¹ Daxota jiwi jopa jei tsane: ‘Baraxote bayatha patope’, jopa jei tsane. Matautano jopa jei tsane ‘Xoteiche bayatha patope’, jopa jei tsane. Tsipei apara po coyene xua Nacom itorobiya ewatsina jiwi barapo coyene patopa jiwitha. Daxota Nacom jüntu coyene itorobiya ewatsina jiwi pomonaē pejume cowuntsiwixaetsi Nacom, jei Jesús.

²² Nexata Jesús barai pijimonaē, jeye:

—Matacabin othopaena po matacabintha poxonaē paichichipame xua painya tana netaewam xua ponxaein Nacom Tananeitapetsin xuano xua muxuna bepataebenaename caentacabi xua barapo matacabin jiwana. Dapo jumetha jopa painya nepaca itacupaewa tsane xua painya tana netaewam tsane xuano xua caentacabi xua barapo matacabin jiwana. ²³ Ichamonaē paca jei tsane: ‘Baraxote bayatha patopa bapon’, paca jei tsane. Ichacuitha paca jei tsane: ‘Baraxoteicha bayatha patopa bapon’, paca jei tsane, ichitha jopa paponaeinde bara beya yawa jopa pajume cowuntsinde. ²⁴ Icha yamuxu ichi xua jemeicha yacoicha uncueica, xua coicha nayotaxuba itabocototha, barichi tsane po matacabitha poxonaē patopeicaein ponxaein Nacom Tananeitapetsin. ²⁵ Ichitha copiya nantawenona xua neperaxa jubina ichamonaē. Yawa neitawetsinano pomonaē xua anoxuae jinompa. ²⁶ Icha matha ichi poxonaē Noé caena bayatha pozona jiwi jopa tsaqueinaeyo xua Nacom pin awubo exanaena methaunxuae. Saya barompaya icha jüntu cuitha jinompa daxota

jiwi werapa. Barichi jūta ichi tsane poxonaē patopeicaein barapo cae pin nacuathe xua ponxaein Nacom Tananeitapetsin. Poxonaē patopeicaein jiwi jopa tsaqueinae tsane xua Nacom werapa exanaena barapo jiwi pomonaē jopa pejume cowūntsiyoxaetsi. ²⁷ Pomonaē jinompa poxonaē Noé popona, barapomonaē jūntema nabaneiba, yawa apeiba, yawa apeiba yawa jiwitha jiji- naponā yawa pexantixi jitha dodoubapona, beya yantacabi othopa poxonaē po matabitha Noé pin jera naetha joniya. Bapoxonaē pin ema mū jopa. Daxita Noé wepu bunothopatsi pomonaē jinompa poxonaē Noé popona. ²⁸ Barichirū jiwi pocotsiwa ichamonaē exana poxonaē ichūn pebin popona pon pewūn Lot. Barapomonaē nabaneiba, yawa apeiba, yawa comaqueiba, yawa caenaeteiba, yawa pexaewa ūbeiba, yawa bomūxūn acabeiba. ²⁹ Poxonaē bapon Lot Sodoma tomara wenaetabiya, barapoxonaē iso itere mū, mū othopeica tomaratha, yawa pocotsiwa be ibo pūrū baxua itaboco weothopeicano xua bichocono atou. Daxita Sodoma tomarapiwi werapa. ³⁰ Icha Sodoma tomaratha ichi xua jemeicha iso itere mū, mū othopeica yawa xua jemeicha ibo pūrū itaboco weothopeica, bara jūta ichin tsane jemeicha patopeicaein ponxaein Nacom Tananeitapetsin poxonaē jiwi tsita naitūtsin.

³¹ “Barapo matabitha icha ichūn bo matatupatha uncua, barapon jopa bewa botha joniyaē tsane xua penotsiwa tsane pocotsiwa tabobeinchi bomūxū tututha. Irū pon pabitha popona jopa bewa caibeya ponaē tsane botha, saya jame nainya benaetsiricuaena. ³² Pacui yabara nanta xeinare Lot piseuri tatsi xua tūpa poxonaē jopa nainya naetsiricuaeyo piawan caibe pesiwa necoyaexae. ³³ Pon naantobeya nata exana pocotsiwa bapon ichichipa, bapon jopa xainaeyo peajūntūyapusūwa po peajūntūyapusūwa ataya tsiteca xua Nacom pia nacua beicha. Ichitha

pon neantobeya inta exana pocotsiwa ichichipan bapon xeinaena peajuntuyapusuwa, po peajuntuyapusuwa ataya tsiteca xua Nacom pia nacua beicha.

³⁴ “Paca tsipaebatsi po mataqueitha patopaein, ainya pebinbe ponbe xua nanta jupaya maitecabe, caein matatsunpin pichina, pon pejume cowuntsixae Nacom. Ichun saya cuenta ponaeinchi jopa pejume cowuntsiyoxae Nacom. ³⁵ Iruru ainya yabuyobe nacuara yacatorobauyaenabe, ichowa matatsunpin pichina pejume cowuntsixae Nacom. Ichowa saya cuenta ponaeinchi jopa pejume cowuntsixae Nacom. ³⁶ Iruru ainya pebinbe nacuara nacuitaayaenabe pabitha, ichun matatsunpin pichina, ichun saya cuenta ponaeinchi”, jei Jesús.

³⁷ Poxonae baxua Jesús pijimonae jume tainchi, Jesús yainyabatsi jeichichi, jeye:

—Pata Tanecanamataxeinaem, ¿exota metha baxua exanaena? jeichichi pijimonae.

Jesús pijimonae jume nota pecayabara juta pepaebi diwesiyotha, jeye:

—Quequeremonae ba nacaetuta ichaxota baurin boca. Bara juta paichim tsane paxam pomonae tana nejume cowuntsi jiwi pam pana newunaewatsiname po mataqueitha patopeicaein, barapo mataqueitha panacae-tutsiname, jei Jesús.

18

Meje yabara poxonae Jesús paeba pecayabara juta pepaebi diwesiyoxua yabuyoyabara powa pecuenta tupaewayotsi piseuri xua iru pon jiwi peyabara paebin xua penatsicuentsiwa xua abe peexanaexae

¹ Jesús pijimonae tsipaeba pecayabara jũta pepaebi diwesiyo xua pecuidubinexa, jeye: “Paxam daxita mat-acabi bewa pawũqueibim Nacom. Painya xoba paajũntũcoyenefaetabim tsaibim poxonae pawũqueibame”, jei Jesús. ² Equeicha Jesús pijimonae barai, jeye: “Matha irũrũ tomaratha popona pon jiwi peyabara paebin xua penatsicuentisiwa xua abe peexanaexae. Bapon jopa Nacom cunuwichi. Yawa bapon jopa beta yabara nanta xeinaeyo jiwitha xua peyawenaenexa. ³ Barapo tomaratha irũrũ popona petsiriwa, powa pecuenta tũpaewayotsi piseuri. Barapowa siwa poneiba pontha pon jiwi peyabara paebin xua penatsicuentisiwa xua abe peexanaexae. Barapowa jei tsaibi bapontha: ‘Neyawende, ichũn inta abe exana’, jei tsaibi. ⁴ Pon jiwi peyabara paebin xua penatsicuentisiwa xua abe peexanaexae bapon ainya maticabin juntucuru jopa beexaneibiyo pocotsiwa barapowa wũqueiba. Ichitha bapon matapainya nanta xeina. Najei: ‘Xan apara jopa Nacom cunuwinyo. Mataũta jopa beta tayabara nanta xeineibin jiwi xua tayawenaenexa. ⁵ Ichitha barapo pecuenta tũpaewayotsi piseuri matowa nefayacota dax-ota neamuxufaetabi exana. Metha moya barapowa yawenaen, xua equeicha barapowa jopa penesiwa ponaenexa, tsipei bichocono amuxufaetabin’, najei pon jiwi peyabara paebin xua penatsicuentisiwa xua abe peexanaexae”, jei Jesús.

⁶ Jesús pon Pecanamataxeinaein jiwi equeicha namchi, jeye: “Baxua apara pocotsiwa paeba pon jiwi peyabara paebin xua penatsicuentisiwa xua abe peexanaexae xuano pon jopa beta yabara nanta xeinaeyo jiwitha xua peyawenaenexa. Pajume naitaeware pocotsiwa bapon paeba. ⁷ ¿Eta xua metha pananta xeiname? ¿Metha bara Nacom came bayatha tsaibi poxonae jiwi yaweneibatsi pomonae xua pewũqueibixaetsi? ¡Jume, apara! Nacom nainya

jiwi yaweneiba poxonaē barapo jiwi abe exaneibatsi ichamonaē, beyacaincha xua barapowa yawenatsi. Jame yatsicaewa Nacom yaweneiba pomonaetha pomonaē peitapetsixae pewūqueibixaetsi merawitha yawa mataqueithano. ⁸ Paca tsipaebatsi xua Nacom jopa bayatha tsai biyo xua peyaweneibinexa pomonaē nejume cowūnta. Xan ponxaein Nacom Tananeitapetsin poxonaē patopeicaein, ŷmetha bara pin bicheito taeyopeicaein jampa, pomonaē xua xanepanaya beta tana nejume cowūntsiya jinompaewi pomonaē Nacom pewūqueibiwichi?” jei Jesús pijimonaetha.

Meje yabara poxonaē Jesús paeba pecayabara jūta pepaebi diwesiyo yabara xua fariseomonaē irū pon paratixi matoma penoteibin

⁹ Jesús icha pecayabara jūta pepaebi diwesiyo tsi-paeba pomonaetha pomonaē jiwi peabiwi pomonaē xua nayabara nanta xeina xua pinae beta jume cowūnta xua pinae ichamonaē jopa daichiyo. ¹⁰ Jesús namchi, jeye: “Irū ainya pebinbe Nacom pin pia bo beya ponabe, xua baxotiya pewūcaenexabe Nacom. Ichūn fariseomonaepin, ichūn bapon jiwana pomonaē paratixi pentoma noteibiwi po paratixi jiwi bewa catsibina pon romanomonaē itorobiya pia pepa peewatsinchi nexa. ¹¹ Fariseomonaepin nantacotuncua yawa penthūtotha wūca Nacomtha. Poxonaē tsipaeba Nacom, jeye: ‘Nacom meisa xam nejūntū coyene xanepanaein. Jūntū coyene weiweinan xua tana neyawenaewam tsipei xan jopa be ichamonaeyo pomonaē xua jiwi pecaibiwi, yawa xua peabewi, xuano xua penasi cui matacaetsiwi yabūxitha. Mataūtano xan jopa dapomonaē jiwanyo pomonaē xua paratixi pentoma noteibiwi po paratixi jiwi bewa catsibina pon romanomonaē itorobiya pia pepa peewatsinchi nexa. ¹² Xan cayabara nainbotatsi ainya

cuiyobe xua cae semanatha, beta tacawuqueibinexatsi. Matautano cae paratixi jiwana wetsabeiban xam nexa poxonae diez po paratiximonaebe xeineiban. Yawano daxita xua xeinan baxuano jiwana tsaban xam nexa', jei fariseomonaepin. ¹³ Ichitha pon paratixi pentoma noteibin auranaya tajũ beuncuiya. Saya irabe necoreca yawa jopa athabe necoichaeyo. Saya ƚ penantanuweya penanthũthũ jayabi abe peexanaeinxae. Bapon Nacom wũca, jeye: 'Jaibo, Nacom neyabara najũntũ coyene cui xeinare xua tana neyawenaewam tsane bequein bara taajũntũcoyeneyapubein', jei pon paratixi matoma penoteibin. ¹⁴ Barapon pon paratixi penoteibin poxonae najume weta xua wũca Nacom, nawiya pia bo beya. Paca tsipaebatsi xua barapon Nacom tsitatsi xua jopa xainaeyo xua penatsicuentsiwa xua abe peexanaexae. Ichitha fariseomonaepin jopa daichichi tsipei bapon awiya peajũntũcoyenebein. Pon xua pia coutha peainya cui jiton naexana pejũntũ coyenetha, Nacom exanaena xua bapon pecui pawĩ jiton naexanaena. Ichitha pon xua pepawi naexana pejũntũ coyenetha, Nacom exanaena xua bapon peainya cui jiton naexanaena", jei Jesús.

Meje yabara poxonae Jesús jeye pexuitha: "Barabũ Nacom beta paca yawenaena", jei

(Mt 19.13-15; Mr 10.13-16)

¹⁵ Nexata jiwi Jesús tacaponatsi pexui, xua Jesús pejayabinexa pecobetha yawa xua Nacomtha petawũcaenexa barapo pexui xua pejeinexa: "Barabũ Nacom beta paca yawenaena", pejeinexa. Ichitha Jesús pijimonae tatsi poxonae baxua tane, tamropata notarũcũpa xua barapomonaе cui matawentatsi pomonaе pexui carendena tsaibi. ¹⁶ Ichitha Jesús waba pexui. Jesús pijimonae barai:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua

tatsi saya meisa barapomonaē nexa pomonaē peḵuntũ coyene xanepanaewi icha pexui ichi. Pexui pia cui xua tayapu xanepanatsi xua pia ḵuntũ coyeneintha jume cowũnta Nacom. ¹⁷ Xaniyan paca tsipaebatsi. Pon jopa yabara jume cowũntsiyo xua icha be jopa pexui ichiyo xua ba pexui tayapu xanepanatsi xua jume cowũnta, bapon bapana jopa naexanaē tsane Nacom pijimonaē tatsi pomonaē Nacom itorobiya ewata, jei Jesús.

Meje yabara poxonaē pewowin pon copei pexeinaein Jesús tsipaebatsi

(Mt 19.16-30; Mr 10.17-31)

¹⁸ Caein pon pentacaponae wiwanapin bapon Jesús yainyabatsi, jeichichi:

—Ja Tanecuidubim, maisa neḵuntũ coyene wũnaem. ¿Eta xua copiya matha exanocuaein xua aḵuntũyapusũya tapoponaewa tsane xua ataya tsane? jei.

¹⁹ Jesús jume epa pita, jeye:

—¿Eta xua nebaram: ‘Neḵuntũ coyene xanepanaem’, jam? Apra ichũn dapon aibi pon peḵuntũ coyene xanepanaein. Jame meisa apra bapon Nacom compa peḵuntũ coyene xanepanaein. ²⁰ Xam yaputaneme po coyene Moisés pia peitorobi coyenewatha itoroba xua jeye: ‘Jopa ichowa pichinde ichũn piowa tatsi, jopa ichũn bexubinde, jopa caibinde ichũn piawan tatsi, jopa naerabiya cayabara paebinde pocotsiwa ichamonae exana. Axatha jume barũ cui itura jinare. Mataũtano enatha jume barũ cui itura jinare’, jei Moisés, jei Jesús.

²¹ Pon pentacaponaein jume epa pita, jeye:

—Daxita caena bayatha barapo coyenein exaneiban, poxonaē pexuyothan tamropata pitaban, beya anoxuae yacuiya pinyon, jei.

²² Poxonaē Jesús baxua jume tane, Jesús barai, jeye:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyonexa tsane xua pocotsiwa xanepanaeya neexanaewa, matha daxita caenaere pocotsiwa xeiname, yawa catsibare pomonaetha pomonae peacopeibi jiwí. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha, pocotsiwa Nacom necajuntana botsiwa pocotsiwa bichocono wanae, jei Jesús.

²³ Poxonae barapo pebin jume taeba, bichocono juntũ wecoyeyi, tsipei bichocono copei pexeinaein. ²⁴ Poxonae Jesús tane xua barapon juntũ coyene wecoyeyi, Jesús barai, jeye:

—¡Maisa bichocono ayarubecai xua copei pexeinaewi naexana Nacom pijimonae tatsi jiwana pomonae itorobiya canamataxeina! Tsipei barapomonae bichocono antasiwayatane barapo pia copei, beyacaincha xua Nacom antobetsi. ²⁵ Nama bichocono acuiruyapube xua duwein pon pewãn camello xua bapon pejoniyawa acuicheto peetabũ wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonae tatsi jiwana pomonae itorobiya canamataxeina beyacaincha xua poxonae acuiruyapube xua poxonae camello acuicheto peetabũ wan iya pejoniyawa, jei Jesús.

²⁶ Pomonae xua baxua jume taerucupa, barapomonae Jesús yainyabatsi, jeye:

—Bapoxonae ¿jintam metha nexata itacupatsi xua penacapanepaewa pia coutha? jei barapomonae.

²⁷ Jesús jume nota, jeye:

—Pebiwí ba jopa itacupaetsi xua baxua exana, saya jame meisa Nacom compa itacupatsi xua jiwí napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

²⁸ Pedro barai, Jesús baraichi:

—Tapata Tanecanamataxeinaem, paxan daxita pacuenta ponan pocotsiwa paxeinan pata paca puna ponaewa tsainchi, jei Pedro.

²⁹ Jesús jume nota, jeye:

—Bara xainyeya paca tsipaebatsi. Nacom beta cana exanaena daxita pomonae peyabara cueicueijeixae po diwesi xua Nacom waba jiwi petanaexanaenexatsi pijimonae tatsi pomonae itorobiya peewatsixae. Nacom beta cana exanaena barapomonae pia bon pecuenta ponaexae, yawa piseuri pecuenta ponaexae. Matautano beta cana exanaena pomonae peweichowi pecuenta ponaexae. Matautano beta cana exanaena pomonae pamchowi pecuenta ponaexae. Matautano beta cana exanaena pomonae paxei jiwi pecuenta ponaexae, matautano peniwi pecuenta ponaexae. Matautano beta cana exanaena pomonae pia pexui pecuenta ponaexae.
³⁰ Barapomonae barapo coyenein exana taneantobe jiwixae, daxota daxita barapomonaetha Nacom jopa juniya catsi tsane barapo cae pin nacuathe. Matautano barapomonaetha Nacom catsina pia peitorobi nacuatheicha peajuntucoyeneyapusawa po peajuntucoyeneyapusawa ataya tsiteca, jei Jesús.

*Meje yabara poxonae Jesús nayabara paeba acoibi po coyenebetha xua poxonae tupaena
 (Mt 20.17-19; Mr 10.32-34)*

³¹ Bapoxonae Jesús pijimonae compa waba aisowa beya xua pomonae doce poyobe tatsi. Jesús barai barapomonae, jeye: “Anoxuae ponaeinchi Jerusalén tomara beya. Baraxotiya tana nayabara jume cui wetsinexa bara nama, po coyene Nacom pia peitorobi jume pepaebiwi newanae tsiwanaya yabara tina xua xan ponxaein Nacom Tananeitapetsin. ³² Yawa necaenaetsina

pomonaetha pomonae penanapaincha jinompaewi, xua icha nacua werena peponaewi xua barapomonae tanecui caponaenexa. Matautano abe neyabara paebina. Yawa neyabara naone subabina. ³³ Yawa necuainchina, barapomonae nebexubina. Daichitha poxonae acoibi po mat-acabibe yapu caewina equeicha asu neexanaena petupae cuiru coyene weya”, jei Jesús.

³⁴ Ichitha Jesús pijimonae tatsi jopa yaputaeyo baxua xua pocotsiwa Jesús pijimonae tsipaeba. Barapomonae jopa jume ita cui cupaetsi poxoru Jesús barompaya nabarũ jume yabara canamchi, baxua barapomonae taayapubetsi bichocono.

Meje yabara poxonae Jesús Jericó tomaratha axaibi exana pon peitata nacutsin

(Mt 20.29-34; Mr 10.46-52)

³⁵ Poxonae Jesús itiya pona Jericó tomara, pon peitata nacutsin namtotha eca, yawa jiwi wuqueibeca paratixi. ³⁶ Poxonae bapon ponxae peitata nacutsin jume tane xua juinya pin bicheito pona, bapoxonae bapon yainyaba, ichamonae yainyabatsi, jeye: “¿Eta xua metha juinya pin bicheito pona?” jei pon peitata nacutsin. ³⁷ Bapon ponxae peitata nacutsin jume notatsi, jeye: “Apara Jesús, Nazaret tomarapin xote imoxoyo patope”, jei. ³⁸ Nexata bapon pon peitata nacutsin jume daunweya wawai, jeye:

—Jesús, David pia pemomoxi susato jiwanaipim, ponxae Nacom necaitapetsim neyabara najuntũ coyene xeinare jinya tana neyawenaenexam, jei pon peita nacutsin.

³⁹ Pomonae xua pin bicheito matacaenapoinchi, barapomonae pon peitata nacutsin jume matawentatsi xua moya peecaenexa. Ichitha bapon equeicha jume daunweya wawai, jeye:

—Jesús, David pia pemomoxi susato jiwanaipim ponxae Nacom Necaitapetsim neyabara najuntũ coyene

xeinare jinya tana neyawenaenexam, jei pon peitata nacutsin.

⁴⁰ Nexata Jesús naruntaba. Jesús namchi, jeye:

—Painta maxu xawena, jei.

Poxonae pon peitata nacutsin imoxoyo patopa Jestustha, Jesús yainyaba, barai, jeye:

⁴¹ —¿Eta xua jinya tacata exanaetsi? jei.

Pon peitata nacutsin jume nota, jeye:

—Jesús Tananecanamataxeinaem, benecotsin cuinaya, jei.

⁴² Jesús jume nota, barai, jeye:

—Moya necore antha. Axaibi caexanatsi tana neyabara jume cowuntsixaemxae xua bara tana neitacupaewa xua tacayawenaewatsi, jei.

⁴³ Caena nainya bapon necotaxuba. Yawa Jesús puna poinchi. Matautano Nacom wuna jaintatsi. Poxonae pin bicheito baxua cui tane, iruru daxita barapo bicheito Nacom wuna jaintatsi.

19

Meje yabara poxonae pebin pon pewun Zaqueo Jesús jume cowuntatsi

¹ Jesús Jericó tomaratha patopa. Bapoxonae bapon barapo tomara xenta iya. ² Baxota Jericó tomaratha pebin popona, pon copei bichocono pexeinaein. Bapon pewun Zaqueo. Bapon pon pecanamataxeinaein pomonae paratixi pentoma noteibiwi po paratixi jiji bewa catsibina pon romanomonae itorobiya pia pepa peewatsinchi nexa. ³ Barapon Zaqueo bequein ichichipa xua Jesús peyaitawatsi, ichitha Jesús jopa taetsi tsipei pin bicheito, matautano poxoru Zaqueo xataxatequeca. ⁴ Nexata Zaqueo nanta cacuinaepoinya, peitiya ecoinyaenexa tsane naetha, po nae imoxoyo namtotha uncuwa ichaxota Jesús ponaena, xua Jesús barapo naetheicha xaniwaicha peyaitaenexatsi. ⁵ Jesús barapo nae cacuita ecapona, bara

asiya necoicha. Poxonae Zaqueo naetha tayeichatsi, Jesús namchi, jeye:

—Zaqueo, nainya ecoinca tha jinya botha ecaetsi anoxuae, jei Jesús.

⁶ Bapoxonae Zaqueo nainya dunatabica. Matautano Jesús matenta weiweinaya wabatsi pia botha. ⁷ Poxonae pin bicheito baxua tane, Jesús abe yabara paebatsi, jeye:

—Maisa Jesús bewa jopa ponae barapo botha, tsipei bapon abe peexanae cuiru coyene peexanaein, jei barapo bicheito.

⁸ Nexata Zaqueo nantacotuncua pia botha, yawa jeye Jesustha:

—Taema Jesús Tanecanamataxeinaem, tha daxita jiwana wetsabichi pocotsiwa xeinan, tacatsibinexa tsane pomonaetha pomonae peacopeibiwi. Matautano pomonae xua naerabiya wacan cae paratixi equeicha caewa tha catsibichi cuatro po paratixibe, jei Zaqueo.

⁹ Jesús jume nota, jeye:

—Anoxuae Nacom cana exana xua barapomonae pecapanenebiyae jiwichi, pomonae barapo botha peenaewi. Zaqueo, xam Abraham pia pemomoxi susatopiwi jiwanam. ¹⁰ Daxota xan ponxaein Nacom Tananeitapetsin patopan tawenaweneinexa tsane pomonae abe peexanae cuiru coyene peexanaewi pomonae icha xam ichim, xua tacapanenebiyaenexa tsane barapomonae, jei Jesús.

Meje yabara poxonae Jesús paeba pecayabara juta pepaebi diwesiyo xua diez po paratixibe yabara

(Mt 25.14-30)

¹¹ Barapomonae jume tayena xua Jesús paeba barapo jiwitha poxonae Zaqueo yabara paebatsi. Daxota Jesús cuiduba barapo jiwi pecayabara juta pepaebi diwesiyotha, tsipei barapomonae nanta xeina xua Jesús pona Jerusalén

tomara beya xua itara mexeya barapomonaе itorobiya pia pepa peewatsinchi tatsi naexanaenawejei.

¹² Bapoxonaе Jesús jeye: “Matha iruru pebin pona. Barapo pebin jiwana pin pomonaе peainya cui jiwi pomonaе barompaya piamonaе matabuxumonaе. Barapo pebin tajә pona icha nacuatha xua barapon icha nacuatha peexanaenexa tsainchi pocotsin be jiwi itorobiya pia pepa peewatsinchi, xua itorobiya peewatsinexa piamonaе. Barapoxonaе caibe nawiyaena pia nacuatha. ¹³ Poxonaе cataunxuae jopa tajә ponaeyo matha waba diez poyobe pebiwi, xua petanacuichinexatsi. Daxita barapomonaetha barompaya catsina be cae paratixi xua pocotsiwa ainya matoma. Barapo pebin namchi pomonaetha pomonaе pia petanacuichiwichi, jeye: ‘Barapo paratixitha pacomocare, equeicha pacaenare xuya, painya xuya nawita nexeinaponaenexa paratixi. Payacobe cui othopare poxonaе beya patopaein’, jei barapo pebin. ¹⁴ Ichitha bapon casebatsi piamonaе, pomonaе jinompa pia nacuatha tatsi. Pomonaе bapon casebatsi, barapomonaе itoroba ichamonaе xua pecoyo wepetayiyaenexatsi poxonaе bapon penta caponaein naexanopiya ichaxota pon jiwi itorobiya pia pepa peewatsinchi. Xua barapo penacajume caitorobiwichi pejeinexa: ‘Ponxaem jiwi itorobiya pia pepa neewatsin, taema, apara bapon piamonaе aichaxaibichi xua peexanaewatsi pon jiwi itorobiya pia pepa peewatsinchi’, jei penacajume caitorobiwichi, xua saya tapaeba.

¹⁵ “Daichitha barapon cana exanatsi, pon jiwi itorobiya pia pepa peewatsinchi, xua ichan cana exana pon iru jiwi itorobiya pia pepa peewatsinchi, bapoxonaе equeicha bapon caibe nawiya pia nacia beya. Poxonaе bapon pia nacuatha patopa bapon waba pia petanacuichiwichi pomonaetha pomonaе catsiba paratixi. Waba peya-

putaenexa icha barapomonaе metha comoca yawa caenaeta icha be pocotsi coyeneya bayatha bapon itoroba. ¹⁶ Pon copiya patopa bapon namchi: ‘Tanecanamataxeinaem, po paratixi necatame, barapo paratixitha comocan, xuya equeicha caenaetan, equeicha diez po paratixibe matoma xeineiban’, jei pon copiya patopa. ¹⁷ Pon pecanamataxeinaein jume nota, jeye: ‘Maisa xam beta exaname pon inta nenacuichim. Yaitama beta eexanaponame xua peyauyo caitorobatsi daxota pentacaponaein caexanatsi xua necanamataxeinaewa tsane diez po tomariyobepiwi’, jei. ¹⁸ Irꞑ icha petanacuichinchi patopa. Bapon jeye: ‘Tanecanamataxeinaem, po paratixi necatame, barapo paratixitha comocan, equeicha caenaetan, equeicha matoma xeineiban cinco po paratixibe’, jei. ¹⁹ Pon pecanamataxeinaein jume nota. Bapontha jeye: ‘Xam pentacaponaein caexanaeinchi xua necanamataxeinaenexa cinco po tomariyobepiwi’, jei.

²⁰ “Irꞑ icha pia petanacuichinchi patopa, bapon jeye: ‘Tanecanamataxeinaem, taema xote xeinanje jinya paratiyo, cata mata quiyontabatsi painyaweratha. ²¹ Yaitama cacui cunuwatsi, tsipei be barapocotsim pon jopa jiwi juniya itorobeibim. Matautano jiwi cobe itorobeibame xua noteibina pocotsiwa jopa jinyawiyo. Matautano pexaewa xua naweta noteibame ichaxota jopa ꞑbim’, jei. ²² Nexata pon jiwi itorobiya pia pepa peewatsinchi namchi: ‘Bepa maisa dapon abem. Aparaxam jinya coutha nanatsicuenti exaname abe nepaebixae. Xam yaputaneme xua xan pon jopa jiwi juniya taitorobeibin, xuano xua pexaewa naweta tanoteibiwa xua ichaxota jopa tacoya ꞑbeibinyo, matautano xua ichamonae cobe itorobeiban xua noteiba pocotsiwa jopa tawiyo. ²³ Tsipei catsawiya neyabara nanta xeiname xua bichocono daunweya itoroban

daxota bayatha inta bewa barapo paratiyo banco botha botsipame xua equeicha poxonae patopan, icha paratiyo equeicha matoma xeinaetsipan xua equeicha inta pemataropeichabotsixae tsipae poxonae ichamonae nacowaeta barapo paratiyo', jei. ²⁴ Pon jiwi itorobiya pia pepa peewatsinchi barai, pomonae xua ena baxota baraichi: 'Barapon pacobe wepire barapo paratiyo, nexata barapo paratiyo pacare pon xua equeicha diez po paratixibe matoma exanaeya xeina', jei pon jiwi itorobiya pia pepa peewatsinchi. ²⁵ Pomonae ena, barapomonae jume epa nota, jeye: 'Pon jiwi itorobiya pepa neewatsin, equeicha icha paratiyo jopa catsinde bapontha. Bayatha apara diez po paratixibe xeina', jei barapomonae. ²⁶ Pon jiwi itorobiya pia pepa peewatsinchi barapomonae jume notatsi, jeye: 'Paca tsipaebatsi, pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane beya poxonae bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi. ²⁷ Yabara paca tsipaebatsi pomonae taneaitafaetabi jiwi. Barapomonae neaichaxaibi xua jiwi itorobiya pepa taewatsin tanecana exanaewa. Barapomonae pacarenenande ichaxota ecan. Barapomonae pajutebare ichaxota ecan', jei pon jiwi itorobiya pia pepa peewatsinchi", jei Jesús.

*Meje yabara poxonae Jesús Jerusalén tomaratha patopa
(Mt 21.1-11; Mr 11.1-11; Jn 12.12-19)*

²⁸ Poxonae Jesús baxua najume weta, bapoxonae pona Jerusalén tomara beya. ²⁹ Jesús itiya patopa Betfagé tomara, Betania tomarano xua saya patopa demxuwatha

po demxuwa pewun Olivowa tsipei baxota umena olivo naein. Bapoxonae nacueyatabe poyobe itoroba poyobe xua pijimonaexae tatsi jiwanaabe pomonae xua doce poyobe. ³⁰ Jesús barai baponbe, jeye:

—Paponarebe po tomara painya itabaraya equiya. Poxonae papatopaenamebe barapo tomaratha, pacaxinaenamebe burro pon penun pon pequetanotsin, pon jopa ichamonae tsijuma enaeyo. Payama isanaxorebe bepayama carenandebe. ³¹ Icha ichun paca barai: ‘¿Eta pocotsiwa payama isanaxubamebe burro?’ icha paca jei bapon, nexata pajandebe: ‘Pon Wanacanamataxeinaein bepa pata yama cayiyaeinjei, tsipei pinae nantawenona’, pajandebe, jei Jesús.

³² Poxonae baponbe tomaratha patopabe, tanebe be pocotsi coyeneya bayatha Jesús namchi. ³³ Poxonae baponbe burro yama isacauyabe, baponbe yainyabat-sibe pomonae barapo burro pexeinaexae. Baponbe baraichibe:

—¿Eta pocotsiwa burro payama isacauyamebe? je-ichichibe baponbe.

³⁴ Baraponbe jume notabe barapomonaetha, jeye:

—Pon Pecanamataxeinaein jiwi bepa pinae patayama cayiyaein, tsipei pinae nantawenona, jeibe baponbe.

³⁵ Baraponbe burro tayama cayabe, Jesús tayama cayatsi. Baraponbe burro paparuwa tsijuma jebicabe po paparuwan aitiyu xua baponbe pia paparuwan tatsi, bapoxonae Jesús cuaretsicatsi. ³⁶ Jesús burrotha ecapona. Jiwi paparuwan namtotha yerababa jejobapoinya. Barapo paparuwan Jesús matatsun ecapona burrotha. Barapomonae baxua exana tsipei Jesús matenta weyatainchi xua patopa. ³⁷ Poxonae Jesús muxu perunadecae demxuwa wereca, po demxuwa pewun Olivowa, tsipei baxota umena olivo naein barapoxonae pomonae Jesús pejume

cowuntsiwichi, barapomonae jũntũ coyene weiweinaya jume daunweya wawai. Yawano Nacom wũnae jaintatsi xua bayatha pexeinya petsita itatsi coyenewan petaexae xua Nacom exana. ³⁸ Barapomonae jeye:

—¡Pai jayana! ¡Maisa Jesús pon jiwi itorobiya pia pepa peewatsinchi, maisa wũnae, bapon patopa Nacom peitorobixae! ¡Pomonae xua peitabocotha jinompa jũntũ coyene weiweina bichocono! ¡Maisa Nacom bichocono wũnae jaintatsi pon athabeicha eca! jei Jesús pijimonae tatsi.

³⁹ Nexata fariseo jiwanamona, pomona naenapona pin bicheitha, barapomonae Jesús baraichi:

—Pon jiwi Necuidubim, jinya jiwimona baxua jume matawende: ¡Moya pande! jande, jei fariseo jiwana-mona.

⁴⁰ Ichitha Jesús jume epa pita, jeye:

—Paca tsipaebatsi, icha barapomonae metha moya tsipae bara nexata iboton jume daunweya wawai tsipae, jei Jesús.

⁴¹ Poxonae Jesús imoxoyo Jerusalén tomaratha patopa, poxonae tomara tane, Jesús jũntũ coyene wecoyei tsanareca, poxoru Jerusalén tomaramona yabara we-coyeichi. ⁴² Jesús namchi, jeye: “¡Pai maisa bepaya-putaename xua pocotsi jũntũ coyene jũntema jinompa paca cana exana! Nama anoxuae baxua nantsiyata. Jopa paca itacũpaeyo xua painya nexainaewa painya jũntũ coyenetha. ⁴³ Meisa matabi pacata jopaena po matabi abe. Barapo matabitha painya nepaca caitaftabi jiwi paca yatomara yatoroto exanaxubina. Tsorobo paca yacaincha acabina. Yawa paca yacaincha umenaena daxita muxuneneintha. ⁴⁴ Paxam Jerusalén tomarapiwi pam, yawano painya pexuino, ichamonae paca jutebina. Painya bon iratha paca yawa bebai tsane. Jopa cae iboto asiya uncuiyae tsane, omeicha othopeicaena. Tsipei

paxam jopa Nacom payaitaem xua poxonae paca necasiwa ponaewa”, jei Jesús Jerusalén tomarapiwimonae yabara.

Meje yabara poxonae Jesús aisowa benapuna torobabiya pomona Nacom pin pia botha pecaenaetsiwi

(Mt 21.12-17; Mr 11.15-19; Jn 2.13-22)

⁴⁵ Jesús Nacom pin pia botha joniya. Baxota Jesús aisowa benapuna torobabiya pomona caenaeta baxota.

⁴⁶ Jesús barai barapomona, jeye:

—Nacom Pejume Diwesitha jeye: ‘Tabo apara po botha xua jiwi tanetsipaebinexa tsaibi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia mutha tutu pacana exaname, ichaxota pijunuwi nantsiyabeibathopa, tsipei baxota panacaetutame saya u xua painya necaibinexam tsane paratixi pomonaetha pomona xua pateiba xua Nacom petsipaebeibinexatsi, jei Jesús.

⁴⁷ Nacom pin pia botha daxita matabi Jesús cuidubeiba. Ichitha sacerdotemona pia pentacaponae, iru pomona jiwi pecuidubiwi Moisés pia peitorobi coyene tatsi, iruru tomara pia pentacaponae daxita barapomona Jesús yabara nanta xeinatsi nawita xua pebexubinexa tsainchi. ⁴⁸ Ichitha jopa itacupaetsi barapomona xua Jesús pebexubiwa tsainchi tsipei pin bicheito beta xanepanaya Jesús jume tayenatsi.

20

Meje yabara xua Jesús pia peitorobi coyenewa xeina

(Mt 21.23-27; Mr 11.27-33)

¹ Caentacabi Jesús Nacom pin pia botha joniya. Barapo botha Jesús cuiduba jiwi. Yawa Nacom pia peapanenebiyae diwesi yabara cueicuejei. Baroxonae iru sacerdotemona pia pentacaponae tatsi pata. Iru pata

pomonae jiwi pecuidubiwi xua Moisés pia peitorobi coyenewa tatsi. Iru pata pomonae penapatae jiwi. ² Daxita barapomonae Jesús baraichi, jeye:

—Incane pana tsipaebare, ¿eta po peitorobi coyenewatha cuidubame baxuan? ¿Jintam cacata barapo peitorobi coyene? jei.

³ Nexata Jesús jume nota, jeye:

—Xan iruru tha barichichi paca yainyabinchi pana nejume nore. ⁴ ¿Jintam Juan cui itorobatsi jane xua jiwi pebautisabinexa tsainchi? ¿Metha bara Nacom cui itoroba jampa? ¿Metha bara jiwi cui itoroba jampa? jei Jesús.

⁵ Barapomonae caemonae yabara natsipaeba pocotsiwa Jesús pepaebiwa. Barapomonae jeye: “¿Eta xua metha jei tsainchi? Icha jei tsipaetsi xua Juan cui itorobatsi Nacom xua pebautisabiwa jiwi, metha naca jei tsipae: ‘¿Eta xua metha nexata jopa pajume cowuntsim Juan?’ metha naca jei tsipae Jesús. ⁶ Icha jei tsipaetsi Juan cui itorobatsi jiwi, metha apara jiwi naca jutebina ibotoxitha, tsipei daxita barapo jiwi nanta xeina xua Juan pon Nacom peitorobi jume pepaebin”, najei barapomonae. ⁷ Barapomonae Jesús jume notatsi, jeye:

—Canta jopa payaputaeinyo xua pon Juan cui itorobatsi xua jiwi pebautisabiwatsi, jei barapomonae.

⁸ Nexata Jesús barai barapomonae, jeye:

—Nexata barichin tsane. Jopa yabara paca tsipaebi tsainchi, po peitorobi coyeneyatha exanan xua daxita taexanaewan, jei Jesús.

Meje yabara poxonae Jesús paeba pecayabara juta pepaebi diwesiyo pomonae xua abe exana, pomonae petayapucae-naewi uva pabi

(Mt 21.33-44; Mr 12.1-11)

⁹ Nexata Jesús diwesi tsipaeba jiwitha po diwesi pecayabara jũta pepaebi diwesiyo. Jesús jeye: “Matha irũ pebin pin uva pabi xeina. Bapon ũba po ũnbo pewũn uva cuei ũnbo. Bapoxonae bapon itoroba pomonae pia uva pabi petayapucaenaewichi tsainchi, xua bapoxonae barapomonae pejiwanaxaenexa pocotsiwa penawetsiwa. Bapoxonae bapon icha nacua beya pona ainya wei nexa. ¹⁰ Matabi tsuxubi xua uva cuei naweta. Bapoxonae barapo mataqueitha pomonae pabi petayapucaenaewi jiwana itapeta nota xua penawetsiwa. Bapoxonae pon uva pabi pexeinaein, caein jiwana itoroba pomonae pia petanacuichiwichi jiwana, xua petawũcaenexa tsainchi uva cuei pomonae beya pomonae pabi petayapucaenaewichi. Ichitha barapon pon najume caitorobatsi, bapon bũtsi. Bapon caibe cobesa iya. ¹¹ Pon uva pabi pexeinaein bapon equeicha caein jiwana itoroba pomonae pia petanacuichiwichi jiwana. Bapon barichi bichocono bũtsi, caibe cobesa nawiya yawa jopa catichi. ¹² Pon uva pabi pexeinaein equeicha caein jiwana itoroba pomonae pia petanacuichiwichi jiwana. Barichi pomonae pabi petayapucaenaewi barapon bũtsi yawa wan exanatsi yawa pabi weya xotsi.

¹³ “Pon uva pabi pexeinaein matapainya nanta xeina najei: ‘¿Eta xua metha exanaein? Metha taxanto itorobin pon bichocono antobein. Metha poxonae taxanto taeinchi, metha inta yabara barũ cui itura jinaeinchi’, najei. ¹⁴ Dapo jumetha pomonae uva pabi petayapucaenaewi poxonae bapon taeinchi, barapo petayapucaenaewi uva pabi najei tsane: ‘Apara bapon paxa copiniwa pichina. Daxota bapon bũ bexotsi xua xainya xeinatsi barapo uva pabi’, najei barapomonae. ¹⁵ Barapo pexanto tatsi uva pabi juma bemaxũ cayiyatsi. Baxotiya bexotsi”, jei Jesús.

Nexata Jesús barai barapomonae, pomonae jume

tayenatsi Jesús, jeye: “Pon uva pabi pexeinaein, ¿eta be cana ichi tsane pomonaetha pomonae barapo uva pabi pia petayapucaenaewichi? ¹⁶ Pon uva pabi pexeinaein patopaena pia uva pabitha, pomonae uva pabi peyapucaenaewi daxita barapomonae jutebinchi. Barapoxonae barapo uva pabi ichamonae xuya catinchi xua petayapucaenaenexa tsainchi barapo uva pabi”, jei Jesús.

Pomonae Jesús jume tayenatsi poxonae baxua jume tane xua Jesús paeba, barapomonae Jesús jume itawetatsi, jeye:

—¡Bara, jopa bepajume taeinyo baxua, tsipei xua pae-bame Nacom jopa copatsiyo pata xantha xua pata tane-jutebinexa ichamonae! jei barapomonae.

¹⁷ Ichitha Jesús tane, barapomonae tainchi. Jesús jeye:

—Incane pajume taema pocotsiwa Nacom Pejume Diwesitha neyabara caunuta poxonae iboto yabara paeba, jeye:

‘Pebiwí pomonae ibo bon peacabiwi,
barapo pebiwi xuba po iboto tabu
caboca, po iboto peainya cui iboto.
Ichitha Nacom itapeta barapo iboto xua
petabu cabocaenexa peainya cui ibotoxae’,
jei Nacom Pejume Diwesitha.

¹⁸ Incane iboto yabara paca tsipaebinchi. Barapo ibototha poxonae ichauyo jopeica pepurawixi tsanaya. Matautano poxonae barapo iboto ichauyo matatsun jopeicatsi pebena tsanaya. Icha barapo iboto ichi poxonae cana exana ichauxitha peainya cui ibotoxae, xan barapocotsi juta coyeneya barichin pomonaetha pomonae jopa tana nejume cowuntsiwi. Pia jopa tana neyaputaexae barapomonae daxota peraxa exanaeinchi, jei Jesús.

¹⁹ Sacerdotemonae pia pentacaponawí tatsi, iru pomonae jiwí pecuidubiwi xua Moisés pia peitorobi

coyenewa tatsi, daxita barapomonae juntucuru Jesús teicatsi poxoru barapomonae yaputane xua yabara paebatsi xua Jesús paeba. Nexata Jesús jopa teicaetsi poxoru jiwi cunuwatsi.

Meje yabara poxonae Jesús yabara cuiduba paratixi matoma po paratixi jiwi bewa catsibina pontha pon romanomonae itorobiya pia pepa peewatsinchi

(Mt 22.15-22; Mr 12.13-17)

²⁰ Barapomonae itoroba, ichamonae itorobatsi xua petataenexa tsainchi. Pomonae xua itorobatsi, barapomonae naexana itara mexeya pentu cui xanepanaewi. Barapomonae pona Jesús beya, xua Jesús naerabiya pecui jume yopichinexa tsainchi xua exana yawa xua paeba. Pia bapoxonae Jesús waetabichi yawa pia caponaetsi pontha pon Judea nacuapiwi peyanacua ewatsinchi. Bapon peajumeyapusu itorobiwa xeina, xua po peajumeyapusu itorobiwa cata pon romanomonae itorobiya pia pepa peewatsinchi. ²¹ Daxota barapomonae Jesús yainyabatsi jeye:

—Pon jiwi Necuidubim. Bara payaputan xua bara jume xainyeya tsipaebame jiwi, matautano xua jiwi bara beta cuidubame xua pocotsiwa jiwi bewa exanaena pexinaenexa tsane Nacomtha po juntu coyene pexanepanae juntu coyene. Matautano jopa jiwi cunuwim poxonae cuidubame poxonae bequein jiwi jopa ichichipaeyo baxua, tsipei xam daxita jiwi catsita najupa. ²² Incane yabara pana netsipaebare xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonae itorobiya pia pepa peewatsinchi xua wanaca itorobixae bapon bequein bara pon penanapainchi poponaein? Icha jopa tsipae, ¿metha daxua abe tsipae? jeichichi Jesús barapomonae pomonae fariseomonae itoroba.

²³ Ichitha Jesús yaputane xua piraichi baxua yainya-batsi.

²⁴ Daxota jeye:

—Incane moya painta xawena paratiyo, tha taetsi. ¿Jintam pejumopere? ¿Yawano jintam wun ducuaere? jei Jesús.

Barapomonae jume nota, jeye:

—Apara romanomonae itorobiya pia pepa peewatsinchi, jei barapomonae.

²⁵ Nexata Jesús barai barapomonae, jeye:

—Bara nexata romanomonae itorobiya pia pepa peewatsinchi pacare pocotsiwa xua bapon piawaxae. Matautano Nacom pacare xua baxua iru piawaxae tatsi, jei Jesús.

²⁶ Barapomonae jopa itacupaetsi xua Jesús pewaetabiwatsi daxita jiwi peitatha, tsipei Jesús beta jume nota barapomonae. Barapomonae yabara najuntu cui coyene cabenaeca pocotsiwa xua Jesús xanepanaya beta jume nota, daxota barapomonae saya moya umena.

Meje yabara poxonae Jesús yabara yainyabatsi po coyene xua equeicha asu pomonae pewerapeibiwi

(Mt 22.23-33; Mr 12.18-27)

²⁷ Bapoxonae saduceomonae jiwana pata Jesús pia xantha tatsi xua Jesús piraichi petsipaebinxatsi. Saduceomonae barompaya pia pecuidubi coyenewa xeina xua pinae pomonae pewerapeibiwi equeicha jopa asu tsaibiyo. Barapo pecuidubiwa jopa japaeyo po pecuidubiwa Jesús pia pecuidubiwa tatsi xua pinae jiwi equeicha asu jinompaena poxonae werapa. Daxota saduceomonae Jesús siwa poinchi. Saduceomonae Jesús baraichi:

²⁸ —Pon jiwi Necuidubim. Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa pentapin pecoutha coseuri pichina xua bapoxonae pentapin pecoutha pexeinaenexa tsane

pexui', jei Moisés. ²⁹ Barichi, matha iru cae peweicho jiwi xua caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. ³⁰ Pon cotacaya naexana xuya pentapin coseuri pita xua bapoxonae pentapin pecoutha pexeinaenexa pexui. Bapon iru cuenta tupa, iru jopa xeinaeyo pexui. ³¹ Bapoxonae ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. Daxita barapo siete poyobe cuenta nanapentapona barapowa poxonae bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. ³² Bapoxonae matapainya iru barapowa tupa. ³³ Xam, Jesús, ba pae-bame, ba jam: 'Matacabi jopaena po matacabitha Nacom asu exanaena xua jiwi asu exanaeinchi muthu wetsina', ba jam. Poxonae barapo matacabi jopaena xua daxita jiwi asu jujuinaena, barapo matacabitha, jintam metha barapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe caepiwi cuenta nanapentapona barapowa, jei saduceomona.

³⁴ Nexata saduceomona, Jesús jume nota. Jesús jeye:

—Barapo nacuathe pebiwi yawa yabuxi, barapomona jitha eenapona. ³⁵ Pomona xua Nacom itapeta waba, poxonae barapomona patsina Nacom pia nacuathe, barapomona jopa equeicha jitha eenapona tsane, yawa jopa pexantixi jitha cuarebapona tsane. ³⁶ Tsipei barapo nacuatheicha, barapomona bexa jopa werapae tsane icha matatsunpiwi ichi xua jopa werapae. Mataata barapomona Nacom pia pexui, tsipei barapomona equeicha asu barapo petupae coyene weya. ³⁷ Caena bayatha Moisés yabara naca cuiduba xua pomona pew-erapebiwi xua equeicha asu tsaibi tsane, po diwesitha

naewa yabara tina po naewa taxuncua. Barapo diwesitha Nacom pon Pecanamataxeinaein jiwi, namchi: ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. ³⁸ Baxua Nacom paeba tsipei Abraham iru Isaac, iru Jacob pomonae bayatha pewerapaewi anoxuae equeicha caewa asu jinompa Nacom pia nacuatheicha tatsi. Pomonae pewerapaewi pomonae jopa caewa equeicha asu pejinompaewi, barapomonae jopa pia Nacom tatsi, pon itabocotha eca. Saya jame meisa pomonae bayatha pewerapaewi caewa equeicha asu pejinompaewi pomonae pejume cowuntsi-wixaetsi Nacom, barapomonae jame pia Nacom tatsi, pon itabocotha eca, jei Jesús.

³⁹ Nexata pomonae jiwi pecuidubiwi Moisés pia peitorobi coyene tatsi, barapomonae jiwamonae Jesús baraichi, jeye:

—Pon jiwi Necuidubim, maisa bara beta xanepanaya paebame, jei barapomonae.

⁴⁰ Saduceomonae equeicha jopa Jesús yainyabichi xua equeicha beta pejume notsiwatsiyainwa.

Meje yabara poxonae Jesús nayabara jei: “Mesías, ¿jintam pia pemomoxi susato jiwonapin tatsira?” jei
(Mt 22.41-46; Mr 12.35-37)

⁴¹ Equeicha Jesús nayabara paeba pomonaetha pomonae jiwi pecuidubiwi Moisés pia peitorobi coyene tatsi. Jesús jeye:

—¿Eta pocotsiwa metha jiwi paeba xua pinae Mesías bapon David pia pemomoxi susato jiwonapin tatsi?
⁴²⁻⁴³ Tsipei David jei salmos penaxunae weixi diwesintha: ‘Nacom pon Pecanamataxeinaein jiwi Tanecanamataxeinaein baraichi pon Mesías jeichichi:

Tacoxa werena ecare, beya abũ tsane poxonae
necaitafaetabi jiwi pia Pecanamataxeinaeinchi
tatsi caexanaeinchi, jei Nacom',
jei David salmos penaxũnae weixi diwesintha.

⁴⁴ Icha David yabara jei xua Mesías yabara jeichi: Bapon
Mesías Tanecanamataxeinaein, jei, ¿eta xua metha tsipae
xua Mesías apara David pia pemomoxi susato jiwana-pin
tatsi? jei Jesús.

*Meje yabara poxonae Jesús muxuweta jiwi xua pomonae
jiwi pecuidubiwi Moisés pia peitorobi coyene tatsi barapomonae
pecuiyainwa tatsi*

(Mt 23.1-36; Mr 12.38-40; Lc 11.37-54)

⁴⁵ Pomonae xua umena daxita barapomonae Jesús jume
taeumeinchi poxonae Jesús pijimonae tsipaeba. Jesús
namchi, jeye: ⁴⁶ “Dota pam, dota pomonae jiwi pecuidu-
biwi Moisés pia peitorobi coyene tatsi. Barapomonae
pia pecuidubi coyewan tatsi pecuiyainwa pande. Jopa
paexanaeinde icha barapomonae ichi xua barapomonae
bichocono ichichipa xua penama xatabiwa po paparuwan
apipiya deca xua be pomonae peainya cui jiwi penaex-
anaewi naexana. Barapomonae bichocono ichichipa
xua jiwi namtotha jacobebina xua barapomonae peja-
cobinexatsi xua jiwi pebarũ cui itura jineibinexa bara-
pomonae xua barapomonae pebarũ cui itura jineib-
inexatsi. Barapomonae bichocono ichichipa xua nanta
caeneiba judiomonae pia penacaetutsi bontha tatsi ichax-
ota ba enathopeiba pomonae peainya cui jiwi penaex-
anaewi. Mataũta barapomonae bichocono ichichipa
xua eneiba ichaxota ba eneiba pomonae peainya cui
jiwimonae poxonae pexaewan tsinacaetuteiba xua pox-
onae penabaneibinexa tsane. ⁴⁷ Mataũtano barapomonae
powaxi pecuenta werapaewaxichi piseurixi, barapowaxi
cueranta enatsi pia bon. Barapomonae naemata jopa

cuinaya najume copababeibiyo poxonaе tsipaеbeiba Nacom. Barapomonaе bichocono peraxa jubebinchi poxonaе po mataqueitha Nacom yabara paebina жиwi xua pia penatsicuentsiwa xua abe petsita exanaexaetsi. Barapomonaе bichocono atene tsane xua poxonaе beyacaincha ichamonaе atene exanaeinchi xua jopa pejume cowuntsixaetsi Nacom”, jei Jesus.

21

Meje yabara poxonaе Jesus yabara paeba xua petsiriwa paratiyobe cata Nacomtha, powa pecuenta tupaewatsi piseuri (Mr 12.41-44)

¹ Nacom pin pia botha Jesus tane xua baxota pomonaе copei xeinaewi paratixi jeya Nacom nexa ichaxota жиwi jebeiba paratixi. ² Barichi Jesus tane xua iru ainya tsica paratiyobe jeca baxota powa pecuenta tupaewatsi piseuri, yawa bapowa peacopeibiwayo. ³ Jesus jeye:

—Bara xaniyeya paca tsipaebatsi. Barapo yabuyo powa pecuenta tupaewatsi piseuri, barapowa peacopeibiwayo. Daichitha barapowa jeca ainya paratiyobe Nacom nexa. Bapowa cata beyacaincha ichamonaе daxita pomonaе nawita jeya xua Nacom nexa. ⁴ Daxita barapomonaе jeya pocotsiwa tanacopabeibatsi. Ichitha nama bapowa bichocono peantobexae Nacom daxota omeicha jeca po paratiyobe bequein canantawenona xua pexaewa tsane, bequein bichocono peacopeibiwayo, jei Jesus pijimon-aetha.

Meje yabara poxonaе Jesus yabara paeba xua ichamonaе abe exanaena Nacom pin pia bo tatsi (Mt 24.1-2; Mr 13.1-2)

⁵ Ichamonaе yabara natsipaeba nawita Nacom pin pia bo tatsi. Barapomonaе najei: “¡Maisa Nacom pin pia bo tatsi bepa wanae! ¡Maisa bepa wanae xua жиwi tutu

pepena peitupanaewan barapo Nacom pin pia botha xua Nacom nexal” jei barapomonaе. Nexata Jesús jeye:

⁶—Matacabi jopaena po mataqueitha tsane ichamonae pomonaе penanapaincha jinompaewi pomonaе xua icha nacua werena peponaewi abe exanaena Nacom pin pia bo tatsi, xuaunxuae pataneme po bo. Jopa cae ibotiyo nacopatuncuae tsane icha iboto peumatha, daxita abe tsane, jei Jesús.

Meje yabara poxonaе Jesús yabara paeba xua copiya matha pewunaeya exanaena petsifa itutsi coyenewa poxonaе daxita weraweracaenaba

(Mt 24.3-28; Mr 13.3-23)

⁷ Nexata jiwi Jesús yainyabatsi, jeye:

—Pon jiwi pata Pecuidubim, ¿eta poxonaе metha ichamonae baxua exanaena poxonaе abe cana exanaena Nacom pin pia bo tatsi? ¿Eta pocotsiwa tsane xua pewunaeya tsita itapeinya xeinaena po coyene xua poxonaе imoxoyo daxita weraweracaenaba? jei Jesús pijimonaе tatsi.

⁸ Jesús jume barai: “Dota pam bu ichamonae naerabiya paca muxu tsipaeba xua daxota abe paexanaetsipame. Tsipei tsane patsina ayei bicheito jiwi pomonaе natsicotaena icha be xan ichin. Barapomonaе jei tsane: ‘Apara xan, Mesías’, jei tsane. Ichun jei tsane: ‘Anoxuae Mesías patopaena’, jei tsane. Ichitha paxam jopa payabara jume cowuntsinde pocotsiwa xua barapomonaе paeba. ⁹ Pajume taename xua jiwi juinya nabenoutsina xote, yawa xua juinya iruru nabenoutsina icha ira beya. Daichitha jopa pajunuwinde, tsipei baxua pewunaeya matha copiya tsane. Daichitha cataunxuae dapu matacabi aichica tsane xua poxonaе daxita weraweracaenaba yatsicaewa”, jei Jesús.

¹⁰ Equeicha Jesús namchi: “Cae nacuapiwi iru icha nacuapiwino barapo ainya nacuapiwibe nabenoutsina.

Matautano iru pon nacua peewatsin iru ichundu pon icha nacua peewatsin baponbe iru nantiya nabenabe. ¹¹ Matautano ainya nacuantha ira jijiyatsina. Matautano ainya nacuantha jainbo nacua tsane, tsipei pin mayayo tsane. Matautano domae tsurucuae tsane ainya nacuantha. Matautano Nacom peitabocotha peitapanaewan itutsina, xua jiwi bichocono cunuwa.

¹² “Poxonae baxua pewunaeya tsane jiwi paca teiquebina, paca atene exanaena. Judi monae pia penacaeutsi botha paca caponaena painya paca yabara paebinea painya nenatsicuenta xua abe painya neexanaexae. Yawa paca caponaena jiwi pecubi botha. Paca caponaenano nacua peewatsiwi peitabaratha tatsi, painya tana nejume cowuntsixaemxae. Yawano paca caponaena pentacaponae wi peitabaratha tatsi, pomonae iru itoroba jiwitha xua pon nacua peewatsin nexa painya tana nejume cowuntsixaemxae. ¹³ Barapoxonae paca cui itacupaena xua barapomonaetha tapana neyabara paebiwam pocotsiwa bayatha paca tsita exanatsi. ¹⁴ Pananta xeinare painya juntu coyenetha, pana najande: ‘Jopa tsiwanaya yabara nacui wunaetsi tsainchi xua ichamonaе watsipaebi watsi xua abe wanaca yabara paebiwa’, pana najande. ¹⁵ Tsipei xan paca tsimuxu dutinchi po jume xua pacaunutsiname, xua po jumetha beta paca yaputane exanaena. Barapo jume pacata exanatsi xua painya paca necaitafaetabi jiwi jopa paca jume matanonopentsi tsane, xuano xua jopa peitacupaenexa tsainchi xua abe painya nepaca yabara paebiwa. ¹⁶ Paca caenaetsina ichamonaе icha jiwitha pomonaetha pomonae jiwi pecanamataxeinaewi. Iru painya axeiwi yawa painya ena jiwi paca caenaetsina ichamonaetha. Iru painya eweicho jiwi paca caenaetsina ichamonaetha. Iru painya amoyo jiwi paca caenaetsina ichamonaetha. Iru painya jiwimonaе

paca caenaetsina ichamonaetha. Barichi ichamonaepomonaepaxamjiwana pamjutebinchi. ¹⁷ Daxita nacuanpiwi paca casebina, painya tana nejume cowuntsix-aemxae. ¹⁸ Ichitha Nacom paca capanenebiyaena painya nejuntũ coyenein panenebiyaenexa. ¹⁹ Awiya paantũyapusũya nejume cowuntsiya jinompare poxonaebequain ichamonaebepacata exana xua beya payacuiya werapaeya othopaename xua painya xeinaewa tsane peajũntũyapũsũwa po peajũntũyapũsũwa ataya tsiteca.

²⁰ “Poxonaepataename xua soldadomonaexua icha nacuapiwi yacaincha matawacaicha yatoxoroto naexanaxubina Jerusalén tomara bapoxonaepayaputaename xua barapo tomara bara imoxoyo abe exanaeinchi. ²¹ Barapo mataqueitha, daxita pomonaee Judea nacuatha jinompa barapomonaebewa demxuwã berũcũpiyaena. Irũ pomonaee Jerusalén tomarapiwi, barapomonaebewa bara berũcũpiyaena. Irũ pomonaepabitha jinompa, barapomonaee jopa bewa dũcũpaetsipae tomara beya. ²² Tsipei barapo matabintha Nacom cui itorobina, ichamonaee cui itorobinchi, xua jiwi peraxa exanaeinchi, icha be po coyeneya Nacom Pejume Diwesitha yabara paeba baxua. ²³ ¡Pai yabũxi tsobenaepowaxi pexui bũrana taenatsi barapo matabitha! ¡Pai powaxi irũ pexui isaina, barapowaxi tsobenaerũ! Tsipei acabe tsobenaee tsane pexui. Matautano Nacom cui itorobina barapo nacuathe, ichamonaee cui itorobinchi xua barapo nacuathepiwi pin peperaxa jubiwatsi tsainchi. ²⁴ Ichamonaee cusitha jutebinchi. Ichamonaeyamaxũ cũbiya caponaeinchi icha nacuan beya. Barapo Jerusalén tomaratha pomonaee penanapaincha jinompaewi xua icha nacua werena peponaewi dubenanaebiyaena beya barapo matabi yacobe cui othopaena, po matabitha xua Nacom cobe matawentsina xua equeicha jopa enaee tsane barapo

tomaratha barapomonae”, jei Jesús.

Meje yabara poxonae Jesús nayabara paeba xua poxonae equeicha patopaetsica ponxae Nacom pia Peitapetsin

(Mt 24.29-35, 42-44; Mr 13.24-37)

²⁵ Equeicha Jesús jeye: “Bapoxonae xometotha naitutsina peitupanaewa, yawa jomocoichatotha, yawa opiteitontha. Barapo irathe daxita nacuanpiwi yabara najuntũ coyene cabenaenoutsina. Matautano busi taena pin maratsacan busi xua busi jopa xainya mene ducuaeyo. Bichocono jiwi najuinyacaena. ²⁶ Jiwi pijunuwi muxu pewerapae tsane poxonae nanta xeinaena po coyene Nacom exanaena barapo cae pin nacuathe. Matauta junuwina xua exanaena itabocotha poxonae Nacom napuna torobabiyaena xua xuan itabocotha dubena. Bapoxonae jopa xapain dubenanaeyo tsane. ²⁷ Bapoxonae jiwi netaena ponxaein Nacom Tananeitapetsin xua tsaquinaebowatha patopeicaein. Nacom pia peayapuswa itorobi coyenewatha, matautano bichocono pexeinya itupanae coichatha yawa patopeicaein. ²⁸ Poxonae baxuan juntucuru exanaenaba, panantusubarucupare, athabe panecotumeinyama, tsipei bara imoxoyo paca necapanenebiwa tsane”, jei Jesús.

²⁹⁻³⁰ Nexata Jesús pijimonae tsipaeba pecayabara jũta pepaebi diwesiyo xua higuera nae, jeye: “Pataema nae po nae pewun higuera nae, xuano ichacuiŋtha icha naeinno xua pataneme xua pena noxu xuxuwa pona. Nexata bapoxonae payaputaema xua imoxoyo wei tsurucuae tso-ponae. ³¹ Nexata barapocotsi jũta coyeneya icha tsane xuaunxuae paca tsipaebatsi xua poxonae jiwi muxu pijunuwi pewerapae tsane. Bapoxonae payaputaename xua bara imoxoyo tsane poxonae xua tapatopae wnae tsane poxonae jiwi itorobiya ewatsin.

³² “Bara xaniyeya paca tsipaebatsi daxita judiomonae naitapataya naexanaponaena beya yacui othopaena poxonae Nacom exanaena daxita baxuan pocotsiwa xuaunxuae paca tsipaebatsi. Bapoxonae barapo judiomonae weraweracaena. ³³ Peitaboco aichurucuae tsane, matauta ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban.

³⁴ “Dota pam, pana neyabara cananta xeinaeya jinompare. Painya xoba pana najuntũ coyene ararana exaname xua pana nasi cui matacaetame yabuxitha xuano xua pana nacupa exaname peatsaxae meratha, yawano xua saya i pananta xeiname xua panantawenoname xua saya paxam nexa. Bapoxonae barapo matabi xain jopa paca benaecae tsane poxonae jopaena. ³⁵ Tsipei barapo matabi jemeicha jopaena, icha be pocotsi juta coyeneya ichi poxonae duwein jemeicha autabatsi mayatha. Barapo matabi jopaena daxita barapo cae pin nacuathe yajiwi canapaxuinchĩ. ³⁶ Tsaca pajinompeibare xua tapatopae wnae tsane. Matowa patsipaeba dubenanaebiyama Nacom. Patsipaebare xua Nacom paca capanenebiya exanaena baxua weya xua poxonae Nacom cana exanaena ichamonaetha xuaunxuae paca tsipaebatsi. Barichi patsipaebareno xua painya nepaca itacupaewa tsane xua painya neumenaewa taitabaratha ponxaein Nacom Tananeitapetsin”, jei Jesús pijimonaetha.

³⁷ Daxita matabi Jesús cuidubeiba jiwi Nacom pin pia botha Jerusalén tomaratha. Merawitha tsaibi demxuwa beya poneiba xua baxotiya peecaenexa tsaibi tsane, po demxuwa pewun Olivos. ³⁸ Daxita matabi jiwi caemumbotha tsaibi pateiba Nacom pin pia botha xua Jesús pejume taenexa tsaibi tsainchi.

22

Meje yabara poxonae fariseomonaе iru sacerdotemonaе pia pentacaponae wi tatsi daxita barapomonaе Jesús yabara nanta xeinatsi po coyeneya xua Jesús pewaetabiwa tsainchi

(Mt 26.1-5, 14-16; Mr 14.1-2, 10-11; Jn 11.45-53)

¹ Bara nama imoxoyo matakabi jopa po matakabitha xua jiwí nacaetuta pexaenexa pan xua jopa cotowiyo. Barapo matakabi pewun Pascua matakabi wun. Barapo Pascua matakabi wuntha jiwí yabara nanta xeina po matakabi poxonaе caena bayatha matha judiomonaе Egipto nacua weya panenebiya. ² Sacerdotemonaе pia pentacaponae wi tatsi, iru pomonaе jiwí pecuidubiwi Moisés pia peitorobi coyene tatsi, daxita barapomonaе nabaru muxu jei xua bepa pinae eta bichi tsane poxonaе Jesús waetabinchi pebexubinexatsi. Cataunxuae jopa exanaeyo, canta jiwí cunuwatsi.

³ Bapon Judas caein jiwana pomonaе doce poyobe pomonaе Jesús pijimonaexae tatsi. Judas icha wun xeina, po wun “Iscariote”, baraichi. Nexata bapoxonaе Satanás caurimonaе pia pentacaponae in tatsi, Judas imoxoyo peinya caquita uncuatabatsi peitorobinexatsi xua abe peexanaewa tsane. ⁴ Judas siwa pona sacerdotemonaе pia pentacaponae wi tatsi, iru policiamonaе xua pebaru cueicueijeinexa tsane. Barapomonaе policiamonaе pentacaponae wi, xua pomonaе peyabara umenaewi Nacom pin pia bo tatsi. Daxita barapomonaetha Judas tsipaeba xua pocotsi coyeneya poxonaе Jesús caenaetinchi barapomonaetha. ⁵ Barapomonaе bichocono ichichiparucupa baxua. Yawa barapomonaе Judas muxu tsipaebatsi xua paratixi catsibapaebatsi. ⁶ Judas bara yabara jejei xua barapomonaе paeba. Bapoxonaе Judas tamropata pitaba xua jeita xua po coyenetha Jesús pecaenaetaxubiwa

tsainchi barapomonaetha poxonae peyapu xanepanae-watha poxonae jiwaibi tsurucurape.

Meje yabara poxonae Jesús pijimonaē baruč nabane Pascua wun matabitha

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Nama matabi jopaba po matabitha poxonae jiwi tsinacaetsina xua penabanaenexa pan po pan jopa mux-una pentsiyo levadura matawun pocotsiwa xua cotowa exana pan. Barapo penantacarucuae matabitha ba corderoxi pebtoxi xua oveja coxi jutebatsi xua jiwi pexaenexa. ⁸ Pedro iruč Juan itorobatsibe, Jesús itoroba. Jesús barai, jeye:

—Paponarebe panacui wunaerebe pexaewa Pascua wun matabi nexa waxaenexa tsainchi, jei Jesús.

⁹ Baponbe, Pedro iruč Juan, Jesús yainyabatsibe. Jeibe:

—¿Exota ichichipame xua xota pexaewa paca tsiwunaetsinchi wanabanaenexa tsane xua Pascua wun matabi nexa? jei barapomonaē.

¹⁰ Jesús jume nota. Jeye:

—Poxonae tomaratha papatopaenamebe, pataenamebe pebin. Barapo pebin juruwatotha yantana ponaena mera. Bapon papuna ponarebe bo beya ichaxota bapon joniyaena. ¹¹ Pon bo pexeinaein pabarande: ‘Pon jiwi Pecuidubin cabarai: ¿Incane tutura, po tututha tajiwimonaē baruč xaein Pascua wun matabi nexa? jeye Pecuidubin’, pajandebe, jei Jesús. ¹² Equeicha Jesús jeye:

—Bapoxonae pon bo pexeinaein paca tsita ita cayopichinabe po tutu pin tutu. Barapo tutu, po tutu xua asiyeicha, barapo tutu bayatha xaneba. Barapo tututha pexaewa panacui wunaetajebare xua wanabanaenexa pexaewa barapo Pascua wun matabi nexa, jei Jesús.

¹³ Barapoyobe ponabe, penamchixae daxita tanebe be pocotsi coyeneya Jesús bayatha paeba. Bapoxonae pexaewa nacui w̄naetajebabe Pascua w̄n matacabi nexa xua penabanaenexa.

¹⁴ Poxonae barapo hora tsuxubi poxonae quirei tsanaicha, Jesús bar̄u ecoundeca pexaethopaewatha pijimonae pomonae doce poyobe pomonae pia peitorobiwixae tatsi Jesús. ¹⁵ Nexata Jesús barai, jeye:

—Maisa bichocono j̄nt̄u coyene weiweinan xua tapaca cabar̄u nacaetutsiwatsi, yawa tapaca cabar̄u nabanaewatsi barapo Pascua w̄n nabanae matacabithe, xua baxua matha pew̄naeye tsane xua poxonae tat̄upaewa tsane. ¹⁶ Daxota paca tsipaebatsi xua equeicha jopa tapaca bar̄u nacaetutsiwatsi tsainchi xua wanabanaewa tsane Pascua w̄n matacabitha. Equeicha exanaeinchi barapo penabanaewa po mataqueitha poxonae Nacom neexanaena xua jiwi itorobiya ewatsin, jei Jesús.

¹⁷ Nexata Jesús pecobetha pita corotiyo, Nacomtha tsipaeba, jeye:

—Axa, maisa j̄nt̄u coyene weiweinan xua corotiyotha ecareca pepa uva mera xua pata tanecatsiwam, jei.

Yawa barai pijimonae, jeye:

—Barapo corotiye pana nacobe wenonotaponde tamropata tsiwixi pa-aapaponde. ¹⁸ Daxota paca tsipaebatsi barapo uva mera jopa equeicha paca bar̄u apae tsainchi anoxuae. Meisa ab̄u bexa tsane pena coyenewatha paca bar̄u apaeinchi barapo uva mera poxonae Nacom neexanaena xua jiwi itorobiya ewatsin, jei Jesús.

¹⁹ Jesús pecobetha pita pan, Nacomtha tsipaeba, jeye:

—Axa, maisa j̄nt̄u coyene weiweinan xua pan pata tanecatsiwam, jei.

Bapoxonae Jesús pecobetha epa janaca pan, yawa catsiba pijimonae. Pijimonae barai, jeye:

—Paxaema po pan epa janacan. Barapo pan apara neyabara caunuta tapepon xua poxonae tapaca tsitupae-watsi tsainchi. Baxua paexaneibare bapocotsiwa xuaunx-uae pan paca baru xainchi. Barapo coyene paexaneibare painya tana neyabara juntanaineibinexa tsaibi tsane, jei Jesús.

²⁰ Poxonae Jesusbaru najain weta, barapoxonae Jesús yabara paeba corotiyo, icha ichi xua yabara paeba pan. Jesús jeye:

—Nacom exana pena pecapanenebiyae coyene jiwi nexa. Barapo pecaapaewiyotha uva mera paapame, xuaunxuae paapame, apara natsicotane be tajana xua tatupaein jana jopeicaein. Barapo pejanatha paca juntu coyene cui capanepaeinchi abe painya neexanae cuiru coyenein weya. ²¹ Pebin taxantha necacuita namaxu yutabota pexaethopaewatha, barapo pebin necaenaetsina ichamonaetha xua tanebexubinexa tsane ichamonaetha. ²² Xan ponxaein Nacom Tananeitapetsin bewa tupaein, tsipei Nacom Pejume Diwesitha baxua neyabara paeba caena bayatha. Ichitha pebin tsocae pon necaenaetaxubina ichamonaetha, jei Jesús.

²³ Nexata barapomonaetha caemonaetha nantiya nayainyaba, jeye: “¿Jintam metha caenaetatsi Jesús?” najei barapomonaetha.

Meje yabara poxonae Jesús pijimonaetha tatsi, yabara najume matsontsonoba xua barapoyobe caein ainya cui jiwana exanaeinchi pon xua barapo doce poyobe jiwana

²⁴ Pirapaeyo Jesús pijimonaetha tatsi najume matsontsonoba xua barapoyobe caein ainya cui jiwana exanaeinchi pon xua barapo doce poyobe jiwana. ²⁵ Nexata Jesús jume barai: “Pomonaetha jopa judiomonaetha naexanaeyo, barapomonaetha ba nantaeta piamonaetha pomonaetha nacua peewatsiwi. Barapomonaetha pomonaetha

jiwi itorobiya pia pepa peewatsiwichi barompaya piamonaexae jopa juniya itorobeibiyo. Barapomona pomona jiwit itorobiya pia pepa peewatsiwichi baxua exana, xua daxita jiwit pia jeichi: ‘Maisa barapomona pomona jiwit itorobiya pia pepa peewatsiwichi wuna nacata exana xua naca itoroba’, pia jeichi jiwit. ²⁶ Ichitha paxam jopa bewa paraichim tsane xua aebiya painya neitorobiwa tsane. Jame, icha cui bewa paxeinare. Pon ainya cui peexanaeinchi paxamtha xua beyacaincha ichamona bapon bewa naexanaena be pon pecui pawit. Pon xua jiwit itorobeiba, bapon bewa naexanaena be pon amanaya tanacuita ichun nexa. ²⁷ Iru ainya pebinbe. Ichun pexaethopaewatha ecoundeca. Ichun pexaewa apata. Pon ecoundeca apatatsi. Jintamda pon ainya cui peexanaeinchira xua beyacaincha ichun? Pon xua jiwit apata pexaewa bapon jopa ainya cui peexanaeinchi. Jame pon pententa apatinchi bapon jame pon peainya cui peexanaeinchi, xua beyacaincha ichun. Nama painya xantha ecan, xua tacoya nacana exanan be pon xua pexaewa jiwit taapatsin, pocotsin jopa ainya cuiyiyo.

²⁸ “Paxam barapomona pam, pomona meisa pana nebaru jinompeibame poxona bequein ichamona inta abe exana. ²⁹ Daxota paca catatsi taitorobi coyenewan icha Taxa Nacom neichi xua necata barapo peitorobi coyenewan. ³⁰ Barapo peitorobi coyenewan paca catatsi, painya nenabarū nabanaenexa taitorobeibi nacuatheica. Paenaename pexeinya peitupanae enaewantha, painya neyabara paebinexa tsane pomona doce po bicheito cuntiyobe, pomona Israel pia pemomoxi susato jiwimona tatsi xua penatsicuentiwa abe pia peexanaexae”, jei Jesús.

Meje yabara poxona Jesús namchi xua pinae Pedro Jesús yabara jei tsainchi: “Jopa dapon yaitaeyo”, pinae yabara jei

*tsainchi Jesús**(Mt 26.31-35; Mr 14.27-31; Jn 13.36-38)*³¹ Equeicha Jesús jeye:

—Simón jan, caurimonae pia pentacaponaein tatsi, bapon Satanás newwca: ‘Jinyamonaepin necare’, ne-jei. Bapon ichichipa xua abe cata exanaena xua taneitawetsinexam tsane. Icha jiwí ichi xua pebeno daunweya yasisita pexubinexa pesiberapewa. Barichi caurimonae pia pentacaponaein tatsi ichichipa cajuntũ coyene itorobina xua taneitawetsinexam tsane. ³² Ichitha xan Taxa beicha cata tsipaebatsi xua jopa tana neyabara juntemainaenexam tsane xua tana nejume cowuntsiwam. Ichitha Satanás cacana exanaena xua tana nejumefebiwam saya bara caeto tsane. Bapoxonae equeicha caewa nejume cowuntsiname. Poxonae equeicha caewa nejume cowuntsiname, nexata ichamonae pomonae tana nejume cowuntsiwi barapomonae yawenaename xua ajuntũyapuwya tana nejume cowuntsiwa tsane, jei Jesús.

³³ Simón Jesús jume notatsi, jeye:

—Tanecanamataxeinaem, maisa be cabarũ poponaeinchi. Bara bequein ichamonae cacaponaeina jiwí pecubi botha ichitha awiya capuna tũpaeinchi. Mataũta bequein tũpaename ichitha awiya capuna tũpaeinchi, jei Simón Pedro.

³⁴ Jesús jume nota, jeye:

—Pedro, catsipaebatsi bexa necaunutsiname acoibi po jume cuiyobe neyabara jam tsane: ‘Dapon jopa yaitaeinyo’, neyabara jam tsane. Barapoxonae irũ tsane wacara pebto fibina, jei Jesús.

Meje yabara poxonae bara nama barapo matacabi tsane po matacabitha Jesús waetabatsi

³⁵ Nexata Jesús pijimonae yainyaba, jeye:

—Poxonae bayatha paca itorobatsi paca jeichi: ‘Jopa paratixi doru pacaponaende, jopa cote pacaponaende, jopa panataxu xatabinde xua penataxu xatabiwa’, jan. ¿Eta xoyo pacata seica xua xoyo pacobena poname? jei Jesús.

Barapomonae Jesús jume notatsi, jeye:

—Ajibi, bara paxeinan pocotsiwa panantawenonan, jei.

³⁶ Nexata Jesús jume nota. Barapomonae jume notatsi.

Namchi:

—Anoxuae paca tsipaebatsi xua icha cui coyeneya. Pon cote xeina, moya bewa caponae. Pon xeina paratixi doru, moya bewa caponae. Pon peaitiyu camisa xeina, bapon bewa caenaetsina barapo camisa, barapo paratixitha bewa comotsina cusi. ³⁷ Poxoru paca tsipaebatsi caena bayatha Nacom Pejume Diwesitha neyabara paeba, jeye: ‘Bapon cayabara cananta xeinaeinchi jei tsane bapon jiwana caein pomonae peabewi’, jei Nacom Pejume Diwesitha xua pinae jiwi jei tsane. Jiwi nantawenona xua baxua neyabara caunutsina xua Nacom peneyabara jumichixae baxuan pejume diwesitha, jei Jesús.

³⁸ Barapomonae Jesús jume notatsi. Jeye:

—Patatanecanamataxeinaem, xote bayatha paxeinan ainya watobe cusi, jei.

Jesús jume nota, jeye:

—Bara, bare, jei Jesús.

Meje yabara poxonae Jesús Paxa tsipaeba ichaxota tsica iriyo po iriyo pewun Getsemani

(Mt 26.36-46; Mr 14.32-42)

³⁹ Nexata Jesús tomara weya pona. Bapon pona demxuwa beya po demxuwa pewun demxu Olivowa, olivo naein peumenaexae baxota poxoru pia cui xua poneiba baxota petsipaebebinexa Paxa. Jesús pijimonae puna poinchi.

⁴⁰ Poxonae barapo demxuwatha patopa, Jesús pijimonae barai:

—Nacom patsipaebare xua jopa abe painya neexanaewa tsane xua caurimonae paca itoroba.

⁴¹ Nexata Jesús pijimonae tsiwiyo wepu natsixitaba. Saya jopa tajũyo. Be poxonae pebin ibotiyo xoya xua be pocotsiwatha naruntabiya jopeica. Jesús pentabocototha ecoundeca. Paxa tsipaeba. ⁴² Jesús namchi: “Axa, icha ichichipame xua tana neyawenaewam, inta pire xua ajũntũcoyenerewe neexana. Ichitha jopa neexanaeinde be pocotsi coyeneya ichichipan. Saya jame necana exande be pocotsi coyeneya ichichipame”, jei Jesús.

⁴³ Bapoxonae Jesús tsita naitutatsi matatsunpin pon itaboco wetsica pona. Barapo matatsunpin Jesús antũsũya cana exanatsi poxonae yawenatsi. ⁴⁴ Bichocono Jesús ajũntũtane tsipei Paxa copatatsi xua jiwi petũtũpaewa tsainchi. Paxa beya bichocono matowa jume daunweya tsipaeba. Yawano bichocono najaneta. Barapo penajanetsiwa poxonae iratha othopeica be pejana othothopeica.

⁴⁵ Poxonae najume wetaba xuano xua asiya uncuano bapoxonae pijimonae beya pona. Jesús tane pijimonae xua tamaitumeinchi. Barapomonae maita tsipei jũntũ cuerona xua wecoyei, xua Jesús yaitama petũpapaebixae.

⁴⁶ Nexata Jesús pijimonae barai, jeye:

—¿Eta xua metha pamaitame? Panonobaponde Nacom patsipaebare xua jopa abe painya neexanaenexa tsane pocotsiwa caurimonae paca itoroba, jei Jesús.

Meje yabara poxonae Jesús waetabatsi

(Mt 26.47-56; Mr 14.43-50; Jn 18.2-11)

⁴⁷ Cataunxuae abũ Jesús pijimonae tsipaebuncua poxonaeru jiwi pin bicheito pata. Caein Jesús pijimonae tatsi jiwana, pon pewũn Judas, pomonae xua doce poyobexae,

bapon pin bicheito matacapona. Judas Jesús imoxoyo caquita uncuatabatsi xua Jesús petsutsubinexa tsainchi.
⁴⁸ Nexata Judas baraichi, Jesús barai, jeye:

—Xan ponxaein Nacom Tananeitapetsin, ¡Judas, jamaisa netsutsubame, apara metha jinya necaenaetichi ichamonaetha! jei Jesús.

⁴⁹ Pomonae Jesús pijimonae tatsi caquita umeinchi, poxonae barapomonae baxua tane xua Judas Jesús tsutsubatsi xua pecaenaetsinexatsi ichamonaetha, bapoxonae barapomonae Jesús baraichi:

—Pata Tanecanamataxeinaem, ¿barapomonae cusitha paucuboban? jei Jesús pijimonae tatsi.

⁵⁰ Jesús pijimonae tatsi jiwana caein, bapon muxuyoro catsoniba, pon sacerdotemonae pia pepa pentacaponaein tatsi tanacuitatsi bapon muxuyoro catsonibatsi po muxuyoroto pecoxa werucuiya. ⁵¹ Ichitha Jesús barai bapon jeye:

—Bara, bara, jei Jesús.

Pon muxuyoro catsonibatsi Jesús muxuyoro jayaba pecobetha. Bapoxonae bapon equeicha muxuyoro ducuanaya. ⁵² Jesús tsipaeba, sacerdotemonae pia pentacaponaeawi tatsi tsipaebatsi. Yawano tsipaebano pomonaetha pomonae penapataewi. Barichi tsipaebano pomonaetha pomonae Nacom pin pia bo peyapu enaewi. Daxita barapomonaetha Jesús cueicueijei, pomonae ichichipa xua Jesús pewaetabiwatsi. Jesús jeye:

—¡Pacapatame cusin yawa iwabi, icha paichim poxonae pacana exaname pontha pon jiwi pecaibin! ⁵³ Poxonae daxita matabi Nacom pin pia botha paca barꝰ po-poneibatsi, jopa pana newaetabim. Ichitha anoxuae barapo matabi tsuxubi nama po matabitha Nacom paca yabara cui copata xua painya neexanaewa tsane

pocotsiwa paca necaitorobixae cauri, bapon Satanás pon peyaitaquireya jinaein.

Meje yabara poxonae Pedro Jesús yabara paebatsi xua jeye: “Jopa dapon yaitaeyo”, yabara jeichichi Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Nexata daxita barapomonaе Jesús teicatsi. Yawano capoinchino sacerdotemonaе pia pepa pentacaponaein tatsi pia bo beya tatsi. Pedro, Jesús tsiwiyo tajũ pu taetae tsiniyatsi. ⁵⁵ Baraxotiya sacerdotemonaе pia pentacaponaein tatsi pia botha tatsi bara po botha aisowa beya panatha tututha isoto itutaeta. Soldadomonaе barapomonaе nayatoxoroto exanaxubiya ena isototha. Baraxota irũ Pedro naeca. ⁵⁶ Yabũyo powa sacerdotemonaе pia pepa pentacaponaein tatsi tanacuitatsi, poxonaе Pedro tainchi barapowa, xua irũ naeca baxota isototha barapowa Pedro caununaya baraichichi, jeichichi:

—Bapon irũ apara bayatha Jesús puna poponeibatsi, jei.

⁵⁷ Ichitha Pedro jume matawenta, jei:

—¡Petsiriwa, barapo pebin jopa yaitaeyo! jei Pedro.

⁵⁸ Bapoxonaе pirapaeyo irũ ichũndũ pebin patopa. Bapon Pedro irũ tainchi xua irũ naeca baxota. Pedro baraichi bapon, jeye:

—Xam apara irũ Jesús pijimonaе tatsi jiwanam, jei.

Ichitha Pedro jume barai, jeye:

—¡Pebin, jopa dapomonaе jiwananyo apara! jei Pedro.

⁵⁹ Poxonaе cae hora yapucaewa, irũrũ ichũn Pedro matowa baraichichi:

—Bapon apara napuna poneiba Jesús, tsipei bapon Galilea nacuapindũ, jei.

⁶⁰ Ichitha Pedro jume barai, jeye:

—¡Pebin, daũmetha jopa taeinyo xua paebame! jei Pedro.

Poxonae Pedro cataunxuae baxua cueicueijei, bapoxonae caena nainya wacara pebto caein fiba. ⁶¹ Nexata Jesús napatomeicha necota, Pedro necoyatsi. Nexata Pedro nanta xeinataba xua bayatha Jesús Pedro tsipae-batsi, poxonae jeye: “Xam barapo merawithe, pewunaeya poxonae wacara pebto fibina xam copiya acoibi po jume cuiyobetha neyabara jam tsane: ‘Jopa dapon yaitaeinyo’, neyabara jam tsane. Barapoxonae iru nainya wacara pebto fibina”, jeichi Pedro xua Jesús paeba. ⁶² Nexata Pedro pesato bejoniya. Bichocono wecoyei, peajuntanexae xua Jesús yabara paebatsi.

Meje yabara poxonae Jesús cui caponatsi

(Mt 26.67-68; Mr 14.65)

⁶³ Pomonae Jesús yapucaumeinchi, daxita barapomonae Jesús cui caponatsi, yawa butsinno. ⁶⁴ Jesús itacuere cutatsi, paparuwatha yawa itabara cuaintatsino. Barapomonae Jesús baraichi:

—Incane pana netsipaebare, ¿jintam caitabara tsaquibobara xua bequein paca itabara cutatsi? jei.

⁶⁵ Daxita barapomonae Jesús tsümü jume baru paebatsi ainya jumeintha.

Meje yabara poxonae Jesús capoinchi judiomonae pia pecanamata caitorobi jiwi bicheito tatsi pia peitabaratha tatsi

(Mt 26.59-66; Mr 14.55-64; Jn 18.19-24)

⁶⁶ Poxonae pentha tsina nabaru nacaetuta penapataewi judiomonae, iru sacerdotemonae pia pentacaponae tatsi, iruru pomonae jiwi pecuidubiwi Moisés pia peitorobi coyene tatsi. Daxita barapomonae Jesús capoinchi pecanamata caitorobi bicheito itabaratha tatsi xua peyainyabinexatsi, jeichi:

⁶⁷ —Incane pana netsipaebare, ¿Xam Mesías, pon Nacom necaitorobin? jei.

Jesús jume epa pita jeye:

—Icha: ‘Aa’, paca jei tsipaetsi, apara jopa pana nejume cowuntsitsipaem. ⁶⁸ Icha paca yainyabichipatsi tayainyabiwan apara jopa pana nejume notsipaem. ⁶⁹ Ichitha ponxaein Nacom Tananeitapetsin ecaein Nacom pia pecoxa weya tatsi, po Nacom peayapusu itorobi coyenewa pexeinaein, jei Jesús.

⁷⁰ Bapoxonae daxita barapomonae Jesús baraichi:

—¿Nexata metha xam Nacom Pexanto tatsim? jei.

Jesús jume epa pita jeye:

—Aa, barichi xuaunxuae papaebame painya coutha, jei.

⁷¹ Nexata barapomonae caemonae natsipaeba najei:

—Anoxuae jopa nantawenonaetsi xua ichamonae Jesús peyabara paebiwatsi. Tsipei anoxuae nama yatsicaewa jume tainchi, xua bapon pia coutha nayabara paeba, jei barapomonae.

23

*Meje yabara poxonae Jesús uncuca Pilato peitabaratha tatsi
(Mt 27.1-2, 11-14; Mr 15.1-5; Jn 18.28-38)*

¹ Nexata daxita penayatoroto exanaxubiya enae jiwi barapomonae asiya umenarucupa, Jesús teicatsi yawa capoinchi Pilato peitabaratha tatsi. Pilato bapon pon Judea nacuapiwi peyanacua ewatsinchi. ² Baxota daxita barapomonae Jesús cui yopitatsi xua abe exana, jeye:

—Barapo pebin patan xua wajiwimonae jume cui tsacabatsi xua anaepana cana exanatsi. Yawano pajume tanno pocotsiwa jopa bewa pinae paratixi matoma catsi pontha pon romanomonae itorobiya pia pepa peewatsinchi. Matauta bapon nayabara paeba: ‘Xan apara Mesías pon jiwi itorobiya pepa Taewatsin’, jei, jei barapomonae.

³ Nexata Pilato Jesús yainyabatsi, jeye:

—¿Xam judiomonae itorobiya pia pepa Neewatsin? jei.

Jesús jume nota namchi, jeye:

—Xuaunxuae paebame bara baxua apara, jei Jesús.

⁴ Nexata Pilato barai sacerdotemonae pia pentacapon-
aewi tatsi yawa baraino jiwi, jeye:

—Jopa jume itaraerowinyo bapon xua po jumetha pe-
nayaita anae exanaewa, xua pebexubinexatsi barapo pe-
bin, jei.

⁵ Ichitha barapomonae jume daunweya cueicueijei,
jeye:

—Jiwi jopa juniya jume cui tsacabichi xua anaepana
exanatsi pia pecuidubiwantha, daxita Judea nacuatha.
Baxua Galilea nacuatha tamropata pitaba, equeicha aunx-
uae waxainya becui joparene, jei.

*Meje yabara poxonae Jesús uncu Herodes peitabaratha
tatsi*

⁶ Poxonae Pilato baxua jume taeba barapo bicheito
baraichi, jeye:

—¿Jesús bara Galilea nacuapin? jei Pilato barapo
bicheitha.

⁷ Barapo bicheito namchi, jeye:

—Aa, bapon Galilea nacuapin, jei barapomonae.

Bapoxonae Pilato itoroba, Jesús itorobatsi, Herodes
peitabaratha beya. Bapon Herodes pon Galilea nacuapiwi
peyanacua ewatsinchi. Herodes siwa poneiba Jerusalén
tomara.

⁸ Poxonae Jesús taebatsi Herodes, bapon bi-
chocono juntu coyene weiweinanareca, tsipei bayatha
Herodes cuinaya betaena. Herodes saya jume taiba
xua Jesús yopiteibatsi. Herodes ichichipa tane xua

Jesús petsita itutsi coyenewa exanaena. ⁹ Herodes Jesús
matowa yainyabatsi. Ichitha Jesús jopa jume notsiyo.

¹⁰ Baraxota iruru ena sacerdotemonae pia pentacaponae
tatsi. Iruru baxota ena pomonae jiwi pecuidubiwi Moisés
pia peitorobi coyenewa tatsi. Daxita barapomonae Jesús

bichocono abe yabara paebatsi Herodes pia xantha tatsi. ¹¹ Nexata Herodes yawano pia soldadomonaе tatsino daxita barapomonaе Jesús tsam̄ jume bar̄ paebatsi. Jesús cui caponatsi, pexeinya paparuwa juma xatatatsi pocotsi paparuwan nama xataba pomonaе peyanacua ewatsi jiwi. Equeicha Jesús itorobatsi Pilato peitabaratha beya, Herodes bara beitorobiya. ¹² Barapo matabaratha Herodes ir̄ano Pilato naitacoxonabe. Baponbe caena bayatha saya penaita aenaе-aenei jitonbe.

Meje yabara poxonaе Pilato jume bar̄ jejei xua Jesús bara pebexubiwa tsainchi ichamonaе

(Mt 27.15-26; Mr 15.6-15; Jn 18.39-19.16)

¹³ Sacerdotemonaе pia pentacaponaеwi tatsi ir̄ur̄u judiomonaе pia pentacaponaеwi, ir̄ur̄u daxita jiwi, daxita barapo bicheito Pilato waba xua barapo bicheito penacae-tutsinexa. ¹⁴ Pilato barai barapo bicheito, jeje:

—Paxam barapo pebin pacaponame taxantha. Pajam: ‘Barapo pebin daxita jiwi jume cui tsacabatsi xua anaepana exanatsi’, pajam. Bayatha bequein baxua barapo pebin yabara yainyaban painya itabaratha pocotsiwa bayatha payabara paebame taxantha, ichitha jopa jume itaraerowinyo bapon, xua po jumetha penayaita anaе exanaewa xua yabara pana netsipaebame. ¹⁵ Icha ichin xua jopa jume itaraerowinyo Herodes barichi. Daxota equeicha Jesús caibe itorobarenatsi waxainya berena. Yaitama Jesús jopa abe exanaeyo, daxota jopa bewa bexubi. ¹⁶ Tha cueintichi bapon. Tha bapoxonaе pu copatichi, jeje Pilato.

¹⁷ Poxonaе Pascua matababintha ich̄an ba bewa isanaxubichi. Pilato barapo Pascua matababintha nantawenona xua isanaxubina caein pon jiwi pecubi botha pecaein, pon xua jiwi ichichipa, xua bapon peisanaxubinexa tsainchi.

¹⁸ Bapoxonae daxita jiwi jume daunweya wawai, jeye:

—¡Soldadomonae itorobare xua bapon pebexubinexatsi! ¡Barrabás painta pu sotabare! jei.

¹⁹ Barrabás jiwi pecubi botha etatsi, tsipei caena bayatha matabapona ichamonae xua barapo tomarapiwi najume tsacaba cana exanatsi xuano xua jiwi jutebatsi.

²⁰ Pilato ichichipa xua Jesús pu copatatsi. Daxota equeicha barapo bicheito tsipaebatsi xua Jesús yabara paebatsi.

²¹ Ichitha equeicha barapo bicheito jume daunweya wawai Pilatotha, jeye:

—¡Bewa maisa naetotha t̄parucua exanaem! ¡Bewa maisa naetotha t̄parucua exanaem! jei.

²² Equeicha Pilato tsipaeba barapo bicheito, jeye:

—¿Eta pocotsiwa xua metha jane xua abe exana? Xan jopa jume itaraerowinyo bapon xua po jumetha penayaita anae exanaewa xua pebexubinexatsi bapon. Tha cueintichi, tha bapoxonae pu copatabichi, jei.

²³ Barapo bicheito jopa juniya wawayo xua naetotha t̄parucua peexanaenexatsi Jesús. Irur̄u sacerdotemonae pia pentacaponae wi tatsi jume daunweya wawair̄u, beya capanepa po coyene ichichipa pecana exanaewa. ²⁴ Daxota Pilato namchi: “Moya paexande be pocotsi coyeneya paichichipame”, jei Pilato. ²⁵ Nexata Pilato nama pu sotaba pon jiwi pecubi botha peecaein, pon jiwi ichichipa xua bapon peisanaxubiwa tsainchi. Bapon pew̄un Barrabás, pon waetabatsi poxonae jiwi najume tsacaba xuano poxonae jiwi jutebatsi. Bapoxonae Jesús copatatsi, Pilato copata, xua Jesús bara pebexubinexatsi judiomonae pejumeyainwa tatsi.

Meje yabara poxonae Jesús t̄parucua exanatsi naetotha (Mt 27.32-44; Mr 15.21-32; Jn 19.17-27)

²⁶ Poxonae Jesús cataunxuae caenapoinchi tupa peexanadutsinexatsi naetotha, pebin waetabatsi, soldadomonae waetaba. Bapon pewun Simón, Cirene tomarapin. Bapon wexua werena pona. Bapon peutucuratha tabotsicatsi naeto, xua pecaponaenexa Jesús peputha tatsi.

²⁷ Jesús peputha tapoinchi pin bicheito, iru ainya yabuxino Jesús peputha tapoinchi. Daxita barapowaxi nantanuweya siwa namtsebiya wecoyeichi Jesús.

²⁸ Ichitha Jesús necotabiya barai barapowaxi, jeye:

—Yabuxi Jerusalén tomarapiwaxi pam, jopa pana nesiwa namtsebiya wecoyande. Jame maisa painya coutha pana nasiwa wecoyande, painya pexuino pasiwa wecoyande. ²⁹ Tsipei matabin othopaena po matabintha jiwi atene tsane. Barapo mataqueintha, jiwi jei tsane: ‘Juntá coyene weiweina po yabuxi jopa pexui xeinaeyo. Juntá coyene weiweina po yabuxi jopa bapana butixitha taenaetsi pexui. Juntá coyene weiweina po yabuxi bapana pexui jopa isainae’, jei tsane jiwi barapo matabintha.

³⁰ Yawano jiwi namchi tsane: ‘Maisa xanepana xua waw-erapaewa xua wanaca cunubabiwa demxuwan, yawano tsorobon naca matatsun wetoxebabina xua jopa wanaca itutsiwa tsane’, jei tsane jiwi barapo matabintha. ³¹ Xan wunae exanan dacotsiwa jiwi jopa juniya neperaxa exanaeyo. Ichitha pomonae abe peexanaewi nama jopa juniya bichocono peraxa exanaetsi beyacaincha xua neperaxa exana, jei Jesús.

³² Cataunxuae Jesús ecapona. Iruru ponbe abe matowa peexanaeinbe, baponbe Jesús peputha tacapoinchibe, xua baponbe iru pebexubinexa tsainchibe poxonae Jesús bexotsi. ³³ Daxita jiwi Jesús baru patatsi ichaxota po uruto be jiton matasipa piwa. Po uruto wun caunuteiba xua jei tsaibi: “La Calavera”, jei. Barapo uruto matasoittha Jesús

tuparucua exanatsi naetotha. Iruru ponbe jiwi pecaibinbe tuparucua exanatsibe naetotha ichaxota imoxoyo Jesús ducua. Ichun Jesús petsocona wetauncuiyatsi, iru ichun pecoxa wetauncuarenatsi. ³⁴ Poxonae Jesús naetotha ducua, Jesús jeye:

—Axa yabara cui jantemainare po coyene barapomonaec necana exana, tsipei barapomonaec jopa yaputaeyo xua necana exana, jei Jesús.

Soldadomonaec nata tsaba Jesús pia paparuwan tatsi. Bapomonaec ibotixi bebeya penacueranta notsinexa Jesús pia paparuwan tatsi. Pon beta xoya ibotiyo bapon copiya pita Jesús pia paparuwan tatsi. ³⁵ Baraxota Jesús taeumeinchi jiwi. Ichitha nama pentacaponae wi Jesús cui caponatsi, barapomonaec jeye:

—Bapon cain capanepibabei ichamonaec, came jopa nacapanepaeyo. Icha bara bapon Mesías, pon Nacom pia peitapetsin, bu bara bapon pia coutha nacapanepa naeto wetsica, jei barapomonaec.

³⁶ Soldadomonaec iru Jesús cui capoinchi, imoxoyo caquita umenapoinchino. Barapo soldadomonaec Jesús apatatsi po mera pewun vino, po mera mene atsu.

³⁷ Barapo soldadomonaec Jesús baraichi, jeye:

—¡Icha xaniwaicha judiomonaec itorobiya pia pepa Nee-watsim, moya jinya coutha nacapanepare! ¡Naeto wetsica ecoinca! jei soldadomonaec.

³⁸ Jesús pentutu wetsica tadutatsi napaewa xua barapo napaewatha tina. Barapo petinadutsiwa jeye: “Baponje apara judiomonaec itorobiya pia pepa peewatsinchi”, jei barapo petinadutsiwa.

³⁹ Ponbe Jesús pecuariya tacobe matatabarutatsibe, ponbe matowa abe peexanaeinbe, baponbe caein ichun, bapon Jesús biatainchi petupaeyainwa naetotha. Bapon namchi:

—¡Icha xaniwaicha xam Mesías, ponxaem Nacom caitapeta, moya jinya coutha nacapanepare! ¡Yawano pana necapaneparebe! jei bapon.

⁴⁰ Pon icha naetotha ducua, bapon jume matawenta, pon Jesús casebatsi, bapon jume matawentatsi. Pon icha naetotha ducua namchi, jeye:

—¿Xam jopa cuitaya junuwim Nacom? Apraunxuae t̃paeinchibe ichaunxuae Jesús ichi tsane. ⁴¹ Waxainchibe jopa juniya naca peraxa j̃ubiyobe abe waexanaexaebe, apra bara xainwaicha xua nacata exana tsipei bayatha apra abe exanatsibe. Ichitha nama ponje jopa apra abe exanaeyo, jei.

⁴² Nexata pon baxua penamchixae, bapon Jesús baraichi, jei:

—Jesús, neyabara cananta xeinare xua tana neyawenaenam po matacabitha poxonae patopeicaename xua jiwi neitorobinexam tsane, jei bapon.

⁴³ Jesús jume nota, jeye:

—Xaniwaicha bara catsipaebatsi, anoxuae tsane cabar̃ ecaeinchi ichaxota jiwi j̃unt̃a coyene weiweinathopeiba, peit̃p̃anae nacuatheicha, jei Jesús.

Meje yabara poxonae Jesús t̃pa

(Mt 27.45-56; Mr 15.33-41; Jn 19.28-30)

⁴⁴ Poxonae Jesús cataunxuae ducua naetotha, bapoxonae daxita nacuantha bichocono aitaquiri xua poxonae mateinyaxae weya, beya yatabopiya. Tres po horabe quirei tsuncuae. ⁴⁵ Poxonae cataunxuae xometo jopa penthiyo, bapoxonae paparuwa, po paparuwa Nacom pin pia botha ducua, barapo paparuwa nainya bopiya matonta tsisqueica. ⁴⁶ Nexata Jesús jume daunweya wawai, jeye:

—Axa, nejumope pire, po jumope tana necatsixaemxae, jei Jesús.

Poxonae Jesús baxua caunuta, bapoxonae Jesús tū-panaicha.

⁴⁷ Soldadomonae pia pentacaponaein tatsi Roma nacuapin, poxonae bapon baxua taeba, bapoxonae Nacom wūnae jaintatsi, jeye:

—Jaina, apara baraponje jopa abe exanaeyo, itara ichamonae yopita xua abe exana, jei bapon.

⁴⁸ Daxita pomonae xua baxua taeumena baxota, barapomonae pia bo benawibiya. Poxonae namtotha enapona, daxita barapomonae nantacari cuainbobenapona poxoru bichocono ajuntūcoyenetane xua Jesús pewisiwatsi.

⁴⁹ Ichitha pomonae Jesús peyaitae jiwi, irū yabūxino, powaxi Jesús puna dendenatsi Galilea nacua werena, daxita barapomonae Jesús taju wetaeumeinyatsi poxonae ichamonae Jesús bexotsi.

Meje yabara poxonae Jesús petūpaein ibo mūthutha yauxatatabobotatsi

(Mt 27.57-61; Mr 15.42-47; Jn 19.38-42)

⁵⁰ Irūru pebin popona, bapon pewūn José, Arimatea tomarapin. Arimatea tomara eca Judea nacuatha. Bapon pentacui xanepanaein. Yawano beta pepoponaein Nacom peitūtha tatsi. José, bapon jiwana caein pomonae judiomonae pia pecanamata caitorobi bicheito tatsi.

⁵¹ Barapon José yabara jume cowūntsiya wūnae ewateiba po coyenewa xua poxonae Mesías patopaetsica pon jiwi itorobiya peewatsinexatsi. Poxonae pomonae pecanamata caitorobi bicheito exana poxonae Jesús bexotsi, baxua José jopa pebūruya nacayabara nanta xeinaeyo.

⁵² José Pilato siwa poinchi. Pilato wūcatsi Jesús petūpaein, José wūca. ⁵³ José naeto wepichica Jesús petūpaein. Bapoxonae José mata quiyontabareca barapo pexeinya paparuwatha. Bapoxonae José ibo mūthū iya boya, po mūthū jiwi mūthū tofobobapona. Barapo mūthutha

cataunxuae petupaein ichun jopa boyaetsi. ⁵⁴ José baxua exana po mataqueitha pewun penacui xaxainchi matabi poxona judi monae ba weta daxita xua penacuit-siwa pewunaeya poxona jopaena pentaquei seicae matabi. Barapo pentaquei seicae matabi imoxoyo jopaena.

⁵⁵ Powaxi Jesús puna dendenatsi Galilea nacua werena, barapowaxi pona muthutha, petanexa xua Jesús muthutha xotsi. ⁵⁶ Poxona barapowaxi bo benawibiya, bapoxonae nacui wunaetajeba petuxueiwan yawa penasiwanno, xua Jesús petupaein tsixaxaintajebatsi.

24

Meje yabara poxonae Jesús equeicha asu juina exanatsi petupae cuiru coyene weya

(Mt 28.1-10; Mr 16.1-8; Jn 20.1-10)

¹ Barapowaxi botha cuicuina peseicae matabitha, Moisés pia peitorobi coyeneya pepaebixae, barapo matabi yabara.

Poxonae judi monae pia pentaquei seicae matabi tatsi yapu caewaba bapoxonae patopa matabi po matabi xua copiya ducua cae semanatha. Barapo matabi poxona aena pentha tsina, yabuxi pona muthu beya ichaxota Jesús boca. Barapowaxi capona petuxueiwan yawa penasiwanno xua bayatha xaxaintajeba. Barapowaxi cueyabatsi icha yabuxi. ² Poxona barapowaxi barapo muthu beya pata, barapowaxi taerucupa xua po ibo panawatha yauxatatabota xua pin ibo panawa barapo ibo muthu bayatha cou yaupataxabota. ³ Barapowaxi jojoniya muthiya ichitha barapowaxi jopa taeyo xua Jesús pon Pecanamataxeinaein petupaein pebocuaewa. ⁴ Barapowaxi yabara najuntu coyene cabenaeca. Jopa yaputaeyo xua exana tsipei jopa taeyo xua Jesús petupaein boca. Barapowaxi tsita naitutatsi

nacueyatabe pebinbe ponbe xua asiya uncuabe, xuano xua yawa paparuwa nama xatatabe, po paparuwa bichocono daedaena. ⁵ Barapowaxi bichocono junuwa, pijunuwi irabe necobareca. Barapo pebinbe barapowaxi baraichi, jeibe:

—¿Eta xua metha petupae cuiru coyenewatha panecobompame pon equeicha asu barapo petupae cuiru coyene weya? ⁶ Xote jopa bocaeyo bapon. Bayatha bapon asu petupae cuiru coyene weya. Payabara jume nanta xeinare xua bayatha bapon paca tsipaeba poxonae cataunxuae Galilea nacuatha popona. ⁷ Paca jeye: ‘Xan ponxaein Nacom Tananeitapetsin, bewa necaenaetsina pomonaetha pomona abe peexanaewi. Barapo abe peexanaewi naetotha tuparucua neexanadutsina. Ichitha equeicha po matabi acoibibetha asun juina neexanaena petupae cuiru coyene weya’, paca jei Jesús, jei barapo pebinbe xua barapowaxi tsipaebatsi.

⁸ Nexata barapowaxi baxua jume cui yabara nanta xeinarcupa xua bayatha barapowaxi tsipaebatsi, xua Jesús tsipaeba. ⁹ Poxona barapowaxi muthu wenawibiya tomara beya, barapowaxi daxita paeba pocotsiwa tane. Jesús pia peitorobiwi tatsi pomona xua once poyobe barapomona tsipaebatsi, ichamonaeno tsipaebatsino, pomona Jesús jume cowantatsi. ¹⁰ Powaxi yopita, xua powaxi Jesús pia peitorobiwi tsipaebatsi, ichowayo pewun María Magdalena powa Magdala tomarapiwayo, iru ichowayo Juana, ichowayo María, Santiago pena tatsi, yawanoru ichowaxino powaxi saya napon. ¹¹ Ichitha Jesús pia peitorobiwi tatsi nanta xaina xua barapowaxi jopa xainyeyo, yawano jopa jume cowantsichi barapowaxi.

¹² Bapoxona Pedro muthu becuinaepoinya. Muthu tututha tane xua meisa paparuwa boca. Bapon pia bo

benawiya. Bapon baxua yabara nanta xeina nawita.

Meje yabara poxonae Jesús pebinbe tsita naituta namtotha poxonae Emaús tomara beya ponabe

(Mr 16.12-13)

¹³ Barapo matabitha Jesús pijimonaе tatsi jiwanae namtotha ecaponabe, siwa ponabe tomara, po tomara pewun Emaús. Barapo tomara eca once po kilometrobe xua Jerusalén tomara weya. ¹⁴ Baraponbe yabara natsipaebecaponabe namtotha xua mexuaetha exana. ¹⁵ Poxonaе cataunxuae yabara natsipaebecaponabe yawa yabara najume matsontsonobecaponabe, bapoxonaе Jesús imoxoyo caquita uncuatababe yawa naponano. ¹⁶ Bequein baraponbe Jesús tainchi, ichitha baponbe jopa ita cui canaupatsibe xua Jesús peyaitaewatsi. ¹⁷ Nexata Jesús yainyaba, baponbe baraichibe, jeye:

—¿Eta xua namtotha yabara pana natsipaebecaponamebe? jei Jesús.

Baponbe juntu wecoyeya naruntababe peyabara natsipaebecaponaexaеbe xua mexuaetha exana. ¹⁸ Ponbe penacueyatsixaеbe caein pewun Cleofas. Bapon Cleofas Jesús jume notatsi, jeye:

—Daxita pomonaе jinompa Jerusalén tomaratha, daxita barapomonaе yaputane xua exana barapo matabintha. ¿Meisa xam compam jopa yaputaem xua mexuaetha exana? jei.

¹⁹ Nexata Jesús baraibe baponbe, jei:

—¿Eta xua exanara barapo tomaratha? jei.

Baraponbe jume notabe, jeibe:

—Apara pana natsipaebecaponanbe xua jiwi exana, pajan: ‘Xua po coyeneya Jesús Nazaret tomarapin cana exanatsi’, pajan. ‘Pon Nacom peitorobi jume papaebin, pon peitupanae petsita itutsi coyenein exana Nacom pia peayapusu itorobi coyeneya tatsi’, pajan. ‘Pon

xanepanaya pecueicueijein Nacom peitutha tatsi, xuano xua jiwi peitutha tatsi', pajan. ²⁰ Sacerdotemonae pata tanecanamataxeinaewi iru pata pecanamata caitorobiwi piraichi Jesús cobe waetabatsi pia Pilato peitorobinexa soldadomonae xua Jesús tɔparucua peexanaenexa tsainchi naetotha. ²¹ Bequein pawnae ewatan xua Jesús patopa xua peyawenaenexa tsane Israel nacuapiwi xua barapo Israel nacuapiwi panenebiya peexanaenexatsi, ichitha bapon jopa capanenebiyaeyo barapomonae. Yawano acoibi po matababibe pu caewa poxonae Jesús bexotsi. ²² Yabuxi, powaxi xua paxan jiwana pan, barapowaxi pona muthu beya poxonae aena pentha tsina. Pona ichaxota Jesús boca. Barapowaxi pana tsipaeba xua tane. Daxua pana nenabenaeca exana bichocono. ²³ Barapowaxi pinae jopa taeyo Jesús petɔpaein. Bapoxonae pana netsipaeba xua pinae barapowaxi tsita naitutatsi matatsunpiwi. Pinae matatsunpiwi namchi: 'Bayatha Jesús asu', jei pinae. ²⁴ Bapoxonae pata jiwimonae, barapomonae jiwana muthu beya pona. Barapomonae bara tane baxua, xua yabuxi yopita. Ichitha Jesús petɔpaein jopa taetsi, jeibe xua Jesús tsipaebatsi.

²⁵ Nexata Jesús jume nota baraponbe, jeye:

—Paxam pomonae jopa peyaputae jiwi pam, xuano xua bewayo pajume cocowɔntaponame pocotsiwa bayatha Nacom peitorobi jume pepaebiwi paeba. ²⁶ Paxam payaputaneme xua Mesías pon Nacom itapeta, copiya bewa peraxa exanaeinchi. Nacom cana exanaena xua bapon patopaena Nacom pia peitorobi nacua beicha xua pexinaenexa tsane Nacom pia peayapusu itorobi coyenewa tatsi, jei Jesús.

²⁷ Nexata Jesús tsipaeba baraponbe xua daxita i dapo diborontha Jesús yabara paebatsi Nacom Pejume Diwe-

sitha. Copiya matha Jesús yaputane exana po diwesin xua Moisés tina xua Jesús yabara paebatsi. Bapoxonae equeicha Jesús yaputane exana xua po diwesi Nacom peitorobi jume pepaebiwi tina, xua Jesús yabara paebatsi.

²⁸ Jesús, iru barapo pebinbe imoxoyo pata tomaratha, po tomara siwa ponaena. Barapo pebinbe naruntababe, ichitha Jesús mexeya maisa pona namto tomara weya. ²⁹ Ichitha baponbe Jesús jume daunweya baraichi, jeye:

—Pana nebaru ecare, apara bayatha tabopiya tsanaicha, quirei tsanaicha apara, jeibe.

Daxota Jesús puna joniya ichaxota baraponbe patopabe xua barponbe pebaru ecaenexa tsainchibe. ³⁰ Nexata poxonae Jesús baru eca pexaethopaewatha baponbe, bapoxonae Jesús wecobe pita pan. Paxa barai: “Axa, maisa juntu coyene weiweinan xua pata tana necatsiwam barapo pan”, jei. Bapoxonae Jesús epa janaxuba pan. Baponbe catatsibe. ³¹ Poxonae Jesús baxua exana, caena bapoxonae baponbe Jesús yaitainchi. Baponbe yaitae-babe. Bapoxonae Jesús yacuinaya jemeicha aichurucuae tsanaya. ³² Baponbe natsipaebabe, najeibe:

—Maisa juntu coyene weiweinatsibe poxonae namtotha naca tsipaebecaponabe. Bapon naca yaputane exanabe xua bapon peyabara paebiwatsi Nacom Pejume Diwesitha, jei baponbe.

³³ Bapoxonae caena yacuinaya caibe iyabe Jerusalén tomara beya. Baraxotiya Jerusalén tomaratha baponbe caxinabe penacaetutsi jiwi pomonae once poyobe pomonae Jesús pia peitorobiwi tatsi. Iruru nanacaetuta pomonae cueyaba xua pomonae once poyobe pia pecueyabiwichi. ³⁴ Barapo penacaetutsi jiwi namchi baponbetha, jeye:

—Apara xainyei. Bara Jesús pon Pecanamataxeinaein, asu. Apara bapon Jesús Simón tsita naitutatsi, jei barapo penacaetutsimonaе.

³⁵ Nexata baponbe daxita yabara paebabe barapo penacaetutsi jiwitha xua baponbe namtotha cuidubecapoinchibe. Matauta paebabeno xua baponbe mata-painya yaitaebabe xua Jesús yaitaebatsi poxonaе Jesús pan epa janaxuba, xuano xua poxonaе catatsibeno pan.

Meje yabara poxonaе Jesús tsita naituta pijimonaе Jerusalén tomaratha

(Mt 28.16-20; Mr 16.14-18; Jn 20.19-23)

³⁶ Poxonaе cataunxuae tsipaebabe barapo diwesi, bapoxonaе Jesús jemeicha tsita naituta barapomonaе peitabaratha. Jesús jacobа barapomonaе, jeye:

—Barabu Nacom jüntema jinompa paca cana exana, jei Jesús barapo penacaetutsimonaetha.

³⁷ Barapomonaе bichocono nabenaeca, yawa bichocono cuitaya junuwa. Barapomonaе nanta xeina xua metha Jesús perowatsi tainchi. ³⁸ Ichitha Jesús barai barapo penacaetutsimonaе, jeye:

—¿Eta xua metha junuwiya pana nabenaecame? ¿Eta xua metha ainya unthuton pam? ³⁹ Pana necobe taema, yawa pana netaxu taema. Apara bara xan tsocuaein. Pana nejayabare, yawa pana neyaputaema xua xan pepa jiton. Dowatsi bapana jopa wi ducuae, yawa bapana jopa piwa ducuae. Ichitha aunxuae nama yatsicaewa xaniwaicha pana netaneme xua xan pepa jiton icha paxam paichim, jei Jesús.

⁴⁰ Poxonaе baxua Jesús najume weta, nacobe wan ituba, yawa nataxu wan ituba. ⁴¹ Ichitha came awiya barapomonaе jopa jume cowuntsiyo poxoru barapo diwesi barapomonaе tsita jume xeicatsi yawa barapo diwesi yabara najüntu coyene cabenaeca exanatsi. Jesús jeye:

—¿Paxam xote penabanaewiyo paxeiname? jei Jesús.

⁴² Nexata barapomonae Jesús catatsi duweiyo, poyo seba. ⁴³ Jesús wecobe pita, yawa xane barapomonae peitutha tatsi. ⁴⁴ Bapoxonae Jesús namchi barapomon-aetha:

—Caena bayatha paca tsipaebatsi poxonae cataunxuae paca baru ecatsi. Paca jeichiche: ‘Daxita po coyenein neyabara tina, daxita baxuan peneyabara jeixae, bewa necana exanaena. Daxita xua Moisés po diwesintha neyabara tina, bewa necana exanaena. Daxita pocotsiwa Nacom peitorobi jume pepaebiwi neyabara tina, bewa necana exanaena. Daxita xua salmos penaxunaewi diwesintha neyabara tina, bewa necana exanaena’, paca jeichiche, jei Jesús.

⁴⁵ Jesús barapomonae yaputane exana xua Nacom Pejume Diwesi paeba. ⁴⁶ Jesús barai barapomonae, jeye:

—Nacom Pejume Diwesitha neyabara jei: ‘Mesías bewa tupaena, yawa equeicha asu tsane po matakabi acoibibe petupaey coyene cuiru weya. ⁴⁷ Yawano bewa barapomonae Mesías pia pejume cowunchiwichi bewa tsipae-bina daxita nacuantha Nacom Pejume Diwesi tatsi Mesías pia peayapusu itorobi coyeneyatha tatsi. Copiya petamropata notsinexa Jerusalén tomara weya. Barapomonae jei tsane jiwitha: Bewa icha juntu coyene Nacom patsita xeinaem xua bapoxonae Nacom painya nepaca cayabara junte-mainaewa tsane abe painya neexanaewi cuiru coyenewa, jei tsane barapomonae’, jei Nacom Pejume Diwesitha, jei Jesús. ⁴⁸ Equeicha Jesús barai pijimonae, jeye:

—Paxam daxita jiwu patsipaebiname daxita xua pataneme. ⁴⁹ Matauta pataemano xua pacata itorobicaeinchi Nacom pia Pejumope tuxaxu tatsi xua bayatha Taxa yabara paca tsiwunaewi muxu duta. Barapo Nacom pia Pejumope tuxaxu tatsi yawa

patopaena peayapusu itorobi coyenewa. Paenare xote Jerusalén tomaratha, beya poxona barapon yawa pacata patopaena pia peayapusu itorobi coyenewa Nacom pia nacua tatsi wetsica, jei Jesús.

Meje yabara poxona Jesús athabe juinya Nacom pia peitorobi nacua beicha tatsi

(Mr 16.19-20)

⁵⁰ Nexata Jesús pijimona baru pona Jerusalén tomara weya, Betania tomara bebaru iya. Jesús namaxu yoicha itaboco beicha yawa tsipaeba Nacomtha xua pijimona tatsi nexa, xua pijimona petayawenaenexatsi.

⁵¹ Poxona cataunxuae Jesús tsipaebuncua Nacom xua pijimona tatsi nexa, bapoxona Jesús athabe juinya exanatsi peitaboco beicha, Nacom exana. ⁵² Poxona Jesús pijimona tatsi baxua tane, bapoxona barapomona Jesús pecoutha tatsi namchi: “Maisa Wanacana-mataxeinaein wuna”, jei. Barapomona Jerusalén tomara beya juntu coyene weiweinaya caibe nawibiya.

⁵³ Barapomona Jesús pia peitorobi jiwu tatsi Nacom pin pia botha, baxota Nacom jopa juniya wuna jainteibichi. Baja Lucas.

Nacom Pejume Diwesi po diwesi pena jume diwesi xua
Jesucristo yabara tinatsi
New Testament in Cuiba

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22
